

# WANTOK



OCEAN BLUE

Tuna in oil  
Rait teist  
yah!



Wan Wik, Ogas 4 - 10, 2005 NAMBA 1620

Niuspepa bilong yumi ol PNG stret! K1.00 long Mosbi tasol - Ausait Mosbi K1.30



UPNG kisim was  
papa - PES 3

NARI strongim  
tingting bilong  
el vanilla fama -  
PES 25

Tingim taim  
bilong Tumbuna  
- PES 21

WOKIM STAIL NA KALA BILONG MAMBU NA  
GARAMUT FESTIVEL BILONG IS SEPIK -

6

# Wel pam birua

**SEXAVA GRASOPA BAGARAPIM  
WEL PAM LONG WES NU BRITEN**

**Steven Kadiko i raitim**

MOA long 8000 hekta bilong welpam blok long Hoskins welpam projek long Wes Nu Briten i kisim bikpela bagarap tru long sexava grasopa na dispela em i bikpela mak nogut olsem provins bai lusim bikpela mani.

Stori i go yet long PES 3



**K30 TRADE-IN OFFER  
BILONG KEROSENE LAMP**

Sapos yu gat olpela kerosene lamp na emi no wok o bagarap, noken trom oi! Karim olpela kerosene lamp kam na bai mipela givim yu \*K30 discount long niupela Coleman kerosene lamp.

\*Yu no nap kisim moni. K30 ol i rausim long prais bilong niupela Coleman 214 o K6 model kerosene lamp.



Wanpela trade in tasol long wanpela niupela Coleman lamp

PROMOSEN BAI KAMAP JULY 4TH NA PINIS AUGUST 12TH, 2005

DISPELA PROMOSEN ISTAP LONG OLGETA BRIAN BELL STOA NA WANWAN DEALER HUSAT I WOKIM DISPELA PROMOSEN.



COLEMAN KEROSENE LAMP SPARE PARTS ISTAP

# Ol papa wokim sik AIDS go bikpela

PLANTI papa insait long Papua Niugini i save grisim ol yangpela meri long mani na planti yangpela meri nau i karim sik AIDS i wok long givim long planti yangpela manmeri moa.

Praim Minista Sir Michael Somare i mekim dispela toktok long palamen long dispela wik.


Sir Michael i tok planti papa we krismas bilong ol i stap namel long 35 i go long 55 i wok long soim mani long pulim na grisim ol yangpela meri long kam na pati wantaim ol na bihain mekim pasin pamuk. Long dispela rot na sik AIDS i go bikpela moa.

Em i tok dispela ol papa em ol yangpela meri i ken kolim ol papa, ankol na bubu tasol ol i daunim dispela na go het long paulim ol yangpela meri krismas bilong ol namel long 15 i go long 29.

Sir Michael i tok dispela mak bilong krismas namel long ol meri em Helt Opis i luksave olsem planti yangpela meri i kisim sik AIDS na planti man moa bai kisim dispela sik long dispela wanpela rot tasol.

Em i tok PNG em ol manmeri i kisim sik AIDS long pasin pamuk we man na meri i mekim na i no olsem ol arapela kantri we man givim sik long man o ol i kisim sut na givim sik long arapela.

Praim Minista i tok dispela rekot bilong PNG em antap tru winim mak bilong ol arapela



• Praim Minista Sir Michael Somare i no amamas.

kantri insait long Esia na Saut Pasifik rijon na dispela i no gutpela. Namba bilong sik AIDS insait long Papua Niugini i sanap olsem 10,000 manmeri i gat rekot bilong sik AIDS na dispela namba i wok long go antap hari-ap tru.

Sir Michael i tok dispela hevi nau i go insait long famili we i kisim ol mama na ol pikinini na komyuniti olgeta. Olsem na sampela bikpela senis i mas kamap nau long daunim dispela hevi long noken ron long mak em i ron long en tude.

Em i givim dispela wok i go long han bilong gavman long go pas na toktok wantaim ol pipel bilong ol, putim mani na sapot i go insait long ol wok na program we ol sios na arapela komyuniti grup i wok long mekim long kempen bilong daunim sik AIDS insait long komyuniti.

Em i tok dispela wok i stap tu long han bilong olgeta lida husat i go pas long olgeta wok ol i lukautim olsem long kampani, gavman dipatmen, sios, ol skul na olgeta eria we ol bosman bilong ol i mas tokaut tu long daunim sik AIDS insait long kantri tude.

Praim Minista i tok dispela hevi i no hevi bilong haus sik moa. Em hevi bilong gavman bikos em bai daunim namba bilong ol manmeri long kantri na kantri bai sot long ol manmeri bilong mekim wok bilong lukautim dispela kantri long bihain taim.

Siaman bilong Nesenel AIDS Komiti Dokta Banare Bun i tokaut tu olsem dispela hevi em i bikpela tru nau. Olsem na em i askim tu ol papamama long stat long toktok wantaim ol pikinini bilong ol long haus long dispela hevi bilong sik na wanem rot dispela sik i save kisim ol manmeri.

Dokta Bun i tok 'yumi noken pasim maus nau na larim ol yangpela pikinini bilong yumi i kisim save long dispela long we na rot bilong ol yet. Mipela papamama i mas tokim ol nau. Tasol mipela i mas toktok long ol long mak bilong ol bai i ken save na lukaut gut long ol yet'.

Dokta Bun i tok taim olgeta lain i traim long wok wantaim long kempen na skulim arapela long dispela birua, yumi ol papamama i gat wok insait long haus bilong yumi yet long skulim ol pikinini na famili bilong yumi yet.



Tenkyu tumas... wanpela viles kot opisa bilong NCD i kisim setifiket bilong em long Siti Menesa Peter Loko. Ol dispela NCD Infomol Sekta Kot Opisa bai gat pawa long holim na sasim ol lain manmeri husat i no bihainim stret infomol sekta lo. Foto: ANDREW MOLEN

## Ol NCD kot opisa redi nau

Andrew Molen i raftim

OL INFOMOL sekta kot opisa insait long Nesenel Kapitel Distrik i tok ol i redi tasol long holim strong lo bilong Infomol Sekta na mekim i ron gut.

Ol i tok wanem taim Nesenel Kapitel Distrik Komis (NCDC) i tok oraitim bai lo bilong infomol sekta we bai givim tok orait o pawa long NCDC long lukautim infomol sekta insait long NCD, bai ol i stap redi tasol long wok strongim.

Dispela ol toktok i bin kamap long greduesen bilong 56 (faipela ten sikis) kot opisa bilong NCD husat bai was long infomol sekta lo.

Ol dispela opisa i kam long 21 viles kot long wan wan ples insait long NCD na ol i no nupela long wok bilong lo na kot tasol ol i kisim skul long lainim long holim lo aninit long lo bilong infomol sekta. "Dispela em i namba wan program i

kamap long hia na i nogat long narapela hap long PNG," mausman bilong ol kot opisa na Siaman bilong Hanuabada Viles Kot, Gini Guhu i tok.

Siti Menesa Peter Loko i tok amamas tu long ol opisa na em i gutpela long harim olsem ol i redi tasol long wok wantaim NCDC long lukim ol samting i ron orait tasol.

"Mi gat bikpela tingting long wokim siti i kamap klin na mi laikim bai olgeta manmeri i mas helpim," Mista Loko i tok.

Nau yet bai ol i was tasol long ol manmeri i go maket long ples bilong maket stret we NCDC i makim na i no long ol bas stop na sait bilong rot nabaut.

"Mi bai helpim ol pipel long kisim husat ol lain i brukim dispela lo i go long kot na mekim Pot Mosbi i kamap wanpela klinpela na gutpela ples long stap," Titus Pameko husat tu em i wanpela greduet i tok.

## PNG lo i strong long envaromen

MINISTA bilong Envaromen na Konsevesen William Duma i tok Papua Niugini i gat strongpela lo i banisim ol kampani long noken bagarapim bus graun na wara insait long ol hap bilong maining na timba projek insait long kantri.

Mista Duma i tok lo bilong PNG em strong na ol kampani na bisnis insait long ol wok maining na timba i wok long bihainim.

Wok bilong wokim dem o hap bilong bungim ol pipia bilong

wok maining i mas kamap long bungim olgeta pipia na bihain bai ol i stretim wantaim marasin long kilim o daunim strong bilong ol arapela strongpela marasin long en. Taim dispela dem i kamap klin bihain ol i ken opim dem na larim wara i go aut long bikpela wara o solwara.

Tasol em i tok dispela wok bilong mekim dem i no isi long kamapim bikos kain kantri olsem PNG em i gat arapela hevi i save kam wantaim. Kain olsem planti

ren na graun i save bruk, wara i tait na tu bikpela maunten hap bilong wokim dem na tu kros bilong ol aspies long graun na kompensesen na arapela samting moa. Dispela i save mekim dem i kamap hat long mekim na kos bilong en i save antap moa.

Tasol Mista Duma i tok aninit long lo, olgeta maining na loging kampani i mas lukautim gut ol pipia em i mekim long wok na operesen bilong ol. Dispela em long banisim gut ol wara na

bus graun na ol diwai na abus long noken bagarap.

Mista Duma i tok tu olsem ol papagraun i gat gutpela kompensesen bilong ol bagarap na wok i kamap long graun bilong ol. Ol i gat royalti peimen na levi peimen. I gat Envaromen Levi na Flora na Funa Levi ol papagraun i ken kisim sapos i gat bagarap long bus graun na wara long hap bilong ol bikos long maining na loging ol. Operesen long graun bilong ol.

## PNG i sanap turangu kantri long wol

PAPUA Niugini i kamap namba 133 insait long 175 kantri long wol olsem em i wanpela turangu kantri we em i sot long mani, nogat gutpela developmen na planti samting i no stret long mak bilong developmen long wol tude.

Dispela ripot em Minista bilong Nesenel Plening na Implimentesen Arthur Somare i kamapim long palamen long dispela wik long soim piksa bilong Papua Niugini long ai bilong arapela kantri long wol.

Dispela ripot i kamapim bikpela bel kros na toktok hat i kam long ol memba long harim dispela rekot bilong PNG.

Gavana bilong Galp Chris Haiveta i tok dispela ripot i no gutpela tru long piksa bilong PNG maski PNG i gat planti risos long mekim mani. Olsem na em i laikim bai gavman i lukluk gut na mekim rekot long wanpela ples na eria we ol samting i no ron gut na hevi i kamap long we tru bai gavman i ken stat long putim rait wok na helpim i go

insait long ol hap we i kamapim hevi na putim nem bilong PNG i go daun.

Dispela rekot i soim tu olsem ol bikpela eria olsem edukesen, helt, ikonomi na developmen olgeta i no kamap long gutpela mak. Planti manmeri i save kisim sik, planti bebi na mama i dai, lo na oda hevi i bikpela, mani i kam long ovasis helpim i no go stret long kamapim developmen na arapela hevi moa we i sut long laip na sindaun bilong ol pipel insait long kantri.



# Wel pam birua

Sexava grasopa em i wanpela kain binatang we i save kaikaim lip bilong wel pam na larim ol pam i sanap nating tasol na bai ol i nogat strong long karim prut na i ken dai o stap nating longpela taim. Taim dispela diwai i sanap nating longpela taim ol groa na ol bikpela stekholda bai lusim planti millien kina.

Ol bosman bilong Wel Pam Industri Koporesen, Wel Pam Risets Asosiesen na Nu Briten Pam Oil Limited i wok long paitim toktok long traim stretim dispela hevi nogut em bagarapim wel pam industri long provins na planti ol lokel wel pam kampani na ol smol holda bai lusim bikpela mani.


Otto Pukam bilong OPIC long Kimbe i tokim *Wantok Niuspepa* olsem dispela kain hevi nau wel pam industri i bungim na rot tasol long traim daunim dispela hevi

em long ol stek holda na ol bosman long provins i mas wok bung wantaim na stretim.

Nau yet i gat ol kibung bilong ol lain bilong OPIC, OPRA na NBPOL i wok long kamap klostu klostu long painim ol rot long stretim dispela pastaim long sexava grasopa i bagarapim olgeta wel pam diwai long provins.

Long dispela taim ol lain wokman bilong NBPOL smol holda divisen na OPRA i wok long go raun long ol blok na givim sut marasin long ol wel pam diwai i kisim bagarap long sexava grasopa.

Mista Pukam i tok bikpela eria long provins i kisim taim tru em long sait i go olsem long Hoskins na liklik hap long Talasea eria tu. Em i tok wanpela bikpela rot tasol long abrusim dispela hevi long kamap bikpela em long ol groa i mas klinim ol bus long sait sait long blok bilong ol na sexava gra-



• Dispela Grasopa ol i kolim Sexava i wok long bagarapim wel pam i stap.

sopa o binatang i no inap kalap kalap nabaut.

Nau yet i gat bikpela ren i save pundaun wan wan taim long provins na em i save mekim sexava grasopa i karim planti kiau na palai nabaut long olgeta hap na em i no gutpela.

Mista Pukam i tok ol lida long pravit sekta na gavman ejensi i mas wok bung wantaim na kamap wantaim ol gutpela rot na plen long daunim dispela hevi nogut bai wel pam bisnis long provins i bagarap olgeta na planti millien kina.

# UPNG kisim was papa

I GAT wanpela komiti bilong lukautim ron bilong UPNG i sanap pinis long go pas long wanpela wok painim aut long hevi we i bin kamap long skul long tupela wik i go pinis.

Minista i lukautim Haia Edukesen, Don Polye i tokaut long dispela komiti long Tunde.

Insait long dispela komiti i lukim din bilong skul ov humenitis, Profesa Kenneth Sumbuk i sanap olsem ekting vais sensela inap long taim wok painim aut i ron.

Em i tokaut tu long ol lain husat bai i kamapim wok painimaut o komisin ov inkwairi long ol samt- ing i kamap na ol tems ov refrens (TOR) o ol samt- ing ol bai glasim long en.

Ol lain long dispela komiti bi-

long kamapim wok painim aut em, Sir Kina Bona, Lady Hilan Los husat i deputi seaman, Dokta Brain Gould na Dokta Thomas Webster husat i seaman bilong komiti.

Wok painimaut bai ron inap tripela wik.

"Dispela komiti i gat ol lain husat i gat bikpela save long wan wan wok bilong ol na mi gat bilip olsem ol bai kamapim gutpela wok long dispela inkwairi," Minista Polye i tok.

Wok bilong komiti bai i karamapim 20 TOR we sampela samting ol bai i lukluk long en, em; trupela toktok long gred pouns sistem bilong ol sumatin; pasin ol polis i mekim long ol sumatin long UPNG long taim bilong hevi; ol sumatin husat i stap

insait long ol bikhet pasin na ol wok bilong etministresen na menesmen bilong UPNG olsem i stap insait long petisen o askim bilong ol sumatin na tu wok bilong ol UPNG sekyuriti.

Dispela wik tu i lukim ol sumatin i go bek long skul bihain long ol i bung wantaim Mista Polye.

"Mipela i amamas long ol toktok bilong yu na long soim dispela amamas bai mipela i go bek skul," wanpela lida bilong ol sumatin i tok taim em i bekim tok bilong minista.

Em i tok ol bai i amamas long helpim wok painimaut.

Ol sumatin i tok taim bipo minista bilong haia edukesen Brain Pulayasi i bin go lukim ol namba wan taim, i nogat wanpela samt-

ing i bin kamap na dispela i mekim hevi i go bikpela moa yet.

Ol sumatin bilong UPNG i bin straik inap tripela wik olgeta we i lukim ol i lusim skul na las wik tasol ol i pait wantaim ol sekyuriti bilong skul na dispela i lukim ol polis i kamapim wanpela reid long haus slip bilong ol man we sampela i kisim bagarap na planti i no amamas long ol pasin na ol toktok ol polis i bin mekim.

Sampela i bin kukim kar bilong vais sensela Profesa Les Eastcott.

Belhat bilong ol sumatin i kirap bilong wanem ol i bilip olsem etministresen bilong UPNG i no save givim ol stretpela mak aninit long GPAo gred poin evris sistem na ol i singaut long gavman long luksave long hevi bilong ol.



OL raskol long biksiti Mosbi i wok long kisim ol kain kain nupela tingting long stil. Sampela yut i putim kios bilong ol wokman na giaman wok long rot i stap na wetim wanpela man i karim mani bilong stua bilong em.

Em i stop long helpim ol wantaim liklik toea na ol i putim gan long em na stilim K24,000. Tasol ol polisman bilong yumi i painim ol dispela raskol manki na kilim dai wanpela long ol.

SINGAUT i go long olgeta wan wan bisnis, kampani na komyuniti insait long Mosbi siti long plaim PNG flek na soim olsem ol i amamas long sanap strong olsem ol pipel bilong PNG.

Singaut i kam long man i go pas long ol bikpela bung bilong dispela yia, Sir Peter Barter.

Tru tumas, taim bilong klinim ol stua, haus, na banis. Yumi olgeta mas sanap wantaim.

BIKPELA so Tumbuna Taim we i kamap los wiken long Mosbi i bin kamap gut tru. Planti ol yangpela pikinini na ol famili i bin go raun long lukim ol stori baksait long ol singsing tumbuna. Planti wantok i kisim skul na i amamas. Nau ol i save olsem danis bilong Manus i no danis nating. I gat stori bilong em tu.

PLANTI kain kain birua long ren, win, na ol arapela bikpela raun win i wok long kamap na bagarapim ol arapela kantri.

Dispela i soim klia olsem sapos mipela i no lukautim gut ol diwai, bus na graun bilong yumi, bai mipela tu i bungim ol dispela kain bagarap. Olsem na mipela i laik save. Ol lida bilong yumi husat i sapotim ol senis long diwai lo i klia gut long ol dispela senis o ol i pairap nating tasol.

## Prinses Anne bai raun lukim AIDS senta

Veronica Hatutasi i raitim

ANGLIKEA Stop AIDS senta em wanpela hap we Prinses Anne bai go lukluk long em long wan de stap bilong em long PNG neks mun.

Senta ya i save mekim planti wok i sut long HIV/AIDS long karimaut ol edukesen aweanes, givim "peer grup" trening, kaunselling, tes long manmeri sapos ol i gat HIV/AIDS na lukautim ol lain i gat dispela sik pinis.

Dairekta bilong senta Dominica Abo i tok senta i amamas long wanpela Royel famili memba husat i save lukluk long dispela sik we i wok long bagarapim planti pipel na ol famili

bai kam lukim ol.

Em i tok senta i wok nau long redim progrem long lukluk raun bilong Prinses Anne i go long ol.

Prinses Anne em i namba tu pikinini long 4-pela pikinini bilong Kwin Elizabeth 2 bilong Ingran. Yumi save kolim ol long Royel Famili. Kwin em i het bilong Stet na Sios long Ingran. Em i het tu bilong ol Komonwel kantri we PNG i kam aninit long em.

Raun bilong Prinses Anne long PNG long Septemba 28 na go bek long neks dei hap long luksave long 30 yia independens aniveseri bilong PNG.

Dispela em namba tu lukluk raun bilong Prinses Anne i kam long PNG bihain long 31 krismas. Las

taim em bin kam em wantaim Kwin Elizabeth 2 long 1974.

HIV/AIDS na Vailens agensim ol meri na pikinini em tupela long ol samt- ing we Prinses Anne bai toktok long em wantaim ol NGO grup i save wok long daunim ol sik na hevi long tupela eria ya.

Em bai raun lukim na sekanim ol lain i gat HIV/AIDS na tu, lukim ol lain long Cheshire Horns.

Em bai go putim flawa long Bomana Woa matmat we ol i planim samting olsem 500 soldia bilong Ingran husat i bin pait hia long Wol Woa 2 wantaim ol lain bilong ol long Australia na Nu Silan.

## I no Australia tasol, Briten tu



• Britis Hai Komisina David Gordon McLeod i tok PNG noken lukluk long Australia tasol.

Veronica Hatutasi i raitim

I MOABETA long PNG i lukluk long wok poroman na tred wantaim ol narapela kantri na i no pas tasol oltaim wantaim Australia, Hai Komisina bi-

long Briten David Gordon McLeod i tok.

Em i tok nau PNG bai makim 30 krismas na em i taim long lukluk long ol arapela kantri na i no pas tasol wantaim Australia.

"I luk olsem planti gutpela samting i kamap

long PNG tasol wanpela eria i no kamap gut. Na dispela em wok poroman na tred wantaim ol narapela kantri ausait long Australia na Pasifik rijen. Mi no tok olsem dispela i nogut, nogat.

Mi tok tasol olsem PNG nau i gat 30 krismas bihain long kisim independens na em i taim kantri i glasim na skelim ol samt- ing long kirapim ol wok poroman wantaim ol arapela kantri long wol, wantaim ol plen na tingting long wanem kain samting em bai wokim long em wantaim ol," Mista McLeod i tok.

Em i tok bai em i helti long wok pren bilong PNG wantaim Australia bikos bai i nogat hat wok.

"Taim yu gat wanpela poroman tasol, sampela hevi i save kamap tasol

taim yu gat planti gutpela poroman, bai yu gat balens," Mista McLeod i tok.

Em i tok ol kantri long Afrika we Ingran i bin lukautim ol bipo na nau i kisim independens i no pas tasol wantaim Ingran, nogat. Ol i gat planti poroman long wol na moa yet, wantaim Komonwel na Yuropien Yunien. Em bin tok em i gutpela moa sapos PNG i kamapim strongpela wok poroman wantaim Komonwel na Yuropien Yunien.

Em i tok long sait bilong tred, PNG i gat ol risos olsem pis na timba na Turisim we ol kantri long Yuropien Yunien i ken baim na ol i ken kamapim dispela aninit long ikonomik Patnasip Agrimen.



# K39 milien baset bilong Otonomes Gavman

Aloysius Laukai i raitim

**SAPLIMENTERI** baset bilong Otonomes Bogenvil Gavman (ABG) bilong yusim inap long pinis bilong dispela ya em K39, 093, 800 milien.

Dispela manimak em bai ABG i yusim insait long 6-pela mun we i stat long June 15 i go inap long Disemba 31 long dispela ya.

Haus ov Representativ bilong ABG i bin sindaun na glasim ol samting na tokaut long dispela baset insait long bung bilong ol long dispela wik Tunde.

Baset bilong dispela ya em

**Fainens Minista bilong ABG Mathias Roman Salas i tok dispela manimak i no inap long karimaut olgeta wok we ABG i laik mekim long em.**

Bogenvil Interim Provinsel Gavman aninit long Gavana John Momis i bin kamapim. Na mak em K63, 254, 100. Tasol ol i bin yusim hap bilong dispela manimak insait long 6-pela mun i go pinis.

Long baset toktok bilong em, Fainens Minista bilong ABG Mathias Roman Salas i tok dispela manimak i no inap long karimaut olgeta wok we ABG i laik mekim long em.

Namba wan baset bung i bin tok

strong long ol bikpela projek na eria we dispela baset i lukluk long en.

Em i tok bihainim 2005 baset plen, ol bikpela eria we ol i lukluk pinis long ol em long Helt, Edukesen, Distrik Developmen, ol Fida Rot, Ikonmik sekta Developmen, Bildim na Strongim ol Institusen na Pis na jastis.

Nupela gavman i kamapim tu wampela divisen ol i kolim long Otonomi Divisen na wok bilong en

em long sapatim ol wok long go hetim Otonomi. Ol i katim K850, 000 i go long divisen bilong karimaut ol wok bilong em.

Em i sanapim tu Veterens Afeas opis long lukautim na kamapim ol wok long sekan na bel gut pasin. Na opis bai go hetim ol wok aweanes long stretim ol samting long dispela eria. Ol i katim K100, 000 long dispela wok.

Wok bilong lusim na bagarapim ol gan long Bogenvil bai go het.

Fainens Minista Silas i tok sapos ol gan i stap yet long ailan, trupela gutpela sindaun bai i no inap kamap long ailan.

Ol i katim K100, 000 long go hetim ol wok bilong sapatim kempain long Bogenvil i mas fri long ol gan.

Aninit long Intenel Sekyuriti, ABG i katim 200,000 bilong karimaut na sapatim ol wok bilong daunim lo na oda hevi. Na tu, long wokim ol haus bilong ol polis manmeri.

Ol bin paitim moa toktok na tok oraitim baset aste.

## No Go Zon stap long baset bilong ABG

**OTONOMES** Bogenvil Gavman (ABG) i katim manimak inap long K375,000 long baset bilong em long kirapim bek ol helt na edukesen sevis long No Go Zon eria.

Dispela em ol eria i kam aninit long Me'ekamui Gavman na leit Francis Ona i bin go pas long em.

Baset bung bilong

ABG i bin tokaut long dispela samting.

Wantaim dispela K375, 000 we ABG i katim, ol bai karimaut ol wok mentenens long ol helt senta, ol etpos na kirapim bek helt sevis insait long ol No Go Zon eria.

Aninit long progrem bilong Nesenel Helt Sevis, Bogenvil i bin kisim K400, 000.

Fainens Minista Mathias Roman Salas i tok dispela bai sapatim helt divisen long strongim wok bilong Helt kea i go long ol progrem we bai givim bikpela tingting long ol wok na progrem i sut long komyniti na edukesen.

Long wankain taim tu, ol i katim K80, 000 i go long Edukesen long

kirapim wampela Task Fos we bai glasim level bilong edukesen na kamap wantaim plen long painim gutpela rot long kisim ol edukesen sevis long olgeta hap bilong Bogenvil.

ABG i katim K375, 000 long sanapim gren mani bilong sapatim ol skul insait long No Go Zon eria. Aninit long dispela baset, ol bai sanapim ol haus slip bilong ol sumatin long Bana Provinsel Hai skul.

Minista i tok ol nara-pela bikpela projek we mani ABG i katim long ol distrik em long ol helt progrem we i helpim ol pipel long lukautim ol yet na abrusim sik.



### Makim PNG

Noreen Makiki, Janet Manhi na Eugene Nawa em tripela yut ambaseda bilong Bogenvil long Wol Yu de bung long Koloune, Gemeni. Ol i memba bilong BCYA. Ol bin lusim PNG long dispela wik. Lukim stori long Pes 10

Poto: VERONICA HATUTASI

**South Pacific Tourism ORGANISATION**

**Namba 5 Balenuel Konfrons bilong ol Minista "Turisim: Invesmen bilong bihain taim bilong yumi"**

Ples: Holiday Inn Ballroom 17 - 18 Oktoba 2005

Ol lain husat bai toktok bai givim ol pepa long ol dispela samting:

De 1: Mande 17 Oktoba  
Sesen A: Invesmen - Dokta Harah Varma  
Sesen B: Ol Balus Kampani (Airlines) - Mista Andrew Drysdale  
Sesen C: Maketing - Mista Andrew Fairley

Bungim bilong kaikal bilong ol paitim tok long De namba 1

De 2: Tunde 18 Oktoba  
Sesen D: Sastanabol Turisim o turisim we i ken wok long taim - Dokta Steve Noakes  
Sesen E: Povet Rldaksen o daunim hevi bilong nogat gutpela sindaun - Dokta Trevor Sofield  
Sesen F: Intenelbol Herites o tumbuna pasin - Mista Mali Voi  
Sesen G: PNG Kee Stadi long Sastanabol Turisim - Mista Robert Igara

Bungim bilong kaikal bilong ol paitim tok long De namba 2

Domeslik Deleget Rejistresen Pepa

Nem/Ol nem	Nem bilong Kampani o opis
1.....	
2.....	Telepon:..... Feks: .....
3.....	Email:.....
4.....	Atres:.....

Yu wampela memba bilong PNGTIA?  
Makim bokis  Yes  No K50 wanwan manmeri (insait long de 1 na de 2)

Yu ken salim peimen bihainim Dairek Diposit i go long 5th South Pacific Tourism Conference Account No. (294) 10000 10553852 Bank South Pacific, Port Moresby. Feksim kopi bilong diposit wantaim registresen i go long PNGTIA Fax: 3200223 na putim nem bilong Jim o long TEC Fax: 3201995 na putim nem bilong Dorothy. Ol Memba bilong PNGTIA, sapos yu laik regista, pls ringim PNGTIA opis.

Sponsa i kam long:

**BIABIA** IGAT KIBUNG LONG LOLOATA AILAN NA BIABIA GO LONG DISPELA KIBUNG...

BIHAIN LONG KIBUNG, YUMI GO DAINLIKLIK, RAIT PLES YAH!!

YEH, GUD AIDIA!!

BIABIA, OL I TOK IGAT BIKPELA MALIO I STAP LONG HIA...

NAH! MALIO SAVE STAP LONG RAUN WARA, INO SOLWARA...

KSS... KSS...

NAH BIABIA DAIU I GO INSAIT NA SWIM RAUN I STAP, ARERE LONG STON TRAIPELA MAMA BILONG MALIO I KAM AUT NA SOIM TANG LONG BIABIA...

BIABIA EM BIKMAUS INSAIT LONG SOLWARA NA FLAI I KAMAUT TASOL NA TEK-OFF!!

MAALIOO!!

HAHA! HA! MI TING YU TOK MALIO BILONG RAUNWARA TASOL, NA WE?

# ENBP redi long kisim welpam

Steven Kadiko i raitim

**DEVELOP MEN** bilong welpam indastri long Is Nu Briten provins bai kamapim bikpela senis long laip na rot bilong kisim mani long planti manmeri long provins na moa yet, ol Baining pipel.

Deputi Gavana bilong Is Nu Briten Provins James Kapule na memba bilong Baining long Is Nu Briten Provinsel Asembli i tok.

Mista Kapule i tok welpam em i wanpela nupela kes krop we provins i tingting strong nau long kirapim na planti pipel i bel kirap long en. Tasol Mista Kapele i tok ol lida

bilong provins i mas givim moa edukesen aweanes o skol long ol pipel long gutpela na nogut bilong dispela developmen bikos em i nupela kain wok kamap na bai kamap namba wan taim long provins.

Wes Nu Briten i namba wan provins long kantri em i go het tru long bisnis bilong welpam. I no long taim i go pinis wanpela delegesen bilong Is Nu Briten gavman i bin raun i go mekim wanpela lukluk raun long Wes Nu Briten long stadim ol wok bilong welpam developmen.

Na Mista Kapele yet wantaim Provinsel Etministreta bilong Is Nu Briten Akuila Tubal i go pas long em.

Tupela susa provins em Is na Wes Nu Briten

i paitim toktok pinis long opim rot o haiwe namel long tupela provins long strongim wok bisnis namel long ol yet.

Mista Kapele i tok ol i wok long tingting long kirapim wanpela welpam Nuklius Estet long Mevolo na Open Be, tupela ples i sindaun long boda mak bilong Is na Wes Nu Briten provins.

Wok bung long dispela welpam wok developmen namel long ol papagraun, provinsel gavman na ol developa i wok long go het, tasol nau yet ol i no stretim pesen mak we olgeta tripela lain bai kisim long en.

Mista Kupele i tok i gat pepa o sabmisin em i redim pinis bai i go long PEC long tok oraitim na bihain i go

long provinsel asembli bilong givim las tok orait long em.

Tasol i gat ol liklik eria Deputi Gavana i tok ol i mas stretim pastaim.

Wanpela em long kastomeri graun o graun i sindaun bihainim pasin tumbuna we ol i mas stretim pastaim long wok i stat.

Long wankain taim tu, Mista Kapele i tokaut olsem Wail Dok Gol Eksploresen long Baining eria i soim gutpela mak na ol i bilip bai wok long dispela Gol Main bai stat klostu taim nau.

Mista Kapele i tok nau yet, i nogat opisel tokaut long dispela samting i kam long Dipatmen bilong Minerels na Eneji long Waigani.



## Kisim kalsa i go long Gabagaba

• OL manki Yauro i soim yet stail bilong ol Yauro long moa long 2,000 pipel i bin bung long ples Gabagaba insait long Sentrel provins bilong lukim opim bilong Nesenel Buk Wik long dispela wik Mande. Gavana Jenerel Sir Paulias Matane i bin opim.

Foto: VERONICA HATUTASI

## WNBP Etministresen holim ol stil woklain

Steven Kadiko i raitim

POLIS long Kimbe insait long Wes Nu Briten provins i stat long holim na lokim ol wok manmeri husat i stilim mani bilong pablik.

Dispela em ol lain i wok wantaim Provinsel Etministresen i paulim na stilim mani.

Provinsel Polis Komanda Superintenden Sylvester Euga i tok dispela eksasais i kamap bihain tasol long wanpela wok painimaut ol Frod Skwat yunit bilong Kimbe polis i bin mekim long Wes Nu Briten Provinsel Etministresen taim bikpela mak long mani bilong Wes Nu Briten provinsel gavman i bin lus.

Komanda Euga i tok planti ol sinia pablik seven long provinsel etministresen i stap insait long dispela stil

pasin. Nau yet, ol i holim pinis tupela sinia pablik seven we ol i bilip olsem ol bin stilim moa long K57,000. Planti long ol dispela stil pasin i bin kamap namel long yia 2000 na 2004.

Komanda Euga i tok dispela em i namba tu taim kain bikpela stil pasin i kamap long mani bilong Wes Nu Briten Provinsel Gavman. Dispela i soim olsem ol wok manmeri bilong gavman i no moa pret long kisim mani bilong gavman na yusim long laik bilong ol yet.

Em i tok dispela mani em bilong pipel we ol i ken yusim long mekim ol wok kamap.

Em i tok moa olsem ol polis bai go het long mekim ol wok painim na holim pasim olgeta woklain long Etministresen husat i stap insait long dispela stil pasin.

## Nu Ailan kisim tok lukaut long strongpela win

TOK lukaut i go long ol pipel bilong Nu Ailan provins long lukaut gut o noken go long solwara long dispela wik bikos i gat bikpela solwara na win i wok long kamap we i ken kamapim birua.

Ekting Provinsel Etministreta bilong Nu Ailan David Silachot i wokim dispela singaut bihainim stia tok bilong Provinsel Imejensi Disasta opis long Kavieng we i givim tok lukaut olsem bikpela solwara bai kamap long ol de i kam. Na pipel i ken bungim taim nogut

na birua sapos ol i ron long kanu, motobot na sip long solwara.

Mista Silachot i tok planti hap bilong Nu Ailan i wok long kisim taim long ol strongpela win we strong bilong ol i stap namel long 15-20 not.

Na dispela i strongpela tru na i ken kamapim birua long ol lain i ron long solwara.

Mista Silachot i tok ol papa bilong ol bot i mas was gut na kisim ol laip seving samting sapos ol i laik ron long sip o bot.

Em i tok rekot bilong

Nu Ailan long ol pipel i lus long solwara long ol yia i go pinis i no gutpela bikos sampela pipel i dai pinis long birua we bikpela solwara na win i kamapim taim ol i ron long solwara.

Em i tok tu olsem ol pasindia i noken fosim ol papa bilong ol bot bikos em i no gutpela taim long mekim ron long solwara wantaim dispela kain weda.

Em i apil long ol pipel long yusim tingting bilong ol long abrusim birua long solwara.



## - PABLIK TOKSAVE -

### YUSIM NEIM BILONG HABITAT FOR HUMANITY LONG GIAMAN NA KISIM MONI NA KAGO

Mipela painim aut pinis olsem igat sampela man/meri o grup i usim giaman I.D kad na ol arapela pepa bilong opis long pulim bilip bilong ol manmeri, komuniti, ol bisnis haus na ol gavaman opis long kisim moni, kago, na ol arapela sevis.

Habitat for Humanity Sepik Afiliat Intarim Bod wantaim Nesenel Opis bilong Habitat for Humanity Papua Niugini i laik toksave long pablik insait long East Sepik na Sandaun provins olsem Habitat for Humanity Papua Niugini i kirapim tupela piksa projek (pilot project) insait long Sepik rijen. Tupela projek wantaim ikirap long East Sepik provins:

- 1) Apangai Biding Komuniti long Maprik Distrik na.
- 2) Nindibari Biding Komuniti long Yangoru-Saussia District.

Habitat ino givim tok orait long wanpela man/meri, o grup, o arapela ogenaisesen insait long tupela piksa projek eria na insait long Sepik rijen long wokim wok makim Habitat for Humanity.

Olsem na mipela ilaik toksave igo long olgeta manmeri, ol bisnis haus na gavaman opis na ol arapela grup insait long East Sepik na Sandaun provins long lukaut gut long ol kain giaman man/meri o grup olsem. Habitat for Humanity Papua Niugini na Sepik Afiliat Intarim Bod bai no inap kisim tok sapos ol giaman olsem i bungim yu.

Mipela askim ol manmeri na pablik long kontektim Humen Risos Opisa long Nesenel Opis long dispela adres: Habitat for Humanity-PNG, P.O Box 3804, Lae, Morobe Provins: o ring long telepon namba- 472 0113, 472 1270 o salim fax- 472 3513 na kisim klia toksave sapos ol kain giaman/meri o grup olsem i wok wantaim yu.

Habitat for Humanity (PNG) Inc em i wanpela ekumenikel, Kristen, self help, housing program. Habitat for Humanity (PNG) Inc na Habitat for Humanity Intanesenel Inc, i wok poroman long dispela Kristen ogenaisesen long wokim gutpela na strongpela haus kos i daunbilu tru.

Habitat for Humanity (PNG) Inc, i wok poroman wantaim ol grass ruts manmeri long kirapim ol housing projek mipela kolim "Biding Komuniti". Habitat i bihainim dispela rot long wok wantaim ol lain husat i givim helpim na ol voluntia na ol haus papa long wokim haus bilong ol femeli i sot long gutpela haus. Ol wok bilong "Biding Komuniti" em: risos mobilaisesen, makim femeli long kisim haus, wokim haus, na lukautim na ronim wok.

#### Tok Orait:

BENSON NABLU  
Siaman  
Nesenol Bod Darekta

RAYMOND KAMANABI  
Siaman  
Sepik Afiliat Intarim Bod

PETRUS MARTIN  
Program Tim Lida  
HFH-PNG Nesenel Opis

MIPELA POROMAN NA WOKIM STRONGPELA HAUS WANTAIM OL MANMERI BILONG GOD

# Lukautim mani bilong Is Sepik provinsel gavman i no stret

Michael Novingu i raitim

"I TRU mi brukim Pablik Sevis Ekt long mekim wok bilong mi long bringim sevis i go long ol pipel bilong Is Sepik provins. Tasol mi no paulim mani na putim long poket bilong mi."

Dispela em toktok bilong Is Sepik etministreta we ol i saspenim em long wok. Em i tok olsem em i bin givim presa long provinsel tresera Haru Yahamani long raitim wanpela sek mani mak bilong em

inap long K600,000 i kamaut long akaun bilong Sepik Haiwe tras akaun long peim Telikom PNG long sanapim ripita stesin long Maunten Turu insait long Yangoru distrik.

Em i tokaut tu olsem em i bin givim presa long Mista yahaman long givim em tupeal sek moni, mak bilong ol inap long K100,000 long peim tupela Wewak taun papagraun.

Na mani mak olsem K700,000 ol i kisim long stretim ol rot long

Wewak taun nesanel gavman i givim pinis na i redi long karimaut ol wok bilong stretim Wewak taun.

"Aninit long Pablik Fainens Ekt, Sekretri bilong Fainens tasol i gat tok orait long rausim mani long akaun bilong Sepik haiwe tras akaun. I nogat arapela man i ken tok orait," Mista Yahamani i tok.

Em i tok moa olsem Mista Yaninen wantaim sampela sinia provinsel opisa i putim presa long em long rausim mani, mak bilong em olsem K600,000 long peim

PNG Telikom na tupela sek mani inap long K50,000 i go long peim ol Yarapos papagraun long mun Me long dispela yia.

Ripot Wantok Niuspepa i kisim long Wewak i tok bihain long wankain taim Mista Yaninen i tokim Mista Yahamani long raitim pas i to long Is Sepik Gavana Mista Waranakna na salim i go tu long Nesanel Plening Minista Arthur Somare we i askim em long bekim bek mani inap long K100,000.

Long wankain taim Mista

yahamani i tokim em long mekim moni i redi long gavana long peim ol Wewak papagraun.

Dispela taim yet, Mista Yaninen i tok strong long em i laikim K600,000 long peim PNG Telikom.

Nau yet Mista Yaninen i nogat wok na i tokaut olsem sapos i gat hevi long dispela mani bai em i rausim hevi we i save olsem dispela K100,000 peimen i go long Yarapos papagraun i no gutpela na i brukim lo bilong Fainens Menesmen Ekt.

## Katim diwai bagarapim Usino Bundi

Michael Novingu i raitim

PASIN bilong laik long mekim moni hariap i lukim ol bus, graun na diwai insait long Usino sab distrik long Madang provins i bagarap pinis.

Dispela em toktok bilong Presiden bilong Usino Lokol Level Gavman Kaunsil Fred Mallupa taim em i lukim wanpela kampani long Lae i katim ol kwita diwai long Usino distrik.

Ol dispela kwita diwai we moni mak bilong em olsem K1500 long wanpela kubik mita ol i

katim long moni mak olsem K20 tasol long wanpela as bilong kwita diwai.

Mista Mallupa i singaut long ol Usino pipel long stopim dispela wok na tingting gut na skelim pastaim long ol i givim diwai bilong ol long dispela kampani long Lae long katim.

"Yupela i bagarapim ol bus, graun na ol diwai long liklik moni long sotpela taim tasol. Yupela i no tingim bihain taim bilong ol pikinini bilong yupela. Dispela ol diwai ol i katim na salim i go ovasis ol i mekim bikpela moni, na

yupela ol i peim yupela long liklik moni tasol," Mista Mallupa i tok.

Em i tok moa olsem i tru ol i laikim sevis olsem rot i go insait long ples bilong ol. Tasol i gat gutpela rot bilong kamapim wok long karim ol sevis i go long ol pipel na i no long bihainim sot kat rot.

Mista Mallupa i laikim bai ol papagraun i mas bung wantaim em long glasim dispela tok orait o agrimen we ol i sainim pinis wantaim dispela kampani long lukluk na glasim gut pastaim bihain long wok i kirap gen.



• Mambu na Garamut Festival i strong yet



• Planti manmeri long Is Sepik i laik soim kalsa bilong ol.

## Pairap bilong mambu na garamut

Stori na Foto: Joe Roszynski

OLGETA yia Mambu na Garamut Festival long Wewak i save bungim planti kalsa grup na olgeta manmeri i save laikim kalsa bilong yumi PNG.

Olsem na wankain plen i stap long kamapim dispela wankain so long de 2 na 3 bilong mun Septemba long amamas long kalsa na kantri bilong yumi.

Tasol komiti i go pas long dispela samting i bungim hevi.

Mista Martin Masarum husat ol i makim olsem siaman bilong dispela komiti bilong Mambu na Garamut festival i tok: "Mi bungim bikpela hevi long ogenaism dispela samting bikos i nogat wok bung namel long Nesanel Kalsarel Komisnin na Provinsel Kalsarel Opis. Dispela samting i mekim na mipela i no kisim yet mani bilong redim dispela festival. Planti grup i gat bikpela laik long kam tasol mi wari nau. Planti kalsa grup i laik putim singsing bilong ol

tasol hevi bilong mani bai i mekim hat long dispela. Samting. Sapos ol i givim mani sapos hariap mipela bai o go het na mekim dispela samting i kamap gutpela tru. Planti pipel i amamas long independens aniversari olsem na ol i laik kamap wantaim singsing bilong ol" "Kalsa i gat bikpela mining long laip bilong yumi na tu ol samting i save lus hariap tumas olsem na mipela i laik strongim pasin bilong lukautim kalsa," Mista Masarum i tok.



BANK OF PAPUA NEW GUINEA

### PRESS RELEASE

## KINA FACILITY RATE FOR AUGUST 2005

The public is advised that based on the assessment of the key macroeconomic indicators available to the Bank of Papua New Guinea, the Kina Facility Rate (KFR) will remained unchanged at 7.00 percent for the month of August 2005.

**L Wilson Kamit, CBE**  
Governor



# Hauslain danis i save kam gut tru

James Kila i raitim

**DANIS o disko insait long hauslain o bus ples long kantri save kam gut tru. Sampela stail yu no save lukim bipo i pulap na kapsait stret long ol hauslain.**

Mi save raun long planti ol bus ples insait long Hailans rijen long wok bilong mi olsem midia liesin opisa bilong Kopi Industri Koporesin (CIC) na mi save stap na lukim planti ol kain kain pasin bilong bus laip long planti ples tru.

Wanpela samting mi lukim em i save mekim mi amamas na lap planti taim em kain pasin na stail bilong danis long ol bus ples na hauslain.

Tru tumas ol dispela lain long ol bus ples i gat kain kain stail tru bilong danis na saksakim bodi bilong ol i go kam na bihainim stret pairap bilong musik.

Sampela bilong ol dispela danis yu lukim bai yu ting em snek i sakim sakim bodi bilong o wan-

pela sikau i kalap kalap. Tasol nogat ya. Em stail bilong "Hauslain Disko" stret ya.

Maski traipela san i hot, ol dispela lain yangpela bilong ol bus ples hauslain i no save wari. Taim ol i kisim filings long apim sampela botol bia, tru tumas olgeta stail bilong ol i save pinis na pinis olgeta.

Long tupela wik i go pinis mi bin raun i go long wanpela ples ol i kolim Kenemote long Henganofi distrik long lsten Hailans long mekim ripot bilong wanpela ruel agrikalsa mini spais so. Taim mi stap long hap mi lukim stret kain stail danis bilong ol lain manmeri bilong hauslain. Ol i givim stret danis taim musik bilong wanpela nupela grup bilong Madang em Traffic Jam i bin pilai.

Ol dispela lain em i stail lain tru bilong soim ol nupela stail long sekim sekim bodi bilong ol i go daun olgeta long graun na i kam antap na go sait sait na raun raun

na ating sapos yu nupela man ating yu bai ting olsem em ol robot o masin i mekim ol kain eksen we i spit moa.

Wanpela taim mi bin raun i go olsem long Okapa distrik na slip long wanpela liklik ples Moke we i stap arere tasol long Okapa distrik stesin. Long dispela taim wanpela olpela musik poro bilong mi David Saun, husat em wanpela top musik man bilong kantri long sait bilong pilaim seksofon tu i bin go long hap bilong ol pipel bilong Moke hauslain i bin askim em long go long pilai musik long hap.

Long nait taim ol yangpela i askim David long pilaim musik. Maski olsem bagaros ya i tait pinis, em i no wari em i go het na pilaim musik long ol dispela yangpela manmeri bilong hauslain.

Oloman, long nait taim ples i tudak tru, ol dispela yangpela manmeri no wari. Ol i painim paiawut na wokim bikpela paia na David Saun i hamarim musik



• Ol manmeri danis olsem ol masin o robot.

bilong em long wanpela lain em i kam long jenereta bilong kamapim pawa.


Long dispela taim tu mi lukim kain stail danis bilong ol yangpela bilong Okapa o ol lain long hap yet i save kolim "OK5" i bin kam gut tru.

Ol yangpela meri i putim ol 6-poket trausis na bikpela ol jesi na i no isi long givim samsam. Tru tumas ol dispela lain i no westim wanpela musik. Ol i givim tasol i go.

Yes, long PNG ating sapos ol i laik skelim ol sampela nupela na gutpela stail danis orait ol i mas tingting long go raun long ol haus lain o bus ples na lukim pastaim. Ol dispela lain long ples i save kam gut tru wantaim ol stail danis bilong ol long kirapim filings bilong ol yet tu ya.

Musik na danis em samting tru bilong givim gutpela filings na mekim ol manmeri danis i save rausim ol hevi long skin taim ol i sekim sekim bodi bilong ol i go kam.

## Enga man statim amamas klab long Mosbi



• Ben Wia - driman i ken karim kaikai long hat wok tasol. Foto: ANDREW MOLEN

Paulus Tali i raitim

BAKSAIT long ol gutpela na bikpela nius i save gat planti ol arapela kain stori.

Wanpela long ol gutpela nius em long kamap bilong Klab 22 long Gordons, long Pot Mosbi siti.

Klab 22 i no kamap nating, em i bihainim longpela rot na kamap wantaim hatwok.

Ben Wia bilong Wabag, Enga provins i statim Klab 22 bihain long em i bungim ol botol aninit ain rufing depo.

Em i stat bungim ol botol long yia 2002. Bihain long dispela em i kisim inap manj we em i surukim graun na haus na mekim i go bikpela.

Long 2003 em i stat long sanapim haus inap 2004 we em i pinisim. Las mun, Julai 15 em i opim dispela haus.

Nau yet planti manmeri save go long dispela klab long kisim malolo na amamas.

Dispela i soim gutpela piksa we man i hatwok na bihainim stretpela rot long kamapim wanem samting em i laik long mekim.

Long mekim bisnis o kamapim samting long stretpela rot i nogat sot kat long ol.

Klab 22 i soim olsem wantaim strongpela tingting man i ken kamapim wanem samting em i laik mekim o i laik kamap long em.

Long taim bilong lonsing, Gavana bilong Enga Peter Ipatas i kamap na i tok, "Mi amamas long man Enga i

go het long bisnis hia long siti, yu husat bilong Enga man o meri i ken kam na sapatim dispela klab.

Wia i no bihainim isipela rot long kamapim dispela bisnis bilong em: Em i kisim klostu tenpela yia olgeta long sanapim kain haus olsem inap em i kamap bikpela.

"Yumi PNG i mas noken givim sans long ol Esia na ol manmeri bilong narapela kantri long mekim bisnis long kantri bilong yumi," Gavana Ipatas i tok.

Dispela klab nau i gat ples bilong pilai snuka, pilai pokis, holim ol danis na dring bia.

Long liklik hap spes bilong taka sop ples nau i op na bikpela moa we i winim mak bilong wanpela basketbol kot.

Long Klab 22, Wia i gat 30 wok manmeri na nau ol i wok i stap long klab.

## Kagua Erave no kisim sevis

WANPELA kaunsol memba bilong Aiya Lokol Level Gavman Kaunsol long Kagua distrik long Sauten Hailans i gat bikpela bel kros wantaim provinsel gavman i no luktuk long Kagua-Erave LLG.

Dominic Ekape, Kaunsol bilong wod wan insait long Kagua distrik inap long 5-pela krismas i tokaut strong olsem ples bilong em i nogat senis i kamap na hevi nau i lukim em i olsem Sauten Hailans provinsel gavman i yusim nating ol lain long ples na givim mani long ol lain we ol i no wokman bilong provinsel gavman.

Dominic i tok dispela pasin i no stret.

"Long dispela kain sistem tasol na yumi wok long bagarapim lo bilong gavman na yumi bihainim wansait plen na korapsen pasin i wok long stap na bagrapim

nating ol arapela," em i tok. Mista Ekape i tok moa olsem em kaunsol longpela taim tasol ol pipel bilong em i no kisim sevis o developmen i kam inap nau.

"Lida bilong provins i no luktuk tumas long olgeta hap bilong SHP.

"Mi olsem kaunsol mi tok stret, long Kagua, sapos yu lukim wan wan eria, i nogat gutpela rot mentenens, haus sik, edukesen program na sampela moa we mi no inap kolim," Mista Ekape i tok.

"Long dispela mipela Kagua, stap yet baksait tru we i nogat sevis, developmen na pasin tumbuna em pasin we mipela i holim i stap yet.

Olsem na mipela ol pipel bilong Kagua, tingim tasol kain pasin nau mipela i karim i stap," em i tok.

Paulus Tali i raitim



# DELTA

DAIHATSU Powered by Toyota Diesel Engine

WIDE CAB 3 TONNE LWB CARGO TRUCK

**K69,990\***  
Drive Away!



Ela Motors  
**TRUCKS**

WE PROVIDE ✓ SALES ✓ SERVICE ✓ FINANCE ✓ LEASE PACKAGES

Contact : Jim Maxwell : Ph 3229400 or Email : jmxwell@elamotors.com.pg

\*Conditions Apply

EM6944

# Long taim pablik seven i dai



**LONGPELA SEVIS:**  
• Mista Leke taim em i kisim BEM las yia.

Andrew Moien i raitim

I NO olgeta bai save long em tasol wok na sevis em i givim long kantri i bikpela tru.

Em i no wanpela bikman olsem minista, bisnisman o mani man tasol sevis bilong em long kantri i mekim em i bikman long we bilong em yet.

Mista Sepa Leke em i wanpela long taim pablik seven husat i lusim laip bilong em las wik na nau bai ol i planim bodi bilong em.

Leit Mista Leke i bin wok inap 49 krismas wantaim dipatmen bilong Helt na em i bin wok yet taim em i lusim laip bilong em las wik long haus bilong em long sik sotwin.

Las yia em i kisim Britis Empaia Medol (BEM) long bonde bilong kwin.

Mista Leke husat papa bilong em bilong Kairuku na mama bilong Hanuabada na Daru i statim wok bilong em olsem helt opisa long 1956 taim

wanpela dokta Todd i kisim em long Sogeri nesanel hai skul na givim em medikel trening long "Ela Beach" haus sik long Pot Mosbi.

Long 1957 em i go long Malaria kontrol skul long Minj insait long Westen Hailans provins bihain long hap taim em i kamap Malaria kontrol opisa em i go long Maprik, Sepik distrik long dispela taim.

Taim em i stap long Maprik, em i bin yusim maikroskop long katim natnat na rausim wara bilong en we i save kamapim sik. Bihain long em i rausim wara bilong ol natnat, em i save glasim na skul long en.

I gat billip olsem Mista Leke i bin namba wan PNG man long mekim dispela kain wok long ol natnat.

Long 1960 em i kamap wanpela oksileri divisen opisa bilong gavman bilong Australia na em i kisim setifiket pepa long Sir Paul Hasluck husat i bin gavana jenerel bilong Australia long dispela taim.

Wok bilong Mista Leke i kisim em i go raun long planti hap bilong kantri we em i save skul long blut bilong ol pipel na givim marasin.

Long mun Novemba, 1999 em i kamap olsem TB/DOTS kodineta bilong NCD na em i holim dispela wok inap em i pasim ai bilong em las wik Trinde.



## INDEPENDENT CONSUMER AND COMPETITION COMMISSION

# PABLIK NOTIS

### ICCC i statim wok rivi long ol PMV na Teksi Pe

Indipenden Konsuma na Kompetisen Komis (ICCC) i laik toksave long ol manmeri bilong pablik, ol lain husat i save yusim na givim ol rot trenspot sevis, ol gavman ejensi na ol arapela bikpela stekholda olsem wanpela pablik rivi o wok glasim long ol pe bilong PMV na Teksi sevis insait long NCD na kantri i stat pinis.

Komisin i go pas long skelim na makim ol PMV na Teksi pe, tasol makim bilong ol sevis i kam aninit long lukaut bilong Dipatmen bilong Trenspot. Pastaim long mun Epril 2004, Nesanel Len Trenspot Bod (NLTB) aninit long pawa i kam long ICCC i bin makim ol prais bilong ol dispela trenspot sevis. Tasol dispela pawa nau i kam bek long ICCC.

Nau Komis i laik kisim tingting bilong jenerel pablik, ol konsuma na ol bikpela stekholda sapos ol pe bilong PMV na tekxi bai i mas bihainim prais regulesen, na sapos em i mas bihainim, bai em i bihainim wanem kain regulesen stret. Komis i laik kisim tingting long sait bilong resis insait long maket, wok i go het bilong ol sevis, mak bilong tok agensim ol sevis, na ol strong bilong ol lain i yusim dispela sevis. Sapos Komis i laik sanapim sampela kain rot bilong makim ol prais, Komis i laik kisim wanem rot bilong bihainim, sapos ol i mas kontrolim o skelim prais na wanem kain prais bai ol i makim.

Ol rot trenspot sevis i bikpela tru long laip bilong planti Papua Niugini manmeri, na mak bilong ol pe bilong ol PMV na Teksi sevis na kwolati bilong sevis i kam long ol PMV na Teksi opereta em i bikpela samting long ol manmeri bilong pablik.

Dispela wok rivi bai kamap bihainim tingting bilong Dipatmen bilong Trenspot long painim ol arapela kain pablik trenspot bilong NCD na kantri.

Long helpim long mekim ol dispela disisen o tingting, Komis i laikim ol sabmisin i kam long olgeta lain husat i laik givim tingting long dispela samting bihain long mipela i putim aut Isius Pepa long namba 18 de bilong mun Julai.

Wok bung bilong jenerel pablik, ol lain i yusim sevis na ol stekholda insait long rivi wok bai helpim Komis long makim namba wan gutpela rot we i ken karim wankain kaikai long ol lain i yusim sevis na ol lain i givim sevis.

Ol taim bilong dispela wok rivi i go olsem:

Isius Pepa i go aut	18 Julai 2005
Kisim ol sabmisin long Isius Pepa	18 Julai - 19 Ogas 2005
Draf Ripot i go aut	30 Septemba 2005
Kisim ol sabmisin long Draf Ripot	30 Septemba - 31 Oktoba 2005
Fainel Ripot i go aut	30 Novemba 2005

Sapos yu laikim kopi bilong Isius Pepa long ol PMV na Teksi pe rivi, yu ken kisim long ICCC Het Opis, Level 1, Garden City opis, Boroko. Yu ken ringim Mista Taunao Vai, Eksekutiv Menesa Prais na Regulatori Afes Divisin long telepon: 325 2144 o email long em long tvai@iccc.gov.pg

Tok orait i kam long:



THOMAS ABE  
Komisina na CEO

## FIRE PROOF FILING CABINETS & SAFES



Top Price - Top Range

See Our Sales Team

**THEODIST LTD**

THE STATIONERY SUPERMARKET

Port Moresby (Waigani Drive) Lae (Milfordhaven Rd)  
Tel: 325 6500 Tel: 472 5488  
Fax: 325 6302 Fax: 472 7838





# Raun lukluk long ol meri na pikinini



Helpim na promotim PNG long Japan.  
 ¥ Ol meri helpim na promotim PNG. Merewalesi Maue em misis bilong PNG Ambaseda bilong PNG long Japan, Yogi Barampataz (namel) em meri bilong Diplomet Steven Barampataz wantaim wanpela pren-meri long fanresing basa long Tokyo bilong helpim PNG.



¥ Ol meri Japan i no isi long baim ol samting long basa long Tokyo, Japan. Taim ol man i wok long PNG Hai Komisina long Japan, ol meri bilong ol i no sindaun nating, nogat. Ol i wok long reim mani na promotim PNG.



¥ Prinsipel bilong Jubili Katolik Sekonderi skul long Pot Mosbi, Bernadette Ove wantaim narapela wok-meri bilong skul yet i toktok wantaim Bruder Allen long ol samting i sut long edukesen bilong ol sumatin. Foto: NICKY BERNARD



Sampela ol Luteran Sios mama bilong Papua Distrik i bung long wanpela wik konferens bilong ol long Marimari, Gordons insait long Nesenel Kapitel Distrik. Foto: ANDREW MOLEN.

# Meri bilong diplomat helpim PNG

Veronica Hatutasi i raitim

TAIM ol man i mekim wok i stap long makim PNG ovasis long ol Embasi opis, ol meri bilong ol i save mekim wok tu long promotim PNG long rot bilong ol yet.

Embasi opis long Japan i gat liklik lain i lukautim long em.

Merewalesi Maue em meri bilong PNG Hai Komisina long Japan em Ambaseda Michael Maue wantaim Yogi Barampataz em meri bilong Kaunsela na Diplomet Steven Barampataz i no save stap nating long haus taim ol man bilong ol i wok, nogat.

Ol i go insait long asosiesen bilong ol meri bilong ol diplomat na ol i save promotim ol kantri we ol i kam long en. Tu, ol i save resim mani na ol arapela samting bilong helpim wantaim ol hevi i kamap bek long ol asples kantri bilong ol.

Wantok i bin bungim Misis Barampataz long Pot Mosbi we em bin kam long mekim sampela wok long stretim ol wok redi bilong 30 independen aniveseri bilong PNG we ol bai go pas long en long Tokyo, bik siti bilong Japan.

"Olsem hap bilong namba 30 independens selebresen, bai mipela i putim kamap ol samting insait long wanpela wik long promotim PNG, amamas wantaim ol poroman bilong PNG na tu, resim mani long ol wok bilong mipela we mipela i save givim helpim gen i kam long taim bilong hevi na ol arapela projek mipela i sapatim long em.

Ol dispela projek i sut long sapatim ol meri long PNG," Misis Barampataz i tok.

Stat long namba wan wik bilong Septemba, ol bai gat ol progrem we ol i plen pinis long em. Tripela bikpela em long PNG Independens Golf Sariti resis bai kamap long Septemba 10, Independen selebresen long Ekspo eria long Nagabute na Independens selebresen wantaim PNG Japan Frensi Asosiesen long Septemba 20.

Em i namba tri yia bilong Misis Barampataz na famili bilong em long Japan. Wankain tu long



¥Yogi Barampataz

Ambaseda Maue na famili bilong em.

Long dispela yia, Misis Barampataz na famili bilong em i bin bungim na salim moa long 60 katen klos i kam long ol Manam Ailan pipel we maunten paia i bagarapim ples bilong ol na nau ol i stap long Bogia kea senta.

I no ol klos tasol. Ol i bin baim na salim tu ol pensil na buk samting bilong ol skul pikinini.

"Mi luksave long helpim bilong Bikpela na mipela i bin salim ol samting i kam fri. Haakyu Trak deliveri sevis i bin salim ol trak na kisim kontena bilong ol klos samting i go fri long sip. Na Kyowa Siping kampani i bin larim kontena fri i kam olgeta long PNG," Misis Barampataz i tok.

Wanpela grup we PNG Embasi Asosiesen long Japan Ledis em Misis Maue na Barampataz i save helpim long PNG em skul bilong ol yangpela meri.

Ol i save salim mani i kam long PNG Profesenel Bisnis Wimens Asosiesen we i save sponsaim ol sumatin meri i bungim hevi long skul fi long hai, Sekonderi na teteri skul.

Ol yangpela meri i save aplai long skolasip na sapos ol inapim ol rikwaiamen, ol i save kisim sponsa fanding. Na hap mani we PNG Embasi long Japan i salim i save helpim ol gut tru.

Misis Barampataz i tok maski ol i liklik lain long Embasi, em i amamas long gutpela sapat we ol poroman i save givim long helpim wantaim ol fan resing na wok bilong promotim na maketim PNG long Japan.

# Ol Kainantu mama singautim helpim long Sios

James Kila i raitim

OL MERI long Kainantu insait long Isten Hailans provins husat i save bungim planti hevi long han bilong ol bikhet man i mekim bikpela singaut long ol sios na kristen manmeri long provins long beten strong long daunim dispela ol hevi ol i save bungim.

Wanpela mausmeri

bilong ol sios mama long Kainantu, Lote Lauri i mekim dispela toktok taim olgeta mama insait long Kainantu taun i bin kamapim wanpela protes mas long givim petisen bilong ol i go long Intenel Sekyuriti Minista, Bire Kimisopa wantaim Polis Komisina, Sam Inguba bihain long planti hevi ol mama long Kainantu

i save bungim long han bilong ol raskol.

Ms Lauri i tok olsem PNG em i kristen kantri tasol kain pasin ol pikinini man i save mekim long ol meri na ol mama long Kainantu em pasin nogut tru na wankain olsem pasin bilong ol animel stret.

"Mi singaut long ol kristen sios, long Kainantu long helpim long kamapim sampela

kain rot long luksave long ol dispela hevi. Na traime bringim ol yangpela wantaim na toktok long gutpela sindaun insait long kristen laip long komyuniti," Ms Lauri i tok.

Em i tok olsem ol raskol man long Kainantu i no save gat rispek long ol mama na ol yangpela meri. Ol i save hensapim ol long gan taim ol i go raun

long maket o stua na stilim ol samting bilong ol na tu karim ol meri i go na bagarapim ol.

"Mipela i haitim mipela longpela taim olsem na mipela i laik kamaut na tokim PNG olsem mipela ol mama bilong Kainantu i gat bikpela hevi tru na gavman i mas luksave long dispela na helpim mipela," Ms Lauri i tok.

## Lo bilong Lukautim ol Meri



### Lo bilong Lukautim ol Meri

OL meri i gat bikpela wok long lukautim gut helt bilong ol famili bilong ol. Tasol planti taim ol i no save lukautim gut ol yet. Ol meri i mas kisim gutpela helr kea. Ol manmeri husat i save givim dispela helt kea i mas lukluk gut long ol meri na harim toktok bilong ol taim ol i go long kisim marasin i narapela helt kea. Olgeta meri i mas tokaut long wanem samting ol i laik mekim insait long laip bilong ol bai ol i gat gutpela sindaun oltaim.

- Ol meri i gat rait long kisim gutpela helt kea tru.
- Ol meri i gat rait long luksave na bosim bodi bilong ol yet.
- Ol meri i gat rait long malolo.
- Ol meri i gat rait long mekim hamas pikinini ol i laik karim.

## Sotpela Tok Lukaut

OL manmeri i gat binatang bilong sik AIDS i ken gat tingting long planti samting.

Ol i save gat hop olsem ol i ken stap longpela taim.

Ol saientis i ken painim marasin bilong oraitim dispela sik.

Ol Dokta i ken tritim sik we ol i bungim long em. Ol i laikim ol, maski ol i gat sik nogut ya.

Ol i gat hop bikos ol i bilip i gat narapela laip bihain long dai.

Em i bikpela samting long gat hop bikos em i givm strong long bungim ol kain hevi i kamap.

Hop i ken helpim ol manmeri i gat sik AIDS long stap longpela taim moa.

Tingim, sapos yu gat hop tude, em i nomol long gat belkros long tumora. Bikpela samting em yu mas gat hop na noken larim dispela i dai.

Ol toktok i kam long buk, Living with HIV/AIDS.



Kuk Kona wantaim MERI WANTOK

## Banana Loaf

Yu mas i Gat:

- 1-pela kap bata
- 1-pela kap suga
- 2-pela kiau yu brukim na tanim gut.
- 2-pela bikpela mau banana yu papaitim na i go malumalum
- 2-pela tebolspun milk
- 2-pela kap self resing flaua
- Hap tispun sol

We long Kukim:

- 1-Miksin bata na suga
- 2- Miksim ol ingridien o ol samting antap yu redim pinis long yusim long kuk bilong yu.
- 3-Grisim beking trei na bekim louf long oven we hotpela bilong em inap long 300 digris F inap long wanpela awa.

**TOKTOK NATING Wantaim Er. Paul Liwun SVD**



**LONG** yia 1995, mi bin stap peris pris long Mang peris insait long Kandep Distrik long Enga Provins. Long dispela yia (1995), ol Katolik manmeri i bin amamasim 50 krismas Katolik sios i stap long Enga Provins, Wabag Daiosis. Dispela selebren i bin stat long mun Epril long Pompabus peris na i pinis long mun Ogas long Par peris.

Ol manmeri i bin wokabaut o prosesio wantaim Buk Baibel long wanpela peris i go long narapela peris. Ol i bin stat long Pompabus peris, em i namba wan ples ol misineri bilong Divine Word i bin kamap na statim wok misin long em.

Ol i bin putim Buk Baibel i stap insait long wanpela naispela bokis, ol i kolim "Bokis Kontrak" long tingim Moses i bin putim tupela ston i gat 10-pela mandato bilong God i stap long en. Taim wanpela peris i kisim Baibel, ol i wokim prosesio i go long wan wan autstesen o komyuniti. Baibel bai stap wanpela wik long wan wan peris. Taim Baibel i stap long komyuniti bilong ol, bai i gat kain kain samting long mekim. Ol i gat Baibel sering, skul bilong Baibel, onarim Baibel, sampela i bin blesim marit bilong ol long dispela taim Baibel na narapela spirituel ektivitis moa.

Sampela lain i save pait longpela taim pinis na long dispela taim ol i sekan aninit long Buk Baibel na promis olsem ol bai i no inap long pait gen. Ol bai kamap wanbel na stap gut olsem brata na susa. Na i gat bikpela mumu. Wan wan peris i save wokim mumu long givim ol manmeri i save wokabaut bihainim Buk Baibel.

Long dispela taim mi bin lukim planti manmeri i bin mekim kain kain komitmen na promis bilong ol, na sampela i bin bihainim Buk Baibel i go long olgeta 16-pela peris bilong Wabag Daiosis. Ol i wokabaut bihainim lek mak bilong ol misineri i bin go long wan wan peris bipo.

Taim BUK BAIBEL i kamap long wanpela peris, planti manmeri na pikinini i save lusim wok, lusim haus na sampela skul save pasim skul (holide) na olgeta sumatin i mas go na tok welkam long Buk Baibel. Long wanpela peris, taim Baibel i kamap, ol i bin i gat wanpela daiman i stap. Tasol olgeta i bin lusim daiman i stap long em yet, olgeta i go long welkamim Buk Baibel, na bihain ol i go bek na planim dispela daiman.

I gat kain kain singsing tumbuna long wan wan peris long welkamim Buk Baibel, i gat tok welkam na tok amamas bilong bikman bilong peris/komyuniti long welkamim Buk Baibel na Tok bilong God. Manmeri i save amamas tru.

Planti hap i gat rot nogut, ol i save klinim gras na stretim rot gut tru long mekim redi BUK BAIBEL i kamap long ples bilong ol.

Taim wanpela peris i lusim Buk Baibel i go long narapela peris, i gat singsing amamas tu. Tasol planti i save singsing sori na planti save krai bikos Buk Baibel i lusim ol na i go long narapela peris. Sapos peris i lusim Buk Baibel i krai sori, peris i kisim Buk Baibel i singsing amamas bikos Buk Baibel, Tok Bilong God, nau i kamap long ples bilong ol na stap wantaim ol.

Tenpela yia i go pinis dispela selebren i bin kamap. Na sevenpela yia i go pinis mi bin lusim Enga na wok long Pot Mosbi. Taim mi lukim gen dispela selebren long video, mi bin askim mi yet, "gutpela taim, amamas, bel isi, sekan wantaim birua, promis long noken pait", nau em i stap strong o nogat?

# Bogenvil yut go long Jemeni bung

Veronica Hatutasi i raitim

**TRIPELA** yut bilong Bogenvil yut bai makim Katolik Daiosis long ailan na Otonomes Bogenvil rijen na tu kantri insait long Wol Yut De bung long kantri Jemeni (Germany).

Bung bai stat long Ogas 15 na pinis long de namba 21 na bai kamap long Koloune, wanpela biktaun long Jemeni na asples bilong hetman bilong Katolik Sios long wol, Pop Benedict 16.

Nem bilong tripela yangpela em Noreen Makiki husat em lida bilong grup, Janet Manhi na Eugene Nawa. Bogenvil Katolik Daiosis i bin glasim na kisim ol long makim maus bilong ol yut long ailan. Tripela ya i hap tasol long wanpela 14 memba yut delegesen bilong PNG i go long dispela bikpela yut bung we planti tausen yut long olgeta hap bilong wol bai stap long em. Katolik Bisops Konferens i

salim 5-pela yut long Pot Mosbi Adaiosis, Daru Kiunga i salim 4-pela, Pontifikel Misin Sosaiti i salim 2-pela na Bogenvil em tripela.

Jenerel Seketeri bilong Katolik Bisops Konferens bilong PNG na Solomon Ailan Lawrence Stevens i tok dispela bikpela bung i no sut long ol Katolik yut bilong wol tasol ol arapela Kristen na yut husat i gat laik i save go insait long em..

Bung i save kamap long olgeta tripela yia na em i save toktok long ol samting we i sut long laip na sindaun bilong ol yut, ol wari na hevi ol i bungim, ol gutpela wok go het long ol progrem bilong ol na tu, rot long traimit stretim ol hevi na wari.

Het tok bilong konferens em "We are seeking Jesus" o Mipela i painim Jisas.

Pop Benedict 16 bai toktok long ol planti tausen yut long bung long namba wan wokabaut em i mekim ausait long Rom bihain long em i kamap



**L-R: Pater Victor Nanaha em Bogenvil daiosis Yut Kodineta i sanap wantaim Janet Manhi, Noreen Makiki em grup lida na Eugene Nawa Page i sanap wantaim flek, kep na singilis bilong Bogenvil Otonomes Rijen. Tripela i amamas long makim Bogenvil na PNG. Foto: NICKY BERNARD**

Pop long mun Epril long dispela yia.

Tripela yangpela bilong Bogenvil i tok em i namba wan taim bilong ol long lusim ailan na PNG na go long ovasis tasol ol i amamas long makim ol yut long ailan na tu, Otonomes Bogenvil Rijen.

"Mi bin kirap nogut taim mi harim olsem ol i kisim mi long go long bikpela wol yut bung tasol mi amamas long kisim dispela sans long makim ol yut bilong Bogenvil Daiosis. Bai mi kisim ol gutpela tingting na ol samting long bung na go hetim long yut ministri long Bogenvil Daiosis."

Noreen bilong Hahon long Wes Kos Bogenvil i tok.

Long wankain taim, Pater Victor Nanaha husat i Yut Kodineta bilong Bogenvil Daiosis i tok tripela yut ya i go pas bikos ol i go long spesel askim bilong ol Katolik yut long Jemeni na ol Jemen misinari na ol pren husat i bin wok long Bogenvil long ol yia i go pinis.

Pater Herman Woester husat i bin wok planti yia long Bogenvil na i stap tu long dispela Wol Yut De Kongres komiti i stretim ol wokabaut bilong tripela long wanpela, mun stap bilong ol long Gemeni.

## Man Australia tanim Baibel long tok ples Buang

Paulus Tali i raitim

**BAIBEL** trensesen o tanim tok insait long Buk Baibel em i no isipela wok.

Em gat hat wok bilong em. Moa yet i no inap man nating i tanim.

Ol manmeri husat i bilip tru tru long God wantaim i ken tanim. Dispela i go wantaim Spirit bilong God. I min olsem yu mas man o meri bilong bilip long mekim kain wok olsem.

Wanpela man Australia, Bruce Hooley na meri bilong em Joyce bilong kantri Kanada we tupela i wok bipo long Sama Institut ov Linguistik, Ukarumpa Isten Hailans provins i bin wok olsem ol trenseta o lain bilong tanim tok bilong Baibel long Institut tasol nau ol i wok wantaim Baibel Trensesen Asosiesen.

Hooley wantaim meri bilong em tanim tok long Baibel long tokples Mapos long Buang, Morobe provins long 1959. Tupela i bin tanim tok long planti yia na tru tumas God i blesim ol na wok bilong tupela i karim kaikai. Planti manmeri husat i kam painim God bai inap long ritim tok bilong God long tok ples bilong ol yet.

Long 1978 tupela wantaim ol pipel bilong Buang i bin



**Man i tanim baibel long tok ples Buang-Bruce Hooley.**

dediketim nupela testaman long tok ples Mapos.

Ol pipel long Buang save lukim Hooley na Joyce olsem tupela i bilong Buang stret bikos long pasin tupela i soim na long stap bilong tupela wantaim ol pipel bilong as ples.

Tupela i gat tripela pikinini na ol tumbuna tu. Long 2003, Joyce i dai we i lukim Hooley i sori long em tasol dispela i no mekim em i lusim dispela wok bilong em.

Em i wok yet inap em i marit gen. Dispela taim em i maritim Joan.

Joan i no nupela meri. Em i wok wantaim BTA long longpela taim na olsem Hooley i save long em.

Na olsem em i isi long Hooley i askim em long maritim em. Tupela i marit long 2005.

## Yunaitet Sios selebretim Haves De

Paulus Tali i raitim

**PRAIM** Minista Sir Michael Somare taim em i tok amamas long wok we ol sios i mekim, i bin givim K2,200.00 i go long Not Waigani Yunaitet Sios long go hetim ministri bilong helpim ol trangu lain.

Dispela em long las wik taim Yunaitet Sios long Not Waigani i bin gat bikpela selebren long amamasim "Harvet Day".

Long dispela de, ol Kristen i kam long olgeta grup na bungim ol kaikai we ol i kisim long namba wan haves bilong ol long gaden bilong givim i go long ol trangu lain

olsem ol sik manmeri long haus sik, ol kalabus lain na ol narapela trangu grup long komyuniti. Moa long 800 Yunaitet Sios memba i bin bung wantaim na wokim lotu, putim ol kalsere el danis na singsing na kaikai long amamasim dispela de.

Ol polis ben tu i bin kamap na amamasim dispela spesel de na ol pkiinini bilong Kiriwina Ailan tu kamap na putim ol naispela singsing tumbuna na danis long amamasim dispela bikpela de.

Eitpela grup i bin bungim wantaim ol kaikai bilong givim i go long ol trangu lain em long Moru Galp, Masel

Lagun, Motu Kairuku, Miks grup, Keapara Oleana, Hula, Saroa, Gabagaba na Milen Be.

Wanpela man husat go pas long lukautim kaikai samting na tilim, em John Elian i tok dispela Harvest De progrem i save kamap long olgeta yia.

Em i tok dispela em namba 5 yia progrem i kamap na ol Yunaitet Sios memba i amamas long kain bikos em i helpim ol lain olsem long haus kalabus, hausik, ol sios wok man, meri we i em as tru bilong dispela progrem.

## Papua Distrik Luteran yut kisim singaut

**SINGAUT** i go long ol yut long givim taim long God bilong helpim ol kamap ol gutpela manmeri long komyuniti na kantri.

Evanjelis Mogio Wemin i bin tokim 150 yut bilong Papua Distrik Luteran Sios husat i bin kamap long wanpela wik bung bilong ol long Towamo, Waigani insait long Nesenel Kapitel Distrik.

Ol yut i bin kam long NCD, Alotau na Popondeta we Papua Distrik i karamapim long en.

Evanjelis Wemin i bin tokim ol Luteran yut long givim taim

bilong ol i go long Papa long wanem wok ol i mekim long em

Em i tok moa olsem sapos ol Kristen i mekim pasin em kristen tru long ai bilong God na noken tingim tumas laik na tingting bilong dispela graun, ol bai save long Kraiss gut insait long laip bilong ol.

Long wankain taim tu, em bin tok strong long ol yut long helpim ol narapela wan lain bilong ol bikos ol yut em ol bai kamap olsem ol lida bilong bihain taim. Na sapos ol yut bilong tude i no kisim gutpela stia, kantri bai bagarap.

Paulus Tali raitim



### "LO BILONG GOD EM I STREPELA TRU"

Yu yet yu bin wokim mi, na yu save was gut long mi. Yu givim tingting long mi inap lainim gut olgeta lo bilong yu. Ol manmeri i save pret long yu bai ol i lukim mi na amamas, long wanem, mi bilip long promis bilong yu. Bikpela, mi save olgeta lo bilong yu i stret tasol, na yu givim hevi long mi. Yu promis pinis bai yu laikim mi oltaim na bai yu strongim bel bilong mi, wokman bilong yu. Orait nau mi laik yu mekim olsem. Yu ken sori long mi nau, na bai mi kisim laip, long wanem, mi laikim tru lo bilong yu. Ol bikhetman i save tok giaman na kotim mi nating. Mekim ol i sem tru long dispela pasin bilong ol. Tasol mi, bai mi tingting oltaim long olgeta lo bilong yu. Wanem ol man i save long lo bilong yu, ol i ken kam long mi. Helpim mi long bihainim tru olgeta lo bilong yu, na bai mi no ken sem long pasin bilong mi. **BUK SONG 119: 73-80**

Glasm Tok  
wantaim  
Bisop Peter Fox



## Islam i min olsem pis o bel isi

OL Muslim lotu pipel i no laik wokim trabel na ol i laik stap isi. Nem bilong lotu bilong ol, Islam, i min olsem Pis o sindaun gut. Planti Muslim pipel i laik stap gut na bihainim stretpela pasin. Ol i no teroris. Ol i no lain bilong kilim man.

Long ol ples olsem London, ol Muslim pipel i stap gut wantaim ol Kristen na ol arapela. Ol pikinini bilong ol i save go skul wantaim ol Kristen, Judaman na ol arapela pikinini bilong ol lain i no gat lotu. Ol i mas kirap nogut tru, olsem ol arapela gutpela pipel, long ol teroris atek i no long taim i kamap long London. London em i ples bilong ol. Ol Muslim i bin karimaut teroris atek? Sapos em i tru, em ol nogut Muslim husat i wokim asua long totu na pipel bilong ol.

Taim ol teroris atek i kamap, em i kamapim bel nogut na birua namel long ol Muslim i laik stap gut na ol non Muslim o ol neiba bilong ol arapela lotu. Long globel level we i karamapim PNG, sapos yumi larim samting we ol teroris i wokim long posinim wok pren namel long yumi na ol gutpela Muslim i bihainim lo, bai ol teroris i tok ol i win. Ol i laikim bai yumi pait namel long wanpela arapela. Ol i laikim bai ol demokratik sosaiti i pondaun na pasin bilong heitim o biruaim narapela i gro strong long ol. Sapos ol i mekim yumi i bruk na yumi i birua, ol bai bosim yumi.

PNG i stap longwe long London we ol teroris bom i pairap na ol pait pasin, tasol yumi ken wokim samting long kamapim pis o gutpela sindaun. Sapos yumi save long sampela Muslim lain, i moabeta long toktok nau wantaim ol na kamapim pis na wok pren. Yumi ken daunim ol teroris taim yumi wok bung wantaim ol Muslim pren long bildim kain sosaiti we bai yumi luksave long wanpela narapela na helpim wanpela narapela.

Olsem Bisop mi laik toktok long ol Kristen brata na susa bilong mi. Yumi save long yumi yet olsem ol lain i kolim ol yet Kristen i save wokim sampela samting i nogut stret. Yumi inap tingim ol lain i kolim ol yet Katolik na ol protesten long Noten Ailen i wokim ol nogut samting stret namel long wanpela narapela. Ol trupela KatoOlik na Protesten i bin save olsem samting ol i wokim i no bihainim pasin Kristen. Em i rong tru olsem samting ol IRA na ol Yunienis i wokim olsem trmoim ol bom na kilim dai ol narapela i no stret. Na ol lain i save kolim Jisas em i Bikman bilong ol. "Samting ol i wokim i egensim Kristen pasin," yumi bin tok, "tasol wanem tok ol i mekim."

Ol Muslim i pilim olsem. "Dispela kain birua i egensim Muslim lotu," ol i tok. "Ol dispela teroris i go egensim bilip bilong ol Muslim lotu." Yumi ol Kristen inap luksave long dispela. Kristen i noken mas lukluk nogut long narapela man i no wokim rong bikos bilip long lotu bilong em i narakain long bilong ol. Em i taim nau long ol bikpela lotu long wol i wok bung wantaim long stopim ol man i wokim birua na kamapim jastis na gutpela sindaun long olgeta pikinini bilong God.

Long ol Muslim hia long PNG, mi laik tok olsem tru, ol dispela teroris pasin i wok long kamap i no asua bilong yupela, nogat. Mipela i save olsem dispela i no ol samting yupela i bilip long en. Mipela i sori olsem lotu bilong yupela i karim nem nogut long samting we liklik pipia lain i wokim. Plis, yumi go het na wok bung wantaim long gutpela sindaun i ken stap wantaim long yumi. Sala'am eleikim

# Papua Distrik Luteran mama kisim salens

Paulus Tali i raitim

OL LUTERAN sios meri long Papua Distrik i bin kisim salens long wok strong long sios na famili bilong ol.

Long wankain taim tu, singaut i go long ol yangpela meri husat i stap nating long go insait long wok bilong ol mama.

Wanpela meri i salensim ol mama long sanap strong long wok bilong ol na noken tubel long sios wok bilong ol.

Meri i go pas long Girl Gaid, Enny Moaitz i bin kamap long wanpela wan wik konfrens bilong ol Luteran mama long Nesenel Kapitel Distrik na i tro-moim dispela salens i go long ol meri.

"Mi salensim yupela ol mama long sanap strong long wok bilong yupela na noken tubel long wok bilong bikpela," Misis Moaitz i tokim klostu 200 meri i bin kam long ol Papua Distrik Luteran Sios na sindaun long dispela bung.

Minista bilong Komyuniti Dvelopmen Dame Carol Kidu i tok amamas long wok we ol mama i wokim na em i singaut long ol yangpela meri husat i stap nating long bung wantaim ol mama long karimaut wok bilong sios.

"I no wok bilong yupela tasol ol mama. Ol yangpela meri tu i stap nating i mas joinim ol mama na karimaut wok bilong sios," Dame Carol i tok.

Ol mama i kam long wan wan Luteran kongriksen insait long Nesenel Kapitel Distrik na ausait olsem Tabubil na tu Popondeta Luteran Seket we i bin kamap long bung long namba wan taim.



• Gutwan long lukim sampela yangpela meri long Papua Distrik Luteran sios meri bung. Foto: ANDREW MOLEN

Ol mama i bin baim rot bilong ol yet na kam long dispela bung long toktok long ol wok i karamapim ol long famili, sios na komyuniti.

Het tok bilong konfrens i stap long John sapta 15 Ves 5b we i tok, "Mi makim yu long go na karim kaikai bilong wok. Meri pas long Jisas em save karim gutpela kaikai bilong wok."

Baibel Skul Masta em bipo Papua Distrik Bisop Anonga Pininga i tokim ol meri long sanap strong tu long wok bilong ol long sios.

Em i tok Papa God em i as bilong diwai na ol meri i mas pas tru long rop bilong diwai na mekim wok misin wantaim

wanbel long em i karim gutpela kaikai.

Long wankain taim tu, em i tok long buk Baibel, Matyu 13.19 i tok yumi wan wan noken haitim gutpela pasin o kaikai i kam long wok bilong yumi. Tasol yumi mas go mekim na strong long karim gutpela kai kai i mas kamap we papa bilong gaden bai amamas long en.

Long pinis bilong konfrens, ol mama i kam long ol wan wan kongriksen i bin givim bel gut mani long strongim baset bilong Papua Luteran Distrik.

Popondeta i bin putim K700, Tabubil tu i putim K700 na K200 projek mani. 8 Mail Kalvari Sios K800, Koki Pisin

kongriksen K500, Koki Inglis K700 na Papihok K500. Sampela bai putim bilong ol bihain.

Ol mama i bin toktok tu long ol projek na ol arapela bikpela wok long Gutnius na ol arapela sevis ol i save karimaut long en.

Evanjelikel Luteran sios long Papua distrik i gat 9-pela kongriksen long NCD na 5-pela wok misin ples olsem Kerema, Popondeta, Tabubil, Alotou na Cape Rodney.

Long konfrens tu ileksen i bin kamap na ol mama bilong wan wan kongriksen i laikim tru tenis i mas kamap. Ol i bin makim ol nupela Eksekutiv bilong ol.

## Bisop bilong Kerema agensim gumi kempein

KEMPEIN bilong promotim kondom i no inap long daunim HIV/AIDS hevi, tasol em bai mekim moa yangpela pipel i wokim nating na mak bilong sik nogut ya bai go antap.

Bisop bilong Kerema Katolik Daiosis Paul Marx MSC i wokim dispela toktok long nupela kempein bilong Nesenel AIDS Kaunsil we i strongim pipel long yusim gumi olsem rot bilong daunim HIV/AIDS. Ol bin lonsim kempein ol i kolim long "No condom, no sex" o nogat gumi, nogat seks o noken slip wantaim arapela.

Bisop Paul i tok dispela hap tok we Nesenel AIDS

Kaunsil i yusim long kempein bilong em i no stret na em i givim kranksi toksave long pablik.

"Hap tok, 'Nogat gumi, nogat seks' i givim kranksi tingting olsem pasin bilong wokim nabaut em i stretpela rot bilong laip.

Tilim ol gumi bai mekim pasin bilong wokim nabaut i go bikpela na dispela em as bilong HIV/AIDS i go antap," Bisop Paul i tok.

Em i tok i moabeta long NAC i strongim ol yangpela long stap gut bihainim gutpela pasin na pas long wanpela patna tasol. Na long strongim ol yangpela long noken slip wantaim arapela inap long ol i marit.

Bisop Paul i tok pait agensim HIV/AIDS bai no inap long win sapos ol manmeri i yusim gumi.

Em i tok bikpela samting em long ol manmeri i senisim pasin.

Kempein we NAC i bin lonsim las wik Fraide i sut long ol yangpela pipel namel long 15 na 29 kris-mas.

Ol fokus grup em long ol pamuk meri i save salim ol yet long kisim mani, ol man i save wokim pasin nogut wantaim narapela man, ol man i save stap longwe longpela taim long famili bilong ol na ol lain long ol setelmen na ol lain pikinini na yangpela we ol papa-mama i dai pinis.

## Adal literesi em i bikpela samting

LUKSAVE i kamap olsem planti grasrut pipel i no save long rit na rait em i as long gutpela developmen ol integrel humen developmen i no kamap insait long Nu Ailan provins.

Ol meri bilong Nu Ailan i bin autim dispela wari.

Olsem na Provinsel Wimens Ekumenikel Kaunsil we i autim dispela wari i laikim bai ol i kirapim Adal Literesi program insait long sios netwok bilong ol.

Bihainim dispela, wanpela trening woksop bilong ol trena i bin kamap long Peter ToRot Konfrens senta long Kavieng.

26 pipel i makim ol wan wan sios olsem Katolik, Yunaitet, Luteran, Seven de Etventis, Asembli ov God na Saut Si Etventis Sios i bin sindaun long tupela wik trening kos bilong Adal Literesi program.

As tingting bilong kos em long givim ol lain i sindaun long em save na ol bai kamap olsem ol Adal Literesi skul trena.

Long ol lain i bin sindaun long kos, 21 em ol mama na ol yangpela meri. Faivpela man i bin makim Katolik, Luteran na SDA Sios.

Ol lain bilong ol wan wan sios i bin sindaun long trening kos bai go bek long ol sios na komyuniti bilong ol na karimaut ol literesi program na long dispela rot, helpim ol manmeri i lainim save long rit na rait. Na ol i ken kamapim gut laip na sindaun bilong ol.

Adalt Literesi program em i bikpela samting long pipel bikos em i opim save bilong ol long ol rait long kisim save, fridom long toktok na ol bai save tu sapos sampela lain i bagarapim rait bilong ol.



Nesenel Buk Wik Lonsing - Gabagaba, Sentral Provins - Ol stori na polo: Veronica Hatutasi

# Nius Bilong HIV AIDS

wantaim David Ephraim



LONG harim na save long ol wantok bilong yu, yu mas save long tok ples bilong em o bilong yu we bai yu tupela bai klia long wanem samting yu tutpela toktok long en.

Taim i kam long HIV/AIDS aweanes, planti ol save manmeri i tok olsem taim manmeri i kisim infomesen long tokples bilong ol yet nau bai ol i klia long nogut na rot HIV/AIDS i save ron long en.

Insait long kantri bilong yumi i gat moa long 800 tok ples i stap wantaim kain kalsa.

Yes, tasol wanpela wok painimaut we UNESCO i bin wokim i tok olsem planti tok ples olsem i wok long dai olsem long 350 milien pipel, 5,000 tokples na kalsa insait long 70 kantri long olgeta hap graun i wok long kisim dispela bagarap long ol tok ples bilong ol i dai hariap tru.

Wanpela samting we i wokim ol tokples i dai hariap em ol foren invesmen insait long kantri long kirapim developmen.

Dispela em i gutpela long ikonomi bilong kantri tasol ol pipel i lusim kalsa bilong ol. Long PNG yumi gat bikpela asua long menesim gut ol kalsa bilong yumi.

I tru yumi gat Kalsarel Komisin tasol nau yet i gat planti mekap o kopi kalsa na i no tumbuna kalsa tru tru. Long bringim sevis na developmen, Gavman mas traim kamapim rot bilong risevim o protektim ol tokples tru long strongim tok ples skul polisi bilong Edukesen Dipatmen.

Nau yet planti aweanes i kamap long nogut bilong HIV/AIDS tasol olsem husat save long rit na rait tasol i save gut na ol lain nogat i kisim bikpela bagarap.

Planti taim yumi save harim olsem HIV em bilong ol taun lain em wanpela giaman tok olsem ol lain long ples i no save slip wantaim ol narapela patna bilong ol. HIV/AIDS stap pinis. Tokples na kalsa i dai isi isi. Bai yumi wokim wanem?

### Tok Lukaut

OL bus bilong yumi i wok long kisim bikpela bagarap long han bilong yumi yet.

Nau yet ol bikpela indastriol kantri i kisim bikpela bagarap olsem sik na i dai long ol kemikol we wok long bagarapim bus na manmeri wantaim.

Insait long kantri bilong yumi dispela em i no bikpela tumas tasol wanpela samting we em i ken bagarapim bus bilong yumi em populesen o namba bilong ol manmeri bilong yumi.

Nau yet populesen bilong yumi wok long groa moa yet na Gavman i painim hat moa long lukautim wantaim liklik risos em i gat.

Olsem lukim long taim yu laik go long beng na tu kisim bas i go long wok. Yes na tu yumi ol pipel i save bagarapim bus taim yumi save tromoi rabis nabaut.

Kolim ol samting we i save bagarapim environmen, mi bringim dispela tok piksa long yu long traim tingting na lukautim envaromen nau bikos olsem long bihain yia 2010 olsem bai yu lukim planti kain kain hevi bai kam.

Nau yet Gavman i no tingting long dispela ol wok long pait nambaut long posisen na ol i no tingting long strongim rot bilong kamapim planti risos o sevis bilong inapim 5.3 milien manmeri long PNG. Nau yet HIV/AIDS i kam insait pinis.

# Rit na rait i bikpela samting

## ...PNG i gat bikpela wok yet

PRAIORITI o bikpela wok PNG i gat em long strongim ol pipel bilong em bai ol i save long rit na rait.

Long wankain taim tu, gavman i mas makim moa mani long edukesen.

Na rit na rait na laibreri em ol bikpela samting long kamapim na go hetim gutpela wok developmen bilong pipel na kantri.

Dispela em ol toktok i bin kamap strong long lonsing o opim bilong Nesenel Buk Wik long dispela wik long ples Gabagaba insait long Sentral provins.

Gavana Jenerel Sir Paulias Matane i bin lonsim Nesenel Buk Wik long namba wan taim ausait long Mosbi. Inap long 28 krismas, Nesenel Edukesen Dipatmen i bin luksave long Nesenel Buk Wik na makim insait long skul kalenda bilong em olgeta yia.

Long wankain taim tu, Sir Paulias i strongim toktok olsem laibreri em i wanpela bikpela samting bikos em i stoa haus bilong ol buk we i helpim kamapim developmen bilong wan wan manmeri na kantri tu. Tasol ol atoriti long nesenel, provinsal na komyu-

niti level i mas helpim long givim gutpela sapot wantaim mani bilong baim ol nupela buk na ol pipel i ken kisim gutpela sevis, Sir Paulias i tok.

Het tok bilong Nesenel Buk Wik long dispela yia em "Laibreri na Literesi: Promotim Skul bilong Laip bilong Olgeta".

Sir Paulias i tok strong olsem infomesen em i bikpela samting na em i wanpela rait we i strongim demokresi, fridom na daunim pasin bilong nogat gutpela sindaun.

Em i tok bikpela mak long ol kantri we i wok long develop i no save long rit na rait na ol i no kisim ol gutpela samting na developmen we ol strongpela kantri we klostu olgeta pipel i save long rit na rait i kisim long en.

Bikos hap long ol pipel bilong PNG i no save long rit na rait, Sir Paulias i bin tok bikpela wok kantri i mas mekim em long skulim ol pipel long rit na rait.

Long wankain taim tu, Sir Paulias i bin tok ol strongpela kantri i save tromoim bikpela mani long mak bilong 5.8 pesen long sapotim edukesen taim ol liklik kantri i tromoim

tasol 3.8 pesen. Na em i tok sapos ol liklik kantri no apim mak long mani bilong sapotim edukesen long baset bilong ol, ol bai stap bihain long olgeta wok developmen insait long komyuniti, ikonomi, humen developmen na ol arapela eria.

Long wankain taim, Masta ov Seremonis long lons, Pasto Galewa Kwaraa bilong ples Gabagaba yet husat i wanpela bipo Palamen memba bilong Rigo/Abau i tok strong tu olsem ol buk na ol laibreri i bikpela samting na het tok i mekim klia.

Em i tok ol buk i mekim man i kamap saveman long planti samting na em bin askim ol papamama long helpim ol pikinini taim ol i liklik yet long gat intres long rit.

Sir Paulias i tok ol i karim Nesenel Buk Wik i go olgeta long ples bikos planti moa manmeri i stap long ples na long planti taim, ol bikpela samting i wok long kamap long taun tasol taim 85 pesen long populesen long ol bus ples i nogat.

Na ol bin makim Gabagaba bikos em i kirapim bikpela wok



Gavana Jenerel Sir Paulias Matane i katim ribon long makim lons bilong Nesenel Bukwik (NBW) insait long seremoni long ples Gabagaba, Sentral provins. Wanpela sumatin meri bilong Gabagaba Praimeri skul i holim logo o sainmak i karim het tok bilong Nesenel Buk Wik. Siaman bilong NBW Komiti long dispela yia, Geoffrey Bundu i sanap long baksait.



Pes bilong ol skul pikinini bilong Gabagaba Praimeri skul i soim amamas bilong ol long ol Buk Wik selebresen i kamap long skul na ples bilong ol. Ol i sindaun isi na harim ol toktok bilong ol bikman i stap.

developmen bilong edukesen, politiks, holim ol bikpela wok kantri na moa yet, sios na sivil sevis we long gavman em ol long sait bilong planti ol bikman i as ples Gabagaba.

# Rit planti na save moa

OL SKUL sumatin i bin kisim strongpela toktok long rit moa long skul na bihain long ol i lusim skul bikos long dispela rot tasol bai ol i skruim save na mekim gut long skul.

Pala Wari, wanpela bikman long Edukesen i bin makim Edukesen Dipatmen na

Ekting Sekretri husat i no bin kamap long opim bilong Nesenel Buk Wik

long ples Gabagaba.

Em i tok ol manmeri na pikinini i save long rit na rait i stap wanpela step moa antap na em bai isi long ol i painim wok. Tu, em bai save long ritim Tok bilong God long Buk Baibel.

"Rit, rit na rit moa gen. Bihain long skul, skruim rit i go. Kisim bikpela tingting na amamas long rit. Lainim samting bai i no inap go gut sapos yu no rit. Save i stap

insait long ol buk. Yu no inap long go longwe tasol yu kisim buk na rit long kisim save," Mista Pala i bin tokim ol sumatin na pipel husat kamap long lukim opim bilong Nesenel Buk Wik long ples na skul bilong ol Gabagaba pipel.

Mista Pala i tok ol papamama i gat wok long lukim olsem skul bilong ol pikinini i go het wantaim sapot bilong ol.

Em i tok tru, televisen, redio na ol kain nupela komyunikesen teknoloji i stap tasol ol buk i bikpela na gutpela rot long kisim save long en na kamapim gutpela taim bihain.

"Ol buk na save long rit na rait i sapotim long kamapim gutpela manmeri husat bai i mekim wok, luksave long wanpela narapela na stap gut wantaim ol yet, olsem i stap long Mama Lo."

# Ol laibreri laikim helpim

SINGAUT i go long Edukesen Dipatmen, Nesenel Gavman na ol atoriti long sapotim ol skul na pablik laibreri insait long kantri.

Gavana Jenerel Sir Paulias Matane i mekim dispela toktok na i tok bikpela samting em long kisim dona fanding o helpim mani i kam long ol ausait lain bilong baim buk na ol arapela wok long laibreri. Dispela em bikos nau, planti laibreri long kantri i no kisim gutpela sapot na planti pas pinis.

Bipo taim kantri i no kisim independens, i bin gat 26 pablik laibreri tasol bihain long 30 krismas, 9-pela tasol i stap. Ol tu i wok long painim hat long stap op. "Ol laibreri i gat bikpela wok long lukautim rait bilong pablik long infomesen. Kisim gutpela infomesen i save kamapim gutpela pesenel na nesenel developmen.

"Sot long mani long baim ol buk na ol arapela samting ol i nidim long laibreri em bikpela hevi we i pasim ol skul na pablik laibreri long kantri long go hetim gut wok bilong ol. Narapela samting em long PNG em, i nogat luksave long strong bilong ol buk na ol laibreri long kamapim gutpela edukesen o skul," Sir Paulias i tok.

Em i tok dispela ol hevi mas klia long inapim dri-man bilong givim gutpela edukesen long ol pikinini. Long wankain taim, bos bilong Nesenel Laibreri Daniel Paraide i tok sapos mipela i laikim gutpela edukesen, i mas gat gutpela laibreri.

Em i tok gavman na ol atoriti i no givim gutpela sapot long laibreri sevis na i moabeta long lukluk long dispela eria na givim mani sapot na helpim.

Em i tok taim ol sumatin i rit, ol i kisim save hariap na ol i lainim ol samting hariap.



Ol Mis PNG modul o? Nogat ya, dispela em ol sumatin meri bilong Gabagaba praimeri skul i modul wantaim ol feveret karakta bilong ol we ol bin soim aut long opim bilong NBW.



Salim ol pas i kam long WANTOK NUSPEPA: P.O. Box 1982, Boroko N.C.D 111 Fax: 325 2579 Email: word@global.net.pg

Nem bilong bilip man i stap pinis long buk

Dia Edita MI LAIK bekim pas bilong Sarum Kesi, Badili - NCD i bin kamap long Julai 13, 2005.

Kesi mi ritim pas bilong yu taim yu sapotim Tilini na sampela tingting i no kamap klia long pas bilong yu taim mi ritim.

Olsem na bai mi traim bekim. Mi bai rait na tok olsem, nem bilong mi i stap pinis long laip buk long heven na bilip bilong mi i sanap antap long tok bilong God long Rev 20: 15 na Luk 10:20.

Taim yu ritim edita pas bilong mi, yu mas kisim rong tingting olsem mi litimapim nem na bel nogut long narapela kristen brata. Bikos mi bin tok long nem bilong mi i stap pinis long laip buk bilong God long heven.

Dispela tasol i givim rong tingting long yu na yu kalap i go antap long narapela maunten topic Baibel ves we i no pas o poroman wantaim.

Nem bilong bilip man i stap long buk bilong laip, Mt 23:12 na Jam 3: 14-16. Pas bilong mi, mi raitim testimony bilong mi, mi i no litimapim mi na bel nogut long narapela kristen brata olsem yu tok. Nogat ya.

Tru tru bilip bilong mi tok na nem bilong i stap pinis long buk bilong laip.

Sapos yu ting dispela em i kranki, mi ken tokim yu olsem kranki o i nogat bilip bilong yu yet na nem bilong yu i no istap long laip buk.

Na God bai tromoim olgeta manmeri nem i no stap long laip buk bilong God long Heven, Rev 20:15. God i save raitim nem bilong olgeta manmeri husat i bilip long Kraiss tasol.

Het bilong diwai Mathew sapta 23:12 yu raitim, na yu i no lukim as bilong diwai Mathew sapta 23:2 na 5-7.

Krais i no tok long bilip man olsem mi, em i tok long ol Parasis na skraibs, ol i no laik daunim ol yet na bilip long Kraiss na tu ol i no laik larim God i litimapim ol.

Baibel riding bilong yu em i stret tasol Baibel tok klia bilong yu, em ol i kolim natural. 1 Kor 2:14

Yu sekim laip bilong yu wantaim 2 Kor 13:5 bipo long idai painim yu, o Kraiss bai kam bilong kisim mipela ol bilip manmeri i go. Yu fri long bekim pas bilong mi.

PETER KELO KAINANTU ISTEN HAILANS PROVINS

Bihainim lo bilong God tasol

Dia Edita MI LAIK bekim pas bilong wanpela brata i agensim pas bilong Ronnie Kengi, Mendi - SHP long 30/06/05. Em putim het tok - Em i hat long bihainim Tenpela Lo.

Brata, em i hat long yu bihainim tok bilong God o tok bilong man? Jisas i tok wanem long tok bilong God na rot i go long God? Lukim Matyu 7:14, 18:3, 19:24, 21:42, Luk 18:17,27.

Brata yu noken ting sabat de em bilong Israel tasol. Nogat. Dispela de luk klia i kam stret God yet staitim long Gaden Iden na i kam long Israel na i kam long Jisas na i kam long Aposel na yumi.

Aposel 16:12-13, 18:4 na planti moa i tok long jentail i kipim sabat na Mak 2:27 i no tok sabat i wokim long Israel tasol, nogat ya. Sabat em bilong man, em min olgeta manmeri bilong graun. Asaia 56:6-8 na Ex 20:10 na planti moa i tok 'Stranger within the gate' tu mas kipim

sabat, em i min ausait lain long Israel tu mas kipim sabat i kam long tingting spirit bilong God bilong yumi olgeta. Brata yu save, hau na ol sios lida long bipo i oposison long Jisas?

Bikos ol i het paul olsem yu long haphap lo bilong ol Israel yet wokim long sapotim Tenpela Lo bilong God. Jisas i helpim hangre man na kisim kaikai na kaikai wantaim na em i go insait long haus lotu na em helpim na oraitim sik bilong narapela long holi sabat de, em i no sin o brukim dispela Tenpela Lo ya. Oi brata, ol giaman lo bilong ol man, long haitim piksa tru bilong holi sabat dei, na em mekim klia holi pasin long laikim God na laikim narapela long holi sabat de. Lukim Matyu 15:1-13, Kolosi 2:1-23 na skelim lo bilong God na lo bilong man na mekim wei bilong yu.

PETER TILINI LAE MOROBE PROVINS

Yu nogat rait long kisim laip

Dia Edita MIPELA pipel bilong PNG i bin harim olsem planti Enga manmeri na pikinini dai long Hagen. Dispela kain namba bilong planti manmeri na pikinini dai olsem i no gutpela tru.

God yet i givim laip na God yet tasol bai pinisim laip na i no man bai sotim laip.

Dispela hevi i no liklik na em i bikpela namba tumas. Laip i lus, hau ol i dai na hamaspela manmeri na pikinini tru i dai namba i no kamap ples klia yet.

Mipela olgeta manmeri long PNG laik harim na klia gut long dispela.

Mama Lo bilong kantri bilong yumi em i stap. I nogat wanpela man o lain em i gat orait long i go na sotim laip bilong planti ol lain manmeri nating olsem.

Lo bilong God tu em i tok klia na man i kilim arapela man i dai em tu i mas i dai.

Lo bilong kantri tu ol i pasim pinis olsem man i kilim narapela man em tu i mas i dai.

Dispela hevi em i kamap long WHP na ol lida bilong WHP yet i mas

wok bung na kamap wantaim sampela gutpela tingting na stretim na Enga lida tu mas toktok na stretim dispela bikpela hevi i bin kamap long WHP.

Trangu ol famili na lain bilong ol i dai i sindaun wantaim wari na bikpela sori i stap yet.

Na ol lain husat i kilim ol trangu ya ol i amamas na i

stap olsem ol i no mekim wanpela rong.

Sapos sampela long ol dispela lain i stap long han bilong polis, ol i mas mekimsave long ol na ol tu i mas i dai.

NI IBIRAH HOWA HELLA IGIRI ENGA PROVINS



Toksave: Sampela ol pas mipela i kisim i longpela tumas na i no givim spes long ol arapela pas, plis raitim pas liklik. Na tu putim nem na adres bilong yu long olgeta pas yu salim i kam, tenkyu. - Edita

Kondom stap na pasin pamuk i go het

Dia Edita

MI LAIK sapotim toktok bilong brata Dickson Papol long HIV/AIDS awenes. Tru mi no wanbel long HIV/AIDS komiti long tokaut long ol kain kain kondom.

Oi manmeri i no pret bikos ol save olsem kondom stap. Na tu yupela mas save olsem kondom em ol wokim long fektori na i gat liklik hol we binatang inap long go.

Yupela promotim kondom, AIDS tu yupela i wok long promotim. Yupela ol komiti wokim awenes. Noken promotim kondom. Wokim awenes tasol we manmeri i tingim laip bilong em long stap longpela taim long graun bai harim na kisim gut na tingim laip bilong em na famili bilong em. Em tasol na tenk yu tru.

DULCIE NARONA OTONOMES RIJEN SAUT BOGENVIL

Sepik Solidarity Grup i wokim trupela wok long ESP

Dia Edita

MI RAIT long Wantok Niuspepa long tok tenkyu long wok Sepik Solidariti Grup i mekim long Is Sepik provins long pait na rausim ol korapsen na stil pasin long Is Sepik Dipatmen.

Dispela Grup i wok hat na traim long painim aut wai na ol stil pasin i kamap strong tru insait long Is Sepik provins we planti mani mak em K13 milien i lus pinis long han bilong ol stil man.

Sepik Solidariti Grup i wok long painim aut wai na ol dispela ol sinia publik seven ol i gat sait kampani, ol nupela kar bilong raun raun nating insait long Wewak taun.

Na tu ol publik insait long provins i givim ful sapot na tu ol i mas givim 50t o K1 long helpim wok bilong Sepik Solidariti Grup.

Mi laik tok tenkyu long ol memba bilong Sepik Solidariti Grup na yu husat Sepik yus tap long wanem kona long Papua Niugini yu ken ring i kam long Mobail fon 684 8406 na toktok long ol mausman bilong dispela grup.

JOHN KRISAKI WEWAK IS SEPIK PROVINS

Bilip long Kraiss na tanim bel

Dia Edita

DISPELA askim bilong Daniel Wesley bilong Kimbe, WNBP ya, em i askim Peter Kelo olsem; Hau na yu save nem bilong yu i stap long buk bilong laip? Wantok Niuspepa # 1614. Namba tu askim em - Yu kamap rait wantaim God long wanem rot tru?

Orait em mi laik bekim na mekim klia long Daniel Wesley olsem, sapos tru yu save ritim buk tambu bilong yu, bai yu ken save sapos nem bilong yu i stap long buk bilong laip o i nogat.

Tok piksa i olsem - sapos wanpela i askim yu, Daniel, yu marit o nogat?

Na tru long en i olsem, yu marit na i gat 3-pela pikinini, na ansa bilong yu long dispela askim i wanem?

Bai yu tok yu marit o bai yu giaman na tok yu no marit? Yu yet yu save.

Wai na Peter Kelo i tok em save olsem nem bilong em i stap long buk bilong laip? Bikos em i save olsem John 1:12.

Daniel, yu mas save olsem yu mas bilip long bikpela Jisas Kraiss na tanim bel - John 3:3,7 na askim Jisas long stap insait long yu, John 1: 12 na God inap long kolim yu pikinini tru bilong em, na tu bai yu yet save tru olsem nem bilong yu i stap long buk bilong laip olsem Peter Kelo i mekim pinis na em save tru olsem nem bilong em stap long buk bilong laip olsem ol sapta na ves mi putim antap ya.

Peter Kelo i save tru olsem em gat laip. Na yu? Liklik toksave long yu Daniel olsem: Yes yu ken save tru olsem, sapos nem bilong yu stap long buk bilong laip o nogat.

Sapos yu tanim bel tru olsem Peter Kelo i bin mekim, em bai yu save olsem nem bilong yu i stap long buk bilong laip wantaim bilong Peter Kelo.

Tasol taim yu askim kain askim olsem dispela i klia na i soim tru olsem yu yet yu no save long salveisen bilong yu.

Dispela i min olsem yu bilip olsem dispela em samting bilong God yet, taim yu sanap long pes bilong God, orait God yet bai tok yu gat laip stap gut oltaim o yu bai lus na em i tromoi yu i go long ples nogut laka?

Yes planti manmeri i bilip long dispela kain rot, ol tok God yet bai skelim ol long gutpela na nogut, na God yet bai givim pei long ol wok ol bin mekim hia long graun.

Tasol Daniel, yu mas save olsem yu stretim yu nau, na bihain em laip stap gut oltaim.

Olsem mi tok pinis, sapos yu save olsem yu marit, orait long wankain rot bai yu inap save olsem yu gat nem long buk bilong laip o nogat.

Sapos nogat, yum as senisim pasin nogut bilong yu na tanim bel na kisim Jisas long laip bilong yu na bai yu save olsem yu gat nem insait long buk bilong laip olsem Peter Kelo i save bilong em i stap pinis na em wetim nem bilong yu tu mas i go na stap klostu wantaim nem bilong em.


Ating dispela bekim inap ansarim askim bilong yu laka?

Sapos nogat, orait yu ken rait long mi long dispela adres: P O Box 516, Lorengau, Manus Province, PNG.

Tenkyu tumas.

P.I. LORENGAU MANUS PROVINS





## Lida pasin bilong Moses

"Moses" long tok Hibru minim "pulim aut o rausim". Taim Moses i bin slip long basket long Wara Nail (Nile), pikinini meri bilong Faraoh i tok na ol i pulim aut basket long wara olsem na ol i givim nem Moses.

Kamap bilong Moses tu em insait long wanpela taim we ol Hibru manmeri i wok long bungim kankain mekimsave long han bilong Faraoh na ol lain bilong em. Wok lidasip bilong Moses em long bringim aut long ol Hibru pipel long kantri Isip na kisim ol i go bek long Promis Graun. Insait long wok lidasip bilong em, Moses i mekim planti wok lida we yumi ken lainim long mekim wok lida insait

long grup o kongregesen bilong yumi.

### Moses i bin skul long skul bilong Faraoh

Moses em i namba wan man insait long Baibel we narapela man i bin adoptim em. Long Exodus/Kisim Bek Sapta 2 lain 10, i tok olsem pikinini meri bilong Faraoh i kisim Moses i go long haus/ples bilong King na lukautim em. Baibel i no tok klia olsem hamas krismas Moses i stap long haus King na tu Baibel i no tok klia long Moses i bin skul o nogat. Tasol sampela histori buk i tok olsem ol Faraoh i bin gat save-man i stap na ol i save lainim ol pikinini long



**Ol prinsipol bilong gutpela lida wantaim Evangelist OHARE JABERE**

save bilong rit na rait na bilong kauntim namba. Ol i tu save lainim ol pikinini long save bilong san, sta, graun, marasin na wok bilong bodi bilong man. Moses, ating i bin i gat sans long lainim ol kain save olsem taim pikinini meri bilong Faraoh i bin adopted em.

### Ples drai em i skul/klasrum

Namba skul Moses inap long kisim save long wok lidasip na wok bilong lidim ol pipel em long Ples Draai bilong Midian. Exodus 2:11 i tok olsem Moses i ranawe i go long dispela ples taim em i kilim wanpela bosman bilong Isip na em i poreit long wanem Faraoh bai kilim em. Long Midian Moses i kamap wasman bilong sipsip bilong wanpela pris nem bilong em Jethro. I no long taim Moses i maritime nambawan pikinini meri bilong Jethro, em Zipora. (Exodus 2: 11ff)

Wok bilong lukautim sipsip em yumi save "kisim ol go long ples i gat gutpela wara na gras, tai mol wel animol laik kilim ol, wasman mas rausim ol na difendim sipsip". Long ples drai tu, Moses 'kamapim' pasin bilong pas wantaim God. Wankain pasin Jisas i save mekim. Jisas save i go long ples drai o maunten long prea na kisim strong bilong God long mekim wok. (Mk 6:

46) John bilong Baptais tu i mekim wantaim pasin. Em i kisim skul long mekim wok bilong Bikpela (Mt 3: 1-4) Ples drai em i klasrum bilong God, Holi Spirit em i tisa.

### Moses i glasim em yet

Ol lida i mas glasim ol yet, na tu glasim wok ol mekim pinis (self-assessment/evaluation). Moses mas glasim strong bilong em, save bilong em, na tu wiknes bilong em long lukim sapos em inap kamap lida o nogat. Wanpela Israel man i tokim Moses olsem "husat i makim yu lida bilong mipela?", taim Moses i laik brukim pait namel em wantaim narapela wanpisin bilong em. (Exodus 4: 10-17)

Moses i save olsem em i no lida bilong Israel long wanem God i no makim em olsem na bai ol pipel i no inap harim tok bilong em. Moses tu i luksave olsem em i nogat strong na pawa olsem King bilong Isip, we i gat ami, wokman na autoriti.

Wanpela rot tasol, em mas ronawe i go long ples drai a lus tingting long olgeta hevi. Tasol dispela ples drai, God i tanim i kamap klasrum bilong em. Moses nau i save na bilip olsem God tasol em i strong bilong em. Namba tu samting Moses i glasim long em yet, em olsem, em i no

man bilong toktok strong long pablik. Long dispela as, Moses i tokim God na God i tokim em olsem brata bilong Aaron bai mekim olgeta toktok long pablik. (Exodus 4:1-17)

### Moses i serim wok na pawa

Long Exodus 18:1-17, Moses i luk klia long tupela pasin olsem lida man bilong Israel. Nambawan pasin, em i luk klia long pasin bilong serim wok na pawa olsem long tok Inglis ol i kolim "deligated powers". Wok 'jas' Moses i wok long mekim, em i ting God i bin givim em olsem na em tasol bai mekim.

Tasol tambu papa bilong em Pris Jethro tokim em long serim wok, long wanem wok i hevi na bikpela tumas. Moses mas sindaun "6 to 6" long harim kot bilong ol manmeri. Wanman bai em i no inap pinisim olgeta kot. Jethro i edvaisim em long makim ol man i gat gutpela nem na pasin long komyniti long helpim em long harim kot na ol kot i bikpela em ol ken tokim Moses long harim.

Namba tu pasin em Moses i lainim em pasin bilong harim "edvais" bilong Jethro (narapela man) na bihainim. Moses i no ting olsem God i makim em long wok lidasip olsem na em tasol i gat tok orait, save na pawa bilong God long mekim wok "Jas".

Moses i daunim em yet long harim na bihainim 'edvais' bilong narapela man.

## WANTOK KOMENTRI

### Kukim telepon waia em i tingting bilong liklik manki

WANPELA wik i bin lus we ol wokmanmeri bilong Telikom PNG i lusim wok bilong ol na kamapim bikpela hevi long ol arapela manmeri insait long kantri.

Bikpela as tingting bilong ol i lusim wok bilong ol em ol i laikim gavman long stretim hevi bilong ol long sait bilong apim pei inap long 4% antap.

Stat long dispela wik, Telikom Bod na menesmen i tokaut olsem ol bai stretim olgeta dispela hevi bilong pei bilong ol Telikom wokmanmeri bihain long ol i stretim olgeta akaun bilong 2004.

Long Trinde moning, ol mausman bilong Telikom wokas yunion i tokim gavman olsem ol bai go bek wok.

Tasol namel long dispela taim we ol wokmanmeri i lusim wok inap ol i go bek long wok aste, planti kain hevi i kamap long ol telikom kebol na lain.

Wanem taim tru bai mipela i lukim ol dispela kain hevi olgeta taim ol wokmanmeri bilong Telikom i gat bel hevi?

Olgeta taim yunion i makim maus bilong ol Telikom wok manmeri i autim bel kros bilong ol na askim gavman long stretim, ol telikom waia i save paia, telepon i no save wok, na olgeta manmeri long kantri i save karim hevi.

Hamas taim pinis dispela kain hevi i kamap, na nogat wanpela samting i kamap long banisim ol telepon lain long ol dispela bikhet man.

Planti manmeri nau i laik save. Husat tru em ol dispela lain i save tromoi petrol bom long ol telepon waia na kukim?

Na planti manmeri moa yet bai lukim olsem em ol wokmanmeri bilong Telikom yet i mekim dispela longlong pasin.

Gavman i mas lukluk gut na kamapim sampela rot bilong sasim ol lida bilong ol yunion sapos dispela kain samting i kamap gen.

I tru olsem hevi bilong nogat inap mani tude i wok long bagarapim sindaun bilong planti manmeri, tasol sapos yumi lusim ol bikhet man olsem long kamapim moa bagarap, wanem taim tru bai yumi kisim gutpela tingting na wanbel na wok bung wantaim?

Telepon em i sevis bilong olgeta manmeri. I no bilong ol Telikom wokmanmeri tasol.

### Glasim gut strong bilong ol senis long diwai lo

GAVMAN i popaia gen long traim kamapim ol senis long lo bilong diwai. Long Trinde, gavman i karim ol dispela senis i go bek long Palamen, tasol ol i nogat inap namba bilong kamapim.

I bin i gat wan wan ol memba i paitim tok long dispela ol senis. Na wan wan tingting i kamap long Palamen long dispela wik em ol gutpela tingting bilong skelim.

Sasa Zibe, bipo ministra i lukautim envaromen i save long ol hevi bilong wok diwai insait long kantri. Em i bin givim gutpela tingting long ol senis gavman i laik kamapim.

Luksave i mas i go long Dame Carol Kidu long autim tingting bilong em long ol kain kain hevi ol loging kampani i save karim i go insait long ol as ples.

Tasol mipela i no wanbel long ol memba i sanap na opim maus nating na strongim sait bilong ol loging kampani long wanem ol i gat sampela kain wok longing tu i go het.

Diwai em i wanpela bikpela risos we PNG i gat yet. Planti arapela kantri long wol i lusim pinis ol diwai bilong ol long ol bikpela loging kampani.

Mipela noken ai op long mani na lus tingting long bihain taim bilong mipela.

## WANTOK

Published Weekly, Wednesday, for Word Publishing Company, Ltd.  
P.O. Box 1982, Boroko, NCD  
Papua New Guinea  
Telephone: 325 2500  
Fax: 325 2579  
Email: word@global.net.pg  
Pe bilong wanpela yia  
52 niusepepa

<b>Ples:</b>	<b>Air:</b>
PNG	K140.00
AUSTRALIA	US\$100.00
ASIA PACIFIC na JAPAN	US\$80.00
AMERICA na EUROPE	US\$150.00

General Manager  
Justin Hansu Kili

Editor  
Neville Choi

Published by Justin Hansu Kili, MBE of Section 58, Allotment 3, Office 2, Waigani Drive.

Word Publishing Company Limited is owned by the four major churches of Papua New Guinea: Catholics 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Ltd and are set out full on the display advertising form.





**PASIFIK NIUS**

**VANUATU:**

**Saina helpim Vanuatu difens**

SAINA i tok orait pinis long givim helpim mani we manimak bilong em i sanap long VT32 milien (US\$286,000) long ol polis projek insait long Vanuatu.

Vanuatu Minista bilong Polis, George Wells i kam bek long Saina na tok olsem ol i sainim pinis tupela agrimen wantaim hetman bilong Pipels Liberesen Ami, Jenerel Cao Gang Chuan long helpim Vanuatu Polis na Vanuatu Mobail Fos (VMF).

Aninit long dispela helpim Vanuatu bai kisim ol wok samting bilong VMF, wanpela 28 sita bas bitong ol polisman na tripela dabol kebin Haitaks bilong ol polis patrol.

Minista Wels i tok Jenerel Cao i laik helpim Vanuatu wantaim ami na difens trening bihainim askim i kam long Vanuatu gavman.

Jenerel Cao i tok tu olsem Saina bai givim tupela bot bitong wok lukaut long ol solwara agensim wok bilong ol haitman bilong ol arapela kantri husat i save raun long solwara na stilim pis hait.

Mista Wells i bin go raun lukim Deputi Sief bilong Nesenel Pipels Kongres, Zu Jialu husat i tok amamas long sapot bilong Vanuatu long wan Saina polisi.

**FIJI:**

**Air Pacific skelim yet ol Solomon balus ron**

INTANESANEL balus kampani bilong Fiji, Air Pacific bai no inap long statim bek sevis bilong en i go long Solomon Ailans inap long Ogas 16. Sief Eksekutiv Opisa bilong balus kampani, John Campbell i tok ol ron bilong balus i go long Honiara bai mas kisim toksave olsem ol i stre-tim bek pinis paia kar long Henderson Intanesenel Ples Balus.

Mista Campbell i tok olgeta dispela wok bai pinis long Ogas 11.

Mista Campbell i tok tu olsem Nu Silan Efosa i bin laik givim wanpela paia trak long ol tasol dispela ami balus bilong karim i go mekim wok long narapela hap.

Air Pacific i bin stopim ron bilong ol balus bilong em i go long Honiara bihain long birua i painim Sivil Eviesen paia kar long tupela wik i go pinis.

**CNMI:**


**Pawa blekaut hevi**

OL PAWA blekaut bai go het yet long Komonwel bilong Noten Mariana Ailans bihain long ol masin long bikpela pawa stesen long kapitel Saipan i bruk daun.

Dispela nau i lukim tripela masin i bruk daun na i luk olsem ol pawa blekaut bai go het yet moa long 30 de.

Konsalten bilong Komonwel Yutilitis Ko, Ramon Guerrero i tok dispela kain hevi em i nogut tru. Tasol em i tok tu olsem dispela hevi i mas kamap long strongim tingting long praivetaisim pawa plen namba 1 we i save givim pawa long olgeta hap long ailan.

Babauta etministresen, husat i bosim CUC bihain long gavana i tokaut long en long Mei 19, i laik givim praivetaisesen kontrak long wanpela independen pawa produsa insait long tupela mun i kam.



**Rot i lus**

Ol manmeri bilong Saina i wokabaut pusim ol wilwil bilong ol long wanpela rot long Kaifeng, long Sentrel Saina long Henan provins. Bikpela ren tru i bin pundaun long Kaifeng long Sande moning na haitim olgeta rot. REUTERS



**I NO KAR YAI**

WANPELA elefan i wokabaut long rot namel long ol kar aninit long bikpela ren long Bombay long mun i go pinis. Polis i wok long tokim ol manmeri long stap long haus long wanem bikpela ren i kamapim kain kain birua long ol.



**Nupela planet**

WANPELA saveman bilong glasim ol sta i tok em i bitip olsem em i painim namba 10 planet insait long sola sistem bilong yumi. Nupela planet em ol i givim nem 2003UB313 long en. Hap em i sindaun long en i stap longwe tru long san. Dispela piksa we wanpela atis i penim i soim dispela nupela planet i sindaun ausait tru long ol planet mipela i save long en. Yu ken lukim san i stap long we tru long en. Bikpela bilong dispela nupela planet i kioetu wankam olsem Pluto.



**Nogat kaikai**

WANPELA mama i lukautim turangu bebi bilong em i nogat inap gutpela kaikai. Tupela i stap wantaim planti fausen arapela mama na pikinini long wanpela ples bilong kisim kaikai long kantri Niger long Afrika. Sik Malaria na pekpek wara i wok long bagaram planti long ol pikinini i sik long wanem ol i nogat inap kaikai. REUTERS

# Gutpela maket plen strongim PNG turis bisnis



• Ol wok manmeri bilong TPA wantaim nupela yunifom.

Veronica Hatutasi i raitim

**I**Si isi, mak long ol turis o pipel bilong ol narapela kantri i kam insait long Papua Niugini i wok long go antap.

Long dispela yia, piksa i luk gutpela na i kam inap long namel bilong yia, mak long ol turis i kam long kantri i groa inap 10 pesen.

Long tripela mun bilong dispela yia, 16,557 turis i kam pinis long kantri. Dispela em i go antap long 1,251 moa pipel long mak i bin kam long wankain taim las yia.

"Mipela i lukim gutpela senis i kamap na dispela i soim wok we Turisim Promosen Atoriti (TBPA) i wok long mekim. Las yia, i bin gat 6 pesen go antap long ol turis i kam long kantri na long dispela yia, piksa i luk gut. I gat 10 pesen i go antap long namba wan kwota bilong dispela yia. Bikpela samting we i wok long pulim ol turis long Australia i kam long nau em samting i kamap long Kokoda Trek na wanpela em long Kokoda Trek Wokabaut. Moa turis i wok long kam tu long Amerika," Peter Vincent em Sief Eksekutiv Opisa bilong TPA i tok.

"Insait long las tripela yia, mipela i wok long senisim ol wok plen long kisim i kam insait ol samting we bai kamapim gutpela piksa na moa pipel ausait i ken kam. Mipela i gat ol opis na makim ol pablik rilesen ejen long Amerika, Yurop na Australia long raitim ol narapela sait bilong stori we i no bagarapim, tasol long promotim PNG. Mipela i wokim agrimen wantaim ol ejen na ol sos mallet bilong mipela na ol samting i go gut. Olsem na yumi wok long lukim moa turis i kam long PNG nau.

"Mipela i luksave long ol ples we ol turis bai laik lukim na ol samting mipela i ken wokim long kamapim gut ol dispela ples. Mipela i askim ol TV kru long kam insait na dispela em ol gutpela rot long maketim PNG," Mista Vincent i tok.

PNG i wanpela long ol ples long wol we i gat planti gutpela samting long soim long ol turis. Olsem tok i stap, em i laspela ples we



• Eksekutiv opisa bilong TPA Peter Vincent

ol pasin tumbuna, kalsa na naturel envaironmen i stap gut yet wantaim nogat bikpela senis o bagarap long en. Bikos planti arapela kantri long wol i lusim pinis ol dispela samting, ol i save laik kam long PNG long lukim ol samting we i stap yet olsem long bipo.

Tasol PNG yet i mas mekim ples i gutpela long ol turis i kam. Na bikpela samting em kamapim gut lo na oda na ol turis bai pilim seif long kam na raun gut. Moa turis i kam i min olsem kisim moa mani i kam insait. Yumi yet i ken soim moa pasin pren, wokim ol ges haus na moa yet, kisim trening long ol rot bilong lukautim na helpim ol turis na ol bai amamas na pilim fri long raun na mekim ol bai ol i laik kam bek gem o toksave long moa lain bilong ol i kam lukim PNG. Na wok i stap long han bilong yumi wan wan manmeri long komyuniti, provins na kantri bilong helpim TPA, ol loman na gavman long inapim dispela.

Ol liklik ailan kantri long Pasifik i save pulim moa turis bikos long gutpela pren pasin na gutpela lo na oda situesen bilong ol. Yumi long PNG i ken wokim dispela na pulim moa turis winim ol tu sapos yumi

putim tingting wantaim. Na long sait bilong yumi, bai ol pipel, komyuniti na ples i ken kisim mani bikos ol turis bai baim ol samting olsem ol henkraf na ol arapela samting moa ol i laik salim.

Glasim sevei o wok painimaut ripot bilong TPA long yia 2003 na 2004 i soim olsem mak bilong ol turis i kam insait long kantri i go antap.

Long Disemba 31, 2004, 59,013 turis i bin kam long PNG, skelim wantaim 56,185 i bin kam long wankain taim long 2003. Dispela i soim olsem las yia i lukim klostu 3,000 moa turis i kam long kantri na mak go antap em long 5 pesen.

As long ol turis i kam em long namba wan, kisim malolo na lukim ples. Namba tu lain em long bisnis wok. Dispela i karamapim ol wok bisnis, kam wantaim ol lain i gat wok bisnis long mekim na i kam long kantri, kam long stap insait long ol konvensen o konferens o bikpela bung na sampela i kam long wok. Ol narapela lain i kam long karimaut ol rises wok, skul o stap liklik taim long karimaut sampela wok.

Ol kantri we ol turis i kam long en em long Australia we moa long haf bilong ol turis i save kam long en, Amerika, Japan, Yuropem na Ingran.

Planti long ol lain we krismas bilong ol i stap namel long 30 na 50 yias i kam long bisnis sait. Dispela i sut moa long ol turis i kam long Australia.

Long ol arapela kantri, ol lain namel long 30 na 60 na antap i wok long kam long PNG long malolo na lukim ples.

Tripela long ol bikpela samting we ol turis i kam long malolo na lukim ples i kam mekim long en em long daiving, treking o wokabaut na lukim kalsa.

Na laspela grup em ol i kam long lukim ol poroman na wantok.

Ol turis i kam long balus, sip na wokabaut o long ka. Long balus, ol i pundaun long Jacksons, Hagen na Tabubil ples balus. Long sip, ol i kam sua long Mosbi, Lae na Madang. Long wokabaut na ka, ol i kam olsem long Vanimo (Wutung) boda. Long las yia, 3,438 i bin kam olsem long Vanimo na Wutung boda long Sandaun provins.

Ol kantri we bikpela mak bilong ol turis i save kam long PNG em long Australia, Nu Ailan, Oseania o ol wansolwara kantri olsem Fiji, Solomon Ailan, Nu Kaledonia, Samoa, Niue, Tuvalu, Kiribati, Guam na ol arapela, Saina, Japan, Malesia, Filipins, India, Midel Is, Esia, Sri Lanka, Korea na ol narapela, Yunaitet Kingdom, Gemeni, Frans, Rasia, Itali na ol kantri long Skendinevia olsem Sweden, Denmak, Nowei, Nedalens na ol narapela, Yunaitet Stets, Kanada na ol arapela kantri long dispela rijen na Afrika.

Mista Vincent i tok ol wok we TPA i wokim long strongim turisim maket long PNG em long go insait long ol travel na konsumas o ovasis, askim ol raita na ripota husat i save raitim ol turis stori, ol travel ejen, filim kru na ol holsela i kam raun lukim PNG na raitim ol stori, wokim ol piksa long maketim PNG ovasis. Moa tu, ol kalsarel aktiviti olsem Hiri Moale, Goroka Kopi festival, Enga na Hagen So, ol etvataismen long midia i pro-

motim PNG na tu, ol teroris na politikel hevi long ol arapela kantri i bin mekim na moa turis i kam olsem long PNG we i seif long ol lain i laik wokim bisnis na ol lain i laik kam long lukim ples na malolo, Mista Vincent i tok.

Long namba wan Kwata, 6-pela turis sip i kam pinis long PNG na dispela i kisim planti turis i kam.

Long tripela mun, mak long ol lain i kam long bisnis, invest, wok long sotpela taim na kam long konvensen i bin winim ol narapela grup. 65 pesen i bin kam aninit long dispela grup. Bikpela mak olsem 78 pesen i bin kam long Esia na 76 pesen long Australia.

Mak long 31 pesen i bin kam long limlimbur o malolo lukim ples. Mak long 90 pesen long ol turis bilong Japan i bin kam long limlimbur na 36 pesen long Amerika, Kanada na ol arapela kantri long hap.

TPA bai hostim Saut Pasifik Turisim Ogensisesen Turisim Forum.

Mista Vincent i tok ol wok redi i go het na dispela forum i sans long soim long ol arapela bikman long wansolwara ol prodak na kantri bilong yumi.

TPA i karimaut ol turisim aweanes woksop na i gat bikpela sapot i kam long en, Mista Vincent i tok.

"Promotim PNG olsem ples long pulim ol turis i kam long en bai wanpela salens, tasol wantaim sapot bilong gavman, indastri na ol stekholda, yumi ken tanim taitwara i kam long sait bilong yumi. Na sapos midia i no penim nogut piksa wantaim lo na oda hevi. Em i stap long han bilong olgeta manmeri bilong PNG long sanap na luksave olsem yumi sindaun antap long sospen i gat go long em, kain we i no inap pinis," Mista Vincent i tok.

Wanpela fokus ripot bilong TPA i soim olsem long 2002, turisim i bin pulim K375.7 milien. Dispela i min olsem wan wan man bilong narapela kantri i kam insait long PNG i Tromoim K7,000. Long mani bilong US, Turisim bisnis i pulim US\$94 milien i kam insait long ikonomi bilong PNG.

Long ol yia pastaim, i no bin gat ogenaisesen i lukautim turisim, tasol em bin kam aninit long Dipatmen bilong Komes na Indastri. Long yia 1969, gavman i kamapim Nesenel Kalsarel Senta Tras Ekt 1969.

Long ol yia long 1970, gavman i bin kamapim Turisim Ekt we i kirapim Turisim Bot bilong PNG i save etvaisim gavman lo g ol samting i sut long turisim. Long 1991 na 1993, gavman i bin lukim turisim olsem wanpea, bikpela eria i ken pulim mani i kam insait long kantri long sapotim Maining na Agrikalsa sekta.

Olsem na em bin kirapim Turisim Developmen Koporesen Ekt na Turisim Promosen Atoriti Ekt. Dispela i as we Turisim Promosen Atoriti i kirap long en na i wok long sapotim ikonmik sekta bilong kantri.

TPA i luksave long Madang, Is Nu Briten, Milen Be na Isten Hailans olsem ol modol provins bilong developim turisim bisnis long sait bilong trening, teknikel helpim na luksave long ol prodak ol turis i laikim tumas long em.



• OL TPA wokmeri i kamap gut wantaim ol nupela yunifom.

Ol Foto: NICKY BERNARD





• Gras bilong Kumul em i stail moa



• Smail na danis bilong ol meri Bogenvil tu ya



• Krai bilong mambu em i strong bilong Bogenvil



• Lainim pasin tumbuna.

# Tingim taim bilong Tumbuna

Neville Choi i raitim

**E**M NAU, maski long ron bihainim pairap bilong garamut bilong Manus tasol na het het long lukim ol Trobrien Ailan danis tasol.

Las wik Sarere, Pot Mosbi siti i bin pairap wantaim kra i bilong garamut, danis long switpela nek taim ol meri Bogenvil na kalap bihainim lek bilong ol tewel man bilong ol Asaro.

Bikpela so bilong tingim bek taim bilong ol tumbuna na pasin kalsa bilong kain kain hap bilong Papua Niugini i bin kamap na ol manmeri long Mosbi i amamasim gut tru.

Planti taim ol manmeri i save laik lukim ol tumbuna danis bilong ol arapela ples insait long kantri, tasol planti moa i no save long ol stori bilong ol dispela kain tumbuna danis, singsing o pasin kalsa.

Bikpela spot stedium, Sir Hubert Murray stedium

long Konedobu long Mosbi i bin pulap wantaim ol manmeri bilong kain kain ples. Ol PMV bas i bin pulap kapsait na planti long taim Mosbi manmeri i lukim na tingim bek Mosbi So.

Tru tumas, hamas kris-mas i lus pinis na ol pipel long Mosbi i nogat Mosbi so long go lukim.

Namba wan bikpela samting i kamap klia long dispela so em skul planti yangpela pikinini na ol arapela yangpela manmeri i bin kisim taim ol i raun na lukluk long ol danis i kam long wan wan ol provins insait long kantri.

Stat long ol tewel man bilong Asaro long Goroka i go olgeta long skin kirap danis na pairap bilong Manus garamut, ol yangpela, lapun, na ol turis tu i bin ai op. I no long ol naispela kala bilong ol pen bilong skin na kain kain bilas tasol.

Planti i bin ai op long stori i stap long as bilong ol kain kain danis na bilas.



• Ol man bilong Milen Be i samsam.



• Ol Tolai i pairapim bilong ol.



• Kala bilong ol Kairuku i save stail tumas.



• Luksave i go long ol Huli tu.



• Singsing bilong Madang i save kam gut tu.



# 'Mi nao'

# kam pinis

**S**AMPELA i wet tu na hap křsma pinis long lukim em i kam pilai hia long PNG, na nau em bai kamap.

Dispela stail manki bilong Solomon Ailans, Sharzy bai pilai raun long PNG aninit long SP Ailan Wei Tua we bai go raun long Pot Mosbi, Lae, Madang na Kokopo.

Sharzy i kam long PNG tupela yia bihain long em i winim Ruki bilong Yia 2002 awot long pinis bilong yia kaundaun musik awod we redio stesen YUMI FM i save karimaut olgeta yia.

Sharzy em i wanpela ausait man bilong winim dispela namba wan luksave insait long PNG. Wanpela yia bihain long em i bin winim dispela luksave, PNG i kisim bek long han bilong wanpela yangpela manki Alotau, Manny, husat i winim long 2003.

Wanpela samting i pulim manki Honiara i kam long PNG em sans bilong pilai wantaim wanpela aidol bilong em, Patti Potts Doi. YUMI FM yet i bin go pas long mekim dispela i kamap.

Em yet i bin tokim mi tupela yia i go pinis, "Mi bai amamas tru long pilai wantaim Patti long PNG long wanem mi laikim tumas musik bilong em na mi bin pilai musik wantaim ben bilong em Quakes long Honiara taim ol i bin raun i go long hap long 1999".

Tru tumas, em i bin laikim tru musik bilong Potts bihain long em i harim singsing Mama long Honiara.

Raun bilong em insait long PNG bai stat long dispela wik Fonde taim em bai go pilai long Club 69

long Lae. Bihain long en bai em i go long Madang long pilai long Pil's Rap'a na long Sarere, em bai kam pilai long Pot Mosbi long Pot Mosbi Kantri Klub.

Na bai gat namba tu pilai bilong em we bai i kamap long Players Musik Launs long neks wik Trinde.

Dispela musik sta husat i bin bikpela long kiau bilong ol welpaul



long as ples bilong em long ailan Simbo ausait long Gizo long Westen Provins long Solomon Ailans bai kirapim das long Is Nu Briten long tupela nait long Club Mil long Warangoi long Kokopo.

Sharzy bai ting em i kamap long ples bilong em long wanem Is Nu Briten i gat nem long ol kiau bilong welpaul, wankain tasol olsem ol Tolai na planti arapela komyniti insait long Niugini Ailans.

Olsem na ol lain pipel bilong Is Nu Briten i save indai kirap long musik bilong Sharzy. Ol rikwes i kam long dispela wanpela provins i winim namba bilong ol rikwes bilong musik bilong Sharzy i kam long ol arapela hap bilong kantri.

Taim em i toktok wantaim mausman bilong Moning So long redio NauFM, Shinobi las wik Trinde, Sharzy, we nem itu tru bilong em Samson Allan Saeni i tok em i bin pilai pinis long Mosbi long mun Novemba las yia.

"Tasol dispela tua i no bin ron gut na i nogat promosen long mipela go pilai olsem na i no planti long ol PNG fen bilong mi bai tingim olsem mi go pinis long kantri bilong ol."

Shinobi yet bai go wantaim Sharzy long Kokopo. Em i askim Sharzy wanem kain musik tru em bai pilaim long hap.

"Mi bai pilai Solomon Ailans stail musik wantaim ailan regei i go long hip hop na ol bikpela singsing bilong mi we ol pipel long PNG i save laikim olsem Rosie Marara, Meri Wantok, Mi Still Lavim Yu na planti moa singsing long namba 3 albam bilong mi Ailan Wei."

Sharzy bai kam wantaim enjinia/progrema bilong em Ronny Ritti, aninit long SP Brewery wantaim sapat i kam long Yumi FM na NauFM na ol naitklub we em bai pilai long en.

Em bai kam wantaim planti promosenel samting olsem ol CD em yet i putim han mak bilong em long en. Bai i gat ol arapela prais i kam long SP Brewery na Total Event Company.

Maketing Menesa bilong SP, Albert Veratau i tokaut las wik olsem Sharzy em i wanpela long ol bikpela musik nem insait long PNG.

"Wankain tasol olsem SP Laga bilong mipela em i namba wan bia bilong mipela we planti manmeri insait long kantri i save laikim."

Mista Veratau i tok SP i bilip olsem wok bung namel long SP Lager na Sharzy bai wanpela gutpela wok bung tru.

Narapela musik man bilong Solomon Ailans, Barnzie husat i bin singsing wantaim Sharzy long singsing bilong em Miya i bin kam raun long Mosbi klostu wanpela yia i go pinis wantaim ol arapela musik atis bilong Honiara.

Tasol raun bilong ol i no bin karim gut kaikai long wanem i no bin i gat inap promosen long en.

Ating PNG em i namba wan ples we i gat planti pipel, tru i laikim musik bilong Sharzy. Long wanem musik bilong em i bihainim tu musik bilong Potts we em i bungim liklik hap Tolai rok, faiv ki stringben na ol Pasifik musik.

Long Niu Yias De 2003, Yumi FM i bin givim Sharzy dispela Rookie of the Year 2002 bihain long musik bilong em i kukim redio.



Sharzy, stail manki bilong Solomons bai palrap long Sarere dispela wik long Port Moresby Country Club. Staka staka no moa yahi!

Bihain long en nau, Sharzy i gat namba tri albam bilong em, Ailan Wei we ol singsing Mi Nau, Meri Wantok na Keli Ngala i wok long paulim tingting bilong ol manmeri i stap.

Sharzy, husat bai painim namba 30 křsma bilong em long mun Novemba i pinisim wanpela raun bilong em long Brisben Australia we em i bin pilaim musik bilong em bilong ol wantok bilong em, ol Papua Niugini manmeri na ol arapela Pasifik lain long makim Independens De bilong Solomon Ailans.

Dispela raun bilong Sharzy i strongim hatwok bilong ol musik atis long tupela kantri wantaim long opim rot bilong musik bilong ol long kamap insait long kantri bilong arapela.

Em i gutpela tru bilong ol PNG musik atis long wanem em bai strongim ol long kamapim ol nupela stail musik na singsing bilong ol yet.

Planti manmeri tude i wok long laikim tumas musik bilong Sharzy na i wok long kamap křia olsem ol i wok long lukluk ausait lon painim nupela stail bilong musik.

Dispela kain pasin nau i ken bagarapim lokol musik indastri bilong yumi. Ol lokol musik manmeri, saun enjinia na ol studio bilong ol i mas tingting gut long dispela pasin i wok long kamap nau.

Sharzy yet em i wanpela strongpela famili man husat i wok long

lukautim 4-pela brata susa na tum-buna meri bilong em wantaim ol royalty em i kisim long musik bilong em.

Sammy, olsem ol poroman bilong em i save kolim em i bin gat laik long musik taim em i liklik yet. Bihain em i bin pilai wantaim ol kain kain ben long Honiara pas-taim long em i kamap lid singa wantaim grup Two4one long 1995.

Ol i rausim sampela albam, bihain ol i senisim nem i go long Amrock. Ol i bin rekod inap 1999 na musik bilong ol i strong yet insait long PNG.

Long 2001, Samson Allan Saeni i lusim Amrock long kamap wanpela solo musik atis. Em i senisim nem bilong em go long Sharzy na rekodim namba wan solo albam bilong em, Aloha, we em i singsing wantaim Yolanda Sasai, we nek bilong em yu ken harim long bikpela singsing bilong Sharzy, Mi Still Lavim Yu.

Bihain em i mekim namba tu albam bilong em Aelan Feeling long 2000 we em i singsing wantaim wanpela arapela biknem musik meri bilong Honiara, Rineta Benette.

Chin H Meen Supersound Studios i wok long salim musik bilong Sharzy insait long PNG.

Ol tiket bilong musik konset bilong en em K25 long Lae, Pot Mosbi na Kokopo. Tasol ol lain long Madang i mas rausim K40 bilong baim tiket.



• Sharzy na enjinia menesa bilong em Ronny Ritti, i tromoi liklik singsing taim em i bung wantaim ol nius manmeri long Mande. Ol Foto: ANDREW MOLEN

EMTV GAID

5.29AM	STATION OPEN	5.27AM	STATION OPEN
5.30AM	G JOYCE MEYER	5.30AM	G JOYCE MEYER
	MINISTRY: "LIFE IN THE WORD"	6.00AM	G NATIONAL NINE NEWS
6.00AM	G Religious programme	9.00AM	G MALOLO CLUB
	NATIONAL NINE EARLY MORNING NEWS	11.00AM	G CREFFLO DOLLAR
7.00AM	G TODAY	11.30	G EMTV PRIME LINEUP
9.00AM	G CREFFLO DOLLAR		KIDS KONA
	Religious programme	2.30PM	G BANANAS IN PYJAMAS
9.30AM	G EMTV PRIME LINE UP	3.00PM	G NEW MACDONALD'S FARM
	KIDS KONA	3.30PM	G JOHNNY BRAVO
2.30PM	G BANANAS IN PYJAMAS	4.00PM	G HOT SOURCE
3.00PM	G NEW MACDONALD'S FARM	4.30PM	G FOREIGN EXCHANGE
3.30PM	G WHAT'S NEW SCOOBY DOO	4.57PM	G EMTV TOK SAVE
4.00PM	G Y - kids favourite science program	5.00PM	G THE PRICE IS RIGHT MONSTER SHOWCASE
4.30PM	G HOT SOURCE	5.30PM	G TEMPTATION
4.57PM	G EMTV TOK SAVE	6.00PM	G NATIONAL EMTV NEWS
5.00PM	G THE PRICE IS RIGHT \$500,000 MEGA SHOW CASE	6.30PM	G A CURRENT AFFAIR
5.30PM	G TEMPTATION	6.59PM	G NEWS UPDATE IN TOK PISIN
	Quiz show hosted by Ed Phillips & Livinia Nixon	7.00PM	G LOTTO DRAW
6.00PM	G NATIONAL EMTV NEWS	7.01PM	G PRAISE
6.30PM	G A CURRENT AFFAIR	8.00PM	G TOK PIKSA
6.57PM	G NEWS UPDATE IN TOK PISIN	8.27PM	G EMTV TOK SAVE
6.59PM	G LOTTO DRAW	8.30PM	PG WHO WANTS TO BE A MILLIONAIRE
7.00PM	G CHM SUPERSOUND	9.30PM	G PNG RUGBY LEAGUE: Bombers Vs Bulldogs
7.57PM	G EMTV TOK SAVE	11.30PM	G EMTV NEWS REPLAY
8.00PM	G SPORT SCENE	12MIDNIGHT	STATION CLOSE
9.30PM	M NRL FOOTY SHOW		
11.00PM	G AFL FOOTY SHOW		
1.00AM	EMTV PRIME LINE UP		
		5.29AM	STATION OPEN
		5.30AM	G JOYCE MEYER
			MINISTRY: "LIFE IN THE WORD"
		6.00AM	G NATIONAL NINE EARLY MORNING NEWS
		7.00AM	G TODAY
		9.00AM	G MALOLO CLUB
		11.00AM	G CREFFLO DOLLAR
			EMTV PRIME LINE UP
			KIDS KONA
		2.30PM	G BANANAS IN PYJAMAS
		3.00PM	G NEW MACDONALD'S FARM
		3.30PM	G JOHNNY BRAVO
		4.00PM	G Y - kids favourite science program
		4.30PM	G HOT SOURCE
		4.57PM	G EMTV TOK SAVE
		5.00PM	G THE PRICE IS RIGHT MONSTER SHOWCASE
		5.30PM	G TEMPTATION
		6.00PM	G NATIONAL EMTV NEWS
		6.30PM	G A CURRENT AFFAIR
		6.57PM	G NEWS UPDATE IN TOK PISIN
		6.59PM	G LOTTO DRAW
		7.00PM	G HAUS & HOME
		8.00PM	PG SUPER MANNY
		8.27PM	G EMTV TOK SAVE
		9.00PM	G WIFE SWAP USA
		10.30PM	G EMTV NEWS REPLAY
		11.00PM	G CHM SUPERSOUND
		12MIDNIGHT	STATION CLOSE
		5.29AM	STATION OPEN
		5.30AM	G JOYCE MEYER
			MINISTRY: "LIFE IN THE WORD"
		6.00AM	G NATIONAL NINE EARLY MORNING NEWS
		7.00AM	G TODAY
		9.00AM	G CREFFLO DOLLAR
		9.30AM	G EMTV PRIME LINE UP
			KIDS KONA
		2.30PM	G BANANAS IN PYJAMAS
		3.00PM	G NEW MACDONALD'S FARM
		3.30PM	G JOHNNY BRAVO
		4.00PM	G Y - kids favourite science program
		4.30PM	G HOT SOURCE
		4.57PM	G EMTV TOK SAVE
		5.00PM	G THE PRICE IS RIGHT MONSTER SHOWCASE
		5.30PM	G TEMPTATION
		6.00PM	G NATIONAL EMTV NEWS
		6.30PM	G A CURRENT AFFAIR
		6.57PM	G NEWS UPDATE IN TOK PISIN
		6.59PM	G LOTTO DRAW
		7.00PM	G HAUS & HOME
		8.00PM	PG SUPER MANNY
		8.27PM	G EMTV TOK SAVE
		9.00PM	G WIFE SWAP USA
		10.30PM	G EMTV NEWS REPLAY
		11.00PM	G CHM SUPERSOUND
		12MIDNIGHT	STATION CLOSE
		7.26AM	"STATION OPEN"
		7.27AM	G EMTV TOKSAVE
		7.30AM	G BUSINESS SUCCESS
		8.00AM	G BUSINESS SUNDAY
		9.00AM	G SUNDAY
		11.00AM	PG SUNDAY ROAST
		11.30AM	G SUNDAY FOOTY SHOW
		12.30PM	G BOOTS 'N' ALL
		1.00PM	G SUNDAY AFL: Round-Brisbane Lions Vs Hawthorn
		4.00PM	G SUNDAY FOOTBALL
			Round 22 - Manly Sea Eagles Vs Broncos
		6.00PM	G NATIONAL EMTV NEWS
		6.30PM	G HAPPY GARDENER
		7.30PM	G 60 MINUTES
		8.27PM	G EMTV TOKSAVE
		8.30PM	M SUNDAY NIGHT MOVIE: OCEANS ELEVEN
		10.30PM	G EMTV NEWS REPLAY
		11.00PM	G PRAISE

Raun wantaim Kanage olgeta wik



YUMI FM NATIONAL WEEKLY HITPARADE Sarere Ogas 6, 2005

Singsing	Musik Atis	Diapela Wik
Maten Kandiek	Twin Hoks of Kavieng	1
Queen 4 Lane	Leonard ft Anslom	2
Tei Kariko	Sebeats of Sepoe	3
Mangi Sirisiri	Sebeats of Sepoe	4
Mi Nao	Sharzy	5
Rosie Marara	Sharzy	6
Lalatora	Sebeats of Sepoe	7
Quincy Lewa	X-Vibes	8
Malako	Twin Hoks of Kavieng	9
Sorpendeng	Twin Hoks of Kavieng	10
Boina Tuna	Twin Hoks of Kavieng	11
Pariva Mori	Sebeats of Sepoe	12
Sina Sohe	Troublezone ft Sasha Silovo	13
Towescop	Itambu	14
Kellu Ngala	Saba	15
Kell Ngala	Sharzy	16
Reject	X-Vibes	17
Mi No Bin Tok	DadiGili	18
Mala E	Tipa	19
Sore Lewa	Sharzy	20

CATHOLIC RADIO 103.5 FM

6.00	ANGELUS	6.05	SUNDAY EUCHARIST (replay)
6.05	MEDITATION/INSPIRATIONAL MUSIC	7.00	HOLY ROSARY
7.00	VATICAN RADIO WORLD NEWS	7.30	CATHOLIC INSIGHT
7.15	VATICAN ENGLISH PROGRAM	8.00	VATICAN WORLD NEWS
7.25	NON-STOP GOSPEL MUSIC	8.15	VATICAN ENGLISH PROGRAM
8.00	JOURNEY HOME (EWTN)	8.40	IN THE LORD'S VINEYARD
9.00	VATICAN RADIO WORLD NEWS	10.00	NON-STOP GOSPEL MUSIC
9.15	VATICAN ENGLISH PROGRAM		
9.40	KIDS SING-ALONG	6.00	ANGELUS
10.00	CATHOLIC JUKEBOX	6.05	MEDITATION/INSPIRATIONAL MUSIC
10.30	GOSPEL MUSIC	7.00	VATICAN WORLD NEWS
11.00	NON-STOP GOSPEL MUSIC	7.15	VATICAN ENGLISH PROGRAM
12.00	ANGELUS	7.30	NON-STOP MUSIC
12.05	VATICAN WORLD NEWS	8.00	BEST OF JOURNEY HOME
12.20	VATICAN ENGLISH PROGRAM	9.00	VATICAN WORLD NEWS
12.40	REFLECTION MUSIC	9.15	VATICAN ENGLISH PROGRAM
1.00	LAMB'S SUPPER WITH DR. SCHOTT HAHN	9.30	KIDS SING ALONG
2.00	MUSIC	10.00	CATHOLIC JUKEBOX (EWTN)
3.00	CHAPLET OF DIVINE MERCY	10.30	NON-STOP GOSPEL MUSIC
3.20	NON-STOP GOSPEL MUSIC	12.00	ANGELUS
4.00	CATHOLIC JUKEBOX (EWTN)	12.05	VATICAN WORLD NEWS
4.30	NON-STOP GOSPEL MUSIC	12.20	VATICAN ENGLISH PROGRAM
5.00	JOURNEY HOME	12.40	AFTERNOON REFLECTION MUSIC
6.00	ANGELUS		
6.05	MADANG LOCAL NEWS	1.00	THE WAY TO FOLLOW JESUS
6.10	VATICAN ENGLISH PROGRAM	1.30	GOSPEL MUSIC
6.30	LAMB'S SUPPER WITH DR. SCHOTT HAHN	3.00	CHAPLET OF DIVINE MERCY
7.00	HOLY ROSARY	3.20	NON-STOP GOSPEL MUSIC
7.30	CATHOLIC INSIGHT	4.00	CATHOLIC JUKEBOX (EWTN)
8.00	VATICAN WORLD NEWS	4.30	NON-STOP GOSPEL MUSIC
8.15	MADANG LOCAL NEWS	5.00	MESSAGE IN MUSIC
8.30	VATICAN ENGLISH PROGRAM	6.00	ANGELUS
9.00	TOK STREET LONG HINAIDS	6.05	VATICAN ENGLISH PROGRAM
10.30	VATICAN ENGLISH PROGRAM	6.30	MANY FACES OF MARY
		7.00	HOLY ROSARY
		7.30	BENEDICTION
		8.00	VATICAN WORLD NEWS
		8.15	CRN LOCAL NEWS
		8.30	VATICAN ENGLISH PROGRAM
		9.00	BEST OF JOURNEY HOME
		10.00	CATHOLIC JUKEBOX (EWTN)
		10.30	VATICAN ENGLISH PROGRAM
		11.00	NON-STOP GOSPEL MUSIC
		6.00	ANGELUS
		6.05	MEDITATION/INSPIRATIONAL MUSIC
		7.00	VATICAN WORLD NEWS
		7.15	VATICAN ENGLISH PROGRAM
		7.25	NON-STOP GOSPEL MUSIC
		8.00	RADIO ST. JOSEPH PRESENTS
		9.00	VATICAN WORLD NEWS
		9.15	ENGLISH PROGRAM
		9.35	KIDS SING-ALONG
		10.00	CATHOLIC JUKEBOX
		10.30	NON-STOP GOSPEL MUSIC
		12.00	ANGELUS
		12.05	VATICAN WORLD NEWS
		12.20	VATICAN ENGLISH PROGRAM
		12.40	REFLECTION MUSIC
		1.00	OUR FATHER'S PLAN
		1.30	AFTERNOON GOSPEL MUSIC
		3.00	CHAPLET OF DIVINE MERCY
		3.20	NON-STOP GOSPEL MUSIC
		4.00	CATHOLIC JUKEBOX (EWTN)
		4.30	NON-STOP GOSPEL MUSIC
		5.00	WAVE FACTOR (EWTN)
		6.00	ANGELUS
		6.05	VATICAN ENGLISH PROGRAM
		6.30	FATIMA
		7.00	HOLY ROSARY
		7.30	STATIONS OF THE CROSS
		8.00	VATICAN WORLD NEWS
		8.15	CRN LOCAL NEWS
		8.30	VATICAN ENGLISH PROGRAM
		9.00	TOK STREET LONG HINAIDS
		10.00	CATHOLIC JUKEBOX
		10.30	VATICAN ENGLISH PROGRAM
		11.00	NON-STOP GOSPEL MUSIC
		6.00	ANGELUS
		6.05	MEDITATION/INSPIRATIONAL MUSIC
		7.00	OUR FATHER'S PLAN
		7.30	CROSSROADS (EWTN)
		8.00	VATICAN WORLD NEWS
		8.15	VATICAN PROGRAM
		8.25	MUSIC
		9.30	BACKSTAGE (EWTN)
		10.00	WAVE FACTOR
		11.00	NON-STOP GOSPEL MUSIC
		12.00	ANGELUS
		12.05	VATICAN WORLD NEWS
		12.20	VATICAN ENGLISH PROGRAM
		12.40	GOSPEL MUSIC
		3.00	CHAPLET OF DIVINE MERCY
		3.20	GOSPEL MUSIC
		4.00	BACKSTAGE
		4.30	NON-STOP GOSPEL MUSIC
		5.00	WORLD OVER NEWS
		6.00	ANGELUS
		6.05	VATICAN ENGLISH PROGRAM
		6.30	MIRACLES OF THE CROSS
		7.00	HOLY ROSARY
		7.30	CROSSROADS
		8.00	VATICAN WORLD NEWS
		8.15	VATICAN ENGLISH PROGRAM
		9.00	WORLD OVER NEWS (EWTN)
		10.00	BACKSTAGE
		10.30	VATICAN ENGLISH PROGRAM
		10.50	NON-STOP GOSPEL MUSIC
		6.00	ANGELUS
		6.05	MEDITATION/INSPIRATIONAL MUSIC
		7.00	VATICAN WORLD NEWS
		7.15	VATICAN ENGLISH PROGRAM
		7.30	NON-STOP GOSPEL MUSIC
		8.00	SCRIPTURE MATTERS WITH DR. SCHOT HAHN (EWTN)
		9.15	VATICAN ENGLISH PROGRAM
		9.30	KIDS SING ALONG
		10.00	CATHOLIC JUKEBOX
		10.30	NON-STOP GOSPEL MUSIC
		12.00	ANGELUS
		12.05	VATICAN WORLD NEWS
		12.20	VATICAN ENGLISH PROGRAM
		12.40	REFLECTION MUSIC
		1.00	FIRST COMES LOVE DR. SCHOT HAHN (EWTN)
		1.30	AFTERNOON GOSPEL MUSIC
		3.00	CHAPLET OF DIVINE MERCY
		3.20	NON-STOP GOSPEL MUSIC
		4.00	CATHOLIC JUKEBOX
		4.30	NON-STOP GOSPEL MUSIC
		5.00	SCRIPTURE MATTERS
		6.00	ANGELUS
		6.05	VAMMO LOCAL NEWS
		6.10	VATICAN ENGLISH PROGRAM
		6.30	FATIMA HEAVEN'S PEACE PLAN
		7.00	HOLY ROSARY
		7.30	DOCTORS OF THE CHURCH
		8.00	VATICAN WORLD NEWS
		8.15	VAMMO LOCAL NEWS
		8.20	VATICAN ENGLISH PROGRAM
		9.00	TOK STREET ABOUT HINAIDS
		10.00	CATHOLIC JUKEBOX
		10.30	VATICAN ENGLISH PROGRAM
		10.50	NON-STOP GOSPEL MUSIC



**Laikim Penpren**

**Nem: George Kabsine**

Krismas: 19 (man)

Adres

: Leitire Catholic Mission, PO Box 125, Vanimo, Sandaun Province

Save laikim: Pilai volibol, go long danis, harim musik na ridim Baibel.

**Nem: Isabel Smith**

Krismas: 18 (meri)

Adres: PO Box 1792, Lae, Morobe Province

Save laikim: Raun wantaim ol pren na go lotu.

**Nem: Kua J. Bre**

Krismas: 17 (man)

Adres: C/- Jack A. Wak, PO Box 92, Bulblo, Morobe Province

Save laikim: Pilai soka, volibol, waswas long wara na stori wantaim ol pren.

**Nem: Rachel Kenege**

Krismas: 17 (meri)

Adres: Margarima High School, PO Box 33, Mendi, Southern Highlands Province

Save laikim: Wokim skul wok, pilai spot na stadi.

**Nem: George Gen**

Krismas: 18 (man)

Adres: Bema High School, PMB, PO Lae, Morobe Province

Save laikim: Pilai volibol, soka, basketbol, gita, harim musik, lukim TV na tok pilai.

**Nem: Timothy Tipora**

Krismas: 19 (man)

Adres: PO Box 320, University, NCD

Save laikim: Mitim nupela pren, raitim pas, na tok pilai.

**Nem: Miss Hetty Bennin**

Krismas: 26 (meri)

Adres: PO Box EL 334, Elmina - Central Coast, Ghana, West Africa.

Save laikim: Raun lukim ples, raitim pas na senisim presen.

**Nem: Ropena Patrick**

Krismas: 17 (meri)

Adres: PO Box 315, Lae, Morobe Province

Save laikim: Pilai spot, harim ol top 20, raun wantaim ol pren, tok pilai, raun long bus na go long wara na waswas.

**Nem: Judas Steven**

Krismas: 14 (man)

Adres: Andakombi Community School, PO Box 240, Goroka, Eastern Highlands Province

Save laikim: Pilai spot, go long lotu na soim pasin bilong laikim long narapela.

**Nem: Jacklyn Kaibau**

Krismas: 17 (meri)

Adres: Mercy Secondary School, PO Box 580, Wewak, East Sepik Province

Save laikim: Pilai spot, tok pilai, raitim pas na go lotu long Sande.



**STORI TUMBUNA**

**W**ANPELA taim wanpela meri wantaim pikinini bilong em i go long wara. Na mama em i go na hangamapim liklik pikinini long han bilong diwai na em i go lukim wanpela liklik raun wara.

Dispela raun wara i gat planti pipia moa yet. Na tu i gat planti pis long en. Ol i stap amamas tasol.

Na em i lukim olsem na em i go pasim wara. Em i pasim wara pinis na em i kam daun long raun wara na em i wok long savolim wara. Em i bin trai hat long pinisim dispela wara.

Taim em i bin pinisim dispela wara em i lukim i nogat liklik pis tru. Na em i lukim planti pipia moa i stap long wanpela hap tasol. Em i go na rausim ol pipia na em i no lukim wanpela pis tru. Nogat yet. Pipia tasol.

Taim em i laik pinisim olgeta pipia nau em i lukim wanpela bikpela snek. Nem bilong dispela snek em i moran. Na dispela meri em i no kilim dispela snek. Nogat. Em i larim i stap. Isi tasol em i kisim bilum bilong em wantaim hap limbun i kam na em i putim limbun i go daun long bilum pinis.


Bihain, em i kisim dispela snek na em i raunim raunim i go raun long bilum pinis na em i karim i go long ples wantaim em yet.

Em i go kamap long ples na em i hangamapim pikinini insait long haus pinis, na em i kam ausait na em i go kisim wanpela hap stik na em i sanapim. Na bihain, em i kisim dispela snek na em i go hangamapim antap long stik.

Na em i kisim naip na em i wok long katim dispela snek. Na dispela snek em i no dai. Em i giaman tasol na em i slip na meri i ting em i dai pinis. Na em i wok long katim dispela snek Na em i katim pinis na em i go kisim graun sospen i kam na em i kisim naip na em i bin katim liklik na em i putim i go daun long sospen na em wok long mekim paia.

Em i mekim pinis, na em i rausim lip na em i lukim em i tan pinis. Na em i kamautim na putim long limbun i stap.

Bihain, em i putim long limbun na em i kol pinis, na em i kisim olgeta na em i putim i go daun long bitum, na em i kisim i go insait long haus na em



JADA 4 08 05

i hangamapim long diwai.

Pinis, na em i kisim pikinini bilong em na em i kam ausait long haus. Na tupela i stap austait long haus. Na tupela i stap ausait na i tudak. Nau tupela i kisim paia na tupela i go insait long haus na tupela i slip i stap.

Taim tupela i slip, na dispela snek em i wok long skruim gen. Em i skruim pinis na em i wok long raun long haus i stap. Bihain, em i bin smelim skin bilong dispela meri na em i kam daun long graun.

Nau em i kam daun pinis na i kisim het bilong em na em i daunim long skin bilong em.

Na bihain, em i kisim em i go daun long dispela raun wara pastaim em i bin savolim long en.

Na pikinini bilong em i wok long krai i

stap long haus na ol man i harim pinis na ol i kam opim haus na ol i go insait long haus na kisim dispela liklik pikinini na ol i kam ausait na ol i wet tasol long tulait.

Tulait long moning, ol i singautim olgeta manmeri i kam bung na ol i toktok nau bai ol i mekim wanem long dispela meri. Na ol i holim wanpela pik wantaim sampela kakaruk na kisim ol kokonas i gat kru i kamap long en, wantaim sampela ol yam na mani.

Ol i kisim i go daun long raun wara na ol i tromoi i go daun. Na bihain, ol i lukim tupela lek bilong em tasol. Na ol i kisim tupela lek bilong em na ol i go long ples, na ol i krai na ol i bin planim em olgeta. Em i dai pinis.

**STORI I KAM LONG PLES NEGRIE IS SEPIK PROVINIS**

**Mi gat wari na mi laikim helpim**

**Dia Laiplain,**  
*Mi laikim tru wanpela man na mi laik maritim em. Tasol papamama bilong mi i no laik long wanem, dispela man i ni Kristen. Tasol mi ting olsem sapos mi maritim em, bai em i kamap Kristen. Olsem na mi no save watpo papamama i no laikim mi long maritim em.*  
**MI WARI**



**Dia Pren,**  
*Watpo yu no askim papamama bilong wanem ol i no laikim dispela man? Mipela i ting papamama i laik*

bai yu marit gut na sindaun gut wantaim man bilong yu. Na bikos papamama i ting Kristen bilip bilong yu na Kristen pasin bilong yu i bikpela samting, ol i laik yu maritim wanpela man i gat wankain bilip na wankain tingting olsem yu. Papamama i lukim pinis na i save pinis long planti wari na

hevi na pait i save kamap namei long tupela marit i no wan tingting na wan bel long bihainim lo bilong Kraus na sios bilong ol. Wanpela de yu sindaun toktok wantaim papamama bilong yu long ol dispela samting. Autim tingting bilong yu na harim toktok bilong ol. Na i gutpela tru sapos yu bringim boipren bilong yu i go lukim papamama bilong yu. Na tu, em i gutpela long yu bringim em i go long lotu bilong yu sampela taim na em bai lukim na save long en. Em tasol.

**Sapos yu gat wari o hevi, rait i kam long Lifeline, P O Box 6047, Boroko, NCD. Yu ken ringim mipela tu long telipon namba 3260011. Raitim trupela nem na etres bilong yu i kam na bai mipela i salim bekim long pas bilong yu. Mipela bai toktok long ol trupela samting yu askim long em tasol bai mipela i no inap long putim trupela nem bilong yu.**

**Laiplain**





**Bisnis bilong Groim Diwai  
insait long PNG  
- Planim diwai long  
ol renfores eria**

Rot bilong groim ol spisis diwai i save groa insait long PNG

**Araucaria hunsteinii (klinki pain)**



Nem bilong en: klinki pain

Wanem kain diwai: Wampela longpela diwai i save groa inap long 90 mita na namel bilong em i ken groa inap 2 mita na bikpela bun bilong em i save longpela tru. Ol han bilong em i save suf i go aut long bikpela bun bilong em na i save karim ol lip wa i gat bikpela het bilong em. Skin diwai bilong em i save groa bikpela inap long 3cm na kala bilong em ausait i braun. Insait, skin diwai bilong em i ret na pink na i gat planti rop klostu long diwai. Ol man plaus i save kamap long ol han diwai i stap klostu long graun. Prut bilong em i wampela kain kon, longpela bilong em 20cm na bikpela bilong em 12cm. Em i save plaua long mun Januari i go long mun Mas long Buloko na Wau.

**Ples we em i save groa:**  
Dispela genus Araucaria i gat 19 kain spisis we i save groa long lsten nambis ples bilong Australia, Papua Niugini, Nu Katedonia, Nofok Ailan, Sauten na Sentral Sile (Chile), Ajentina na Sauten Brasil. Papua Niugini yet i gat tupela spisis. A. cunninghamii (hoop) na A. hunsteinii (klinki). Long PNG, klinki pain i save groa long Morobe provins klostu long Buloko, Wau, Watut, Wari Waghi na Jimi. Em i gora tu long Sentral na Westen Hailans. Klinki pain i save groa long ples i stap namel long 500 na 2100 mita antap long mak bilong solwara.

**Yu ken yusem:** Dispela diwai i ken mekim gupela timba bilong mekim ol kain kain samting na ol i save yusem long mekim plaiwut na palp tu. Yu ken kaikaim ol pikinini bilong em. Spisis em i gupela tru long groim insait long plantosan na ol i save groim bilong mekim plaiwut na timba insait long PNG.

**Rot bilong groim:** Yu ken planim ol sid o pikinini insait long fores topsol o graun antap. Yu mas brukim skin bilong em tupela de bihain long kru i kamap taim ol i abrusim 18-22 mun taim longpela bilong ol i stap namel long 20 na 25 cm.



**McCarthy & Associates (Forestry) Pty. Ltd.**  
National & International Forest Consultants  
mccat@datec.net.pg

"Long kisim tok stia long olgeta wok diwai"

# NARI strongim tingting bilong ol vanilla fama


Maisan Pahun i raitim

PLANTI vanilla fama insait long Papua Niugini i save lusim ol vanilla gaden bilong ol taim prais bilong vanilla insait long maket i no gutpela tumas.

Dispela em wampela bikpela samting Wet Lolens Agrikalsa Risets Institut long Kerevat insait long Is Nu Briten i painimaut taim ol i karimaut ol trening program bilong ol long Vanila.

Ol saintis i wok long Nesenel Agrikalsarel Risets Institut (NARI) program long Kerevat nau i mas painim rot bilong salensim ol fama long menesim gut ol vanilla bilong ol long kisim gutpela kwolati vanilla.

Prais bilong vanilla long wol i save go daun taim vanilla prodaksen long kantri Madagaska i save strong. Madagaska em i namba wan kantri i



\*Vanila i red long salim.

save groim na salim vanilla long wol.

Nau dispela NARI Vanila program bilong Niugini Ailans i karamapim pinis Nu Ailan, Wes Nu Briten, Is Nu Briten na Bogenvil. Program nau bai go long Manus.

Long ol trening program i kamap pinis, bikpela intres tru i bin kamap long Bogenvil.

John Bokosu, man husat i save go pas

long ol Vanila trening long Sentrel Wakunai, Banaki na Saut Siwai na Kubu long Not Bogenvil i ai op tru long laik bilong ol manmeri long dispela trening.

"Planti pipel i kam wantaim mani bilong ol long baim ol trening mipela i givim, tasol mipela i tok nogat long wanem i planti manmeri tumas. Mipela i wok long lukluk long 50 na i go daun tasol," Mista Bokosu i tok.

Long ol arapela provins olsem Nu Ailan na Wes Nu Briten, planti manmeri tru i kamap long kisim skul na save long rot bilong kamapim kwolati vanilla bilong wol maket.

Man i go pas long ol trening bilong Ailans rijen, Gadi Ling i amamas wantaim gutpela wok dispela trening i kamapim, tasol hevi nau i stap long prais bilong vanilla we planti ol fama i autim.

Sampela long ol trena i karimaut trening i tok ol fama i no klia long stretpela rot bilong redim vanilla bilong salim. Tasol long salim ol bin bilong ol nau i

stap long laik bilong ol lain i baim.

Taim vanilla i bin kamap strong insait long kantri, ol i wok long salim long K800. Nau ol fama i wok long kisim K50 tasol long wampela kilogrem 'A' gred bin.

"Long groim top kwolati vanilla bin, yu mas menesim gut vanila plaua bilong yu i go inap long taim bilong drain," Robert Waea, wampela speselis teknisen husat i save wok wantaim vanilla long Lolens Agrikalsa Risets Stesen i tok.


Mista Waea i tok planti long ol lain i kisim trening em ol vanilla fama husat i lusim vanilla bilong ol long wanem ol i no laik salim ol bin bilong ol long prais i stap nau.

"Mipela skulim ol olsem sapos ol i laik kisim gutpela kwolati vanilla ol i mas lukautim gut vanilla bilong ol long taim bilong planim i go inap long taim bilong drain. Sapos ol i mekim dispela, bai ol i ken mekim 'A' gred vanilla bin," Waea i tok.



\*Vanila i klostu na red long graun

## Cat® 428D Backhoe Loader



Raising the standards for performance, versatility operator comfort.

More than a machine. A Partner.

The 428D benefits from increased hydraulic performance and operator comfort, whilst maintaining the high levels of visibility, durability and reliability that Caterpillar® Backhoe Loaders have long established in the industry.

- **Engine and Hydraulics** - The Caterpillar® 3054 turbocharged engine is designed for strength, performance and versatility. The load sensing, closed centre hydraulics system provides power where you need it, when you need it.
- **Operator Station** - Style, comfort, superb visibility and ease of operation maximise operator comfort and productivity.
- **Serviceability** - Excellent access and fewer maintenance requirements add up to unparalleled ease of service.

**Hastings Deering**



PORT MORESBY  
Phone: 300 8300  
Fax: 325 0141

LAE  
Phone: 472 2355  
Fax: 472 1477

TABUBIL  
Phone: 548 9045  
Fax: 548 9155

RABAUL  
Phone: 982 1244  
Fax: 982 1129



**RADIO TOK PISIN PROGRAM**  
TUNE IN: 101.9 FM

Radio Australia Tok Pisin Program - stat long mun Mas 2005

<b>MANDE</b> Moning 6AM	Stesen Op - Nius Hettain - Musik na ol intaviu
6.30AM	Nius na Karent Afes
7AM	Stesen Pas
<b>Nait</b> 7PM	Stesen Op
7.01PM	Ol Hettain na Program Priviu
7.15PM	Spots
7.30PM	Nius na Karent Afes
8PM	Hett
8.15PM	Musik
8.30PM	NIUS
8.40PM	Spots Riplei
8.55PM	Musik
9PM	Stesen Pas
<b>TUNDE</b> Moning 6AM	Stesen Op - Nius Hettain - Musik na ol intaviu
6.30AM	Nius na Karent Afes
7AM	Stesen Pas
<b>Nait</b> 7PM	Stesen Op
7.01PM	Ol Hettain na Program Priviu
7.15PM	Musik na Chit-Chat
7.30PM	Nius na Karent Afes
8PM	Mama Graun
8.15PM	Musik/Spots
8.30PM	NIUS
8.40PM	Hett Riplei
8.55PM	Musik
9PM	Stesen Pas
<b>TRINDE</b> Moning 6AM	Stesen Op - Nius Hettain - Musik na ol intaviu
6.30AM	Nius na Karent Afes
7AM	Stesen Pas
<b>Nait</b> 7PM	Stesen Op
7.01PM	Ol Hettain na Program Priviu
7.15PM	Musik na Chit-Chat
7.30PM	Nius na Karent Afes
8PM	Focus
8.15PM	Musik/Spots
8.30PM	NIUS
8.40PM	Mama Graun Riplei
8.55PM	Musik
9PM	Stesen Pas
<b>FONDE</b> Moning 6AM	Stesen Op - Nius Hettain - Musik na ol intaviu
6.30AM	Nius na Karent Afes
7AM	Stesen Pas
<b>Nait</b> 7PM	Stesen Op
7.01PM	Ol Hettain na Program Priviu
7.15PM	Musik na Chit-Chat
7.30PM	Nius na Karent Afes
8PM	Youth
8.15PM	Musik/Spots
8.30PM	NIUS
8.40PM	Focus Riplei
8.55PM	Musik
9PM	Stesen Pas
<b>FRAIDE</b> Moning 6AM	Stesen Op - Nius Hettain - Musik na ol intaviu
6.30AM	Nius na Karent Afes
7AM	Stesen Pas
<b>Nait</b> 7PM	Stesen Op
7.01PM	Ol Hettain na Program Priviu
7.15PM	Musik na Chit-Chat
7.30PM	Nius na Karent Afes
8PM	Wantok
8.15PM	Musik
8.30PM	NIUS
8.40PM	Youth Riplei
8.55PM	Musik
9PM	Stesen Pas
<b>SARERE</b> Nait 7PM	Stesen op - Ol Nius Hettain/Program Priviu
7.05PM	Musik na Chit Chat
7.30PM	Nius
7.40PM	Wantok
8PM	Lokal Ben
8.30PM	Nius
8.40PM	Musik/Chit Chat
9PM	Stesen Pas
<b>SANDE</b> Nait 7PM	Stesen op - Ol Nius Hettain/Program Priviu
7.05PM	Musik na Chit Chat
7.30PM	Nius
7.40PM	Femili Blong Serah (Redio Plei)
8PM	Lukiuk Bek Long Wik
8.30PM	Nius
8.40PM	Musik/Chit Chat
9PM	Stesen Pas

**PACIFIC BEAT**

**Fiji laik kamapim Yunaitet asples Fiji Koalisen**

WANPELA na moa yia yet i stap bipo Fiji i holim Jenerel Ileksen bilong em. Tasol ol politikel pati long giji i wok long fomim ol koalisen o bung wantaim na paitim ol toktok long ol grup bai ol i go insait long em. Long wiken, 5-pela politikel pati bilong ol asples Fiji i bin tokaut olsem ol i pasim tok long fomim wanpela koalisen gavman bihain long ileksen. Tasol i luk olsem dispelas dil i wok long bungim hevi wantaim wanpela pati i tubel sapos em bai sainim agrimen.

**Man i Askim:** Nic Maclellan  
**Man i Bekim:** Jale Baba- Jenerel Seketeri-bilong SDL pati long Fiji, Tomasi Vakatora bilong Koalisen Inisietiv Grup

**MACLELLAN:** Bihain long Fiji i bin kamapim nupela Mama Lo long 1977, Fiji i bin kisim i kam insait sistem bilong vot ol i kolim long preferensel voting. Dispela i min olsem ol liklik politikel pati i ken surukim ol ki sit long ol resis bilong ol ilektoret we bikpela resis tru i bin kamap long em. Long ol yia long 1990's Tomasi Vakatora i bin wanpela long ol tripela memba long Reeve's Komisin we i bin putim ksamap ol senis long Mama Lo na Palamenter sistem long Fiji. Nau, Mista Vakatora em i memba bilong Gren Koalisen Inisietiv Grup we i gat wok long yunaitim ol politikel pati long Fiji long serim wanem pati ol i laik yunait wantaim long em long jenerel ileksen bilong Fiji neks yia.

**VAKATORA:** Nau i gat planti politikel pati bilong ol ol asples Fiji Na tingting long traim kisim ol na yunaitim ol long fomim wanpela gren koalisen na ol i ken go insait long ileksen olsem wanpela grup. Dispela em putim ol Fiji politikel pati long grup na mipela i ting na bilip olsem sapos ol asples Fiji i no stap yunaitet wantaim long politikel sait, kantri bai bungim hevi.

**MACLELLAN:** Long wiken, koalisen bilong 5-pela asples Fiji politikel pati i bin tokaut olsem ol bai bung wantaim long 2006 jenerel ileksen.

Dispela pati we ol asples fiji politikel pati i laik bung wantaim na fomim i gat insait long em tupela bikpela apti i stap long nau gavman. Em long SDL na Konsevetiv Alaiens Matanitu Vanua.

Koalisen i gat long em tu Nesenelis Vanua Tako Lavo Pati, Pipels Nesenel Pati na Soqosoqo vakuvulewa ni taukei (SVT). Tasol i luk olsem dispela koalisen i stap pinis long sampela hevi.

Jenerel Seketeri bilong SVT Ema Druvesi i bin toktok long Fiji Times na tokaut olsemn pati bilong em i no wokim yet fainol disisen long joinimn koalisen.

Jale Baba, Jenerel Seketeri bilong SDL i warbel olsem olsem ol i mas mekim moa wok long strongim dispela tingting.

**BALE:** Mi minim olsem, mi ting i gat 5-pela signetja we i bin sainim agrimen las Sarere, maski wanpela i tok em nogat na em i no tok orait long kamap olsem memba bilong koalisen stret. Tasol bai mipela i lukluk long ol arapela pati. Mi minim olsem, mi ting olsem olgeta bai kam. Ol i gat wanpela kwesten we mipela i no bin lukluk long en.

Mipela i no ting dispela forum bai etresim ol askim bilong ol. Kwesten bilong ol long Sarere em watpo ol i kamapim ol narapela pati bihain long GCC i fomim SVT bilong makim ol asples Fiji pipel insait long Palamen. Dispela em i wanpela kwesten we forum i no inap ansaim na ol bin tokim mipela long dispela. Tasol ol i strong yet long kwesten i mas gat ansa bipo ol i kam insait long grup.

**MACLELLAN:** Tomasi Vakatora i bilip olsem pasin we SVT i no mekim ap tingting bilong em long joinim grup i noken mas stopim mov bilong promotim yuniti

bilong Fiji.

**VAKATORA:** Misis Druavesi i bin toktok long em yet na em i no inap long senisim ol tingting bilong em. Samting em i laikim em long olgeta i go na joinim em na bai i noken holim fri na open diskasen na ol inap kamap wantaim sampela gutpela tingting. Dispela em wanpela poin we mipela i bin toktok long em long wiken. Na mipela i pasim tok olsem mipela bai skruim i go moa na grup we i go pas long dispela i mas holim ol toktok long ol kain samting olsem.

**MACLELLAN:** Ol preferens i bin kamap long konvensen bung bilong Nesenel Federesen Pati long las wiken.

Jenerel Seketeri bilong NFP Pramrod Rae i bin toksave olsem NFP bai ino ken givim ol preferens bilong em long gavaning bodi SDL Pati bilong Laisenia Qarase sapos ol i tok oraitim dispela Rikonsiliesen. Tolerens an Yuniti Bil. O lo i tok orait long kamapim sekan na belgut pasin.

NFP i save kisim bikpela sapot long ol Fiji India tasol long 2001 ileksen, pati i bin givim sapot long SDL na ino long pati em i resis egens long em long winim ol vot long ol Fiji India, em Fiji Leba pati. SDL bos Jala Baba i bilip olsem ating NFP i no amamas long Leba Patim i ken win long 2006 ileksen.

**BALE:** Olgeta pati i mas mekim disisen long oda bilong preferens long em. Mi lukim olsem NFP bai i mas susim namel long Leba, we i ofaim amnesty o givim marimari long ol alin i bin kamapim ku long yia 2001 na SDL we i lukim amnesty long helpim long bilding kantri na tu, wok bilong marimari. Save na wanem disisen ol i wokim i stap long han bilong ol wan wan. Ating ol bai lukluk long ol narapela isu na i no long wanpela Bil tasol.

**WOL NA PASIFIK NIUS**

**John Howard i tok sekuriti blong Australia i gutpela**

PRAIM Minista bilong Australia i bin kam aut na tok klia long ol pipol blong Australia olsem ol lain i lukautim wok sekuriti blong kantri i mekim gutpela wok blong ol taim ol i wok long putim ai long ol pipol blong lotu muslim em ol i laik kamapim ol pasin nogut.

Het man blong Australia Federal Polis, Mick Kelty i bin tok klia olsem ASIO na arapela ol sekuriti ejensi i gat save long sikispela ten(60) ol bikhet lain nau i stap

long Australia, sampela blong ol i bin kisim ami trening blong ol long arapela kantri.

Praim Minista John Howard i bin tok i gat bikpela ol wok bung namel long ol kain kain sekuriti grup long putim ai long ol.

**Katolik Bishop askim Melanesia pipol long sapotim Papua**

KATOLIK Bisop blong Melbourne i askim strong ol Melanesia pipol raun long wol long mekim moa long sapotim bel krai blong ol long kisim independens

insait long Papua provins bilong Indonesia.

Ol sios lida long dispela wik i bin stap insait long wanpela bikpela lotu bung blong Papua insait long Melbourne siti. Melbourne Katolik Bisop Hilton Deakin em i wanpela strongpela man i save toktok planti long Papua kempein blong ol i mas kisim independens.

Em i tok ol Melanesia pipol insait long ol arapela kantri i mas strongim Yunaitet Nesens long glasim gen 1969 Act of Free choice, we em i bin larim Papua i kamap hap bilong Indonesia.

**Pacific BEAT** Listen to Radio Australia 101.9FM Port Moresby

4, 5, 6am & 4pm, 5pm including sport

Radio Australia current affairs programme which focuses on island nations, bringing you morning and evening coverage of Pacific current affairs including interviews with political leaders, newsmakers, and the people who make the Pacific beat.

**RAGBI LIG**

**PNGRFL SP Kap**

Sande 07/08/05  
 3:00 Bulldogs vs Bomber- POM  
 3:00 Gurias vs Lahanis- Rabaul  
 3:00 Cowboys vs Broncos- POM  
 3:00 Mioks vs Muruks- Madang

**POM RAGBI LIG INC. SP LIG**

Sarere 07/08/05  
 PRL 1  
 09:00 Magani vs Royals A  
 10:30 Puma vs DCA A  
 12:00 Waliya vs Dobo A  
 1:30 Brothers vs West A  
 3:00 Kone vs Souths A  
 PRL 2  
 09:00 Waliya vs Dobo U17  
 10:00 Defence vs Hawks U17  
 11:00 Waliya vs Dobo U19  
 12:00 Defence vs Hawks U19  
 1:00 Brothers vs West Res  
 2:30 Defence vs Hawks Res  
 PRL 3  
 09:00 Puma vs DCA U17  
 10:00 Brothers vs West U17  
 11:00 Puma vs CDA U19  
 12:00 Brothers vs West U19  
 1:00 Waliya vs Dobo Res  
 2:30 Puma vs DCA Res

Sande 07/08/05  
 PRL 1  
 09:30 Defence vs Hawks A  
 11:00 Tarangau vs Paga A  
 12:30 Wardstrip vs Coronation U12  
 1:00 Monier Broncos vs Chemica Cowboys  
 3:00 B/B Bulldogs vs LBC Bombers  
 PRL 2  
 09:00 Magani vs Royals U17  
 10:00 Tarangau vs Paga U17

11:00 Kone vs Souths U19  
 12:00 Magani vs Royals Res  
 1:30 Kone vs Souths Res  
 PRL 3  
 09:00 Kone vs Souths U17  
 10:00 Magani vs Royals U19  
 11:00 Tarangau vs Paga U19  
 12:30 Tarangau vs Paga Res

**SOKA**

**PMSA**

Sarere 06/08/05  
 Bisini 1  
 08:00 Femor vs Telikom D2  
 09:30 PS Rutz vs Rapatona U21  
 10:30 Moonbi vs Nomads D3  
 11:50 Badili Utd vs Los Negros D1  
 13:10 Tawala vs Jaha W1  
 14:20 PS Rutz vs Rapatona Prem  
 16:00 LBC Defence vs B/Kumuls Prem  
 Bisini 2  
 08:00 PS Rutz vs Rapatona P/Res  
 09:30 Kurti Andra vs Sunset U21  
 10:30 Naniu vs Mungkas D1  
 11:50 Naniu vs Souths Utd W1  
 13:10 LBC Defence vs B/Kumuls P/Res  
 14:20 Telikom vs WMI WP  
 16:00 Cosmos vs University Prem  
 SJGS - Oval 1  
 08:00 Los Negros vs Sobou W1  
 09:20 Sobou vs KB Utd D3  
 10:30 Sobou vs Manambu U21  
 11:50 UBOG vs Verave D2  
 13:10 Los Negros vs Pom BusCol U21  
 14:20 Tarangau vs PNG Gardener D2  
 16:00 Mirel Momase vs Souths Utd P/Res  
 SJGS - Oval 2  
 08:00 Bavaro vs Cellnet U21

09:20 Tawala vs Jaha D2  
 10:30 Raitman vs M/Yarangs D3  
 11:50 Guria vs Mungkas U21  
 13:10 Maset vs Yawata D3  
 14:20 Orogen vs Lus Prut D2  
 Sande 7/08/05  
 Bisini 1  
 08:00 Cosmos vs University P/Res  
 09:20 Guria vs PNG Gardener WP  
 10:30 LBC Defence vs B/Kumuls U21  
 11:50 Rapatona vs PS Rutz WP  
 13:10 Murat vs Bavaro D1  
 14:20 Kurti Andra vs Sunset Prem  
 Bisini 2  
 08:00 Mirel Momase vs Souths Utd U21  
 09:20 Cellnet vs Ela Utd D1  
 10:30 Cosmos vs University U21  
 11:50 University vs Lamana WP  
 13:10 Manambu vs Guria D1  
 14:20 Mungkas vs Mopi Soweto W1  
 16:00 Mirel Momase vs Souths Utd Prem  
 SJGS - Oval 2  
 08:00 Badili Utd vs M/Yarangs U21  
 09:20 Zombie vs Bomana D3  
 10:30 Mopi Soweto vs KG Utd D3  
 11:50 LBC Defence vs Sunset W1  
 13:05 Tawala vs Femor D2  
 14:20 Moonbi vs Maset D3

**EVADAHANA SOKA ASOSIESEN**

Sarere Ogas 6, 2005  
 ESA 1  
 08:00 Siale vs Natives meri  
 08:40 Junction vs K-Imindos- meri  
 09:20 K-Imindos vs Outsiders- D3  
 10:00 Batisalem vs Raitopos- D2  
 10:40 Wasu Crabs vs Notna- meri  
 11:10 Gara Utd vs Nalas Res

11:50 Liwale vs Kilengs D1  
 12:40 Junction vs Gee Neps D1  
 13:20 K-Top Mahnduz vs Notna D2  
 14:00 AGM Roots vs D-Rats meri  
 14:40 Wopa Utd vs Raitopos D3  
 ESA 2  
 08:00 AGM Roots vs Wasu Crabs D2  
 08:40 Gala Konok vs Kilengs Res  
 09:20 Sapphire vs Siale meri  
 10:00 Brothers vs Batisalem D3  
 10:40 Texas vs Graveside meri  
 11:10 Sulu vs Junction Res  
 11:50 Gala Konok vs Graveside D1  
 12:40 Nalas vs Names D1  
 13:20 K-Imindos vs Simbai Utd D2  
 14:00 Simbai Utd vs Gaidi Utd meri  
 14:40 Notna vs Nen Konok D3  
 15:30 Gee Neps vs Kilengs meri  
 Sande 07/08/05  
 ESA 1  
 08:00 Liwale vs Gee Neps Res  
 08:40 Nen Konok vs Simbai Utd D3  
 09:20 Raitopos vs K-Top Mahnduz D2  
 10:00 Namagawi vs Junction meri  
 10:40 D-Rats vs Gala Konok Res  
 11:10 Wasu Crabs vs Notna D3  
 11:50 Natare vs Gaidi Utd D1  
 12:40 Finka vs Nalas D1  
 13:20 Nen Konok vs K-Imindos meri  
 14:00 Batisalem vs Country Roots D2  
 14:40 Gaidi Utd vs Kilengs meri  
 ESA 2  
 08:00 Natare vs K-Imindos D2  
 08:40 Gee Neps vs Batisalem meri  
 09:20 Wopa Utd vs Simbai Utd D2  
 10:00 Siale vs Gara Utd Res  
 10:40 Sapphire vs Simbai Utd meri

11:10 TKSS vs AGM Roots D3  
 11:50 Sulu vs Graveside D1  
 12:40 Gala Konok vs D-Rats D1  
 13:20 Texas vs Names Res  
 14:00 Liwale vs Namagawi D1  
 14:40 Siale vs Gara Utd D1


**BASKETBOL**

**CBL**

Hohola Kot  
 Sarere 06/08/05  
 Kot Wan  
 8:30 Muruks vs Birdwing U19B  
 9:30 Muruks vs Birdwing U19G  
 10:30 Muruks vs Birdwing RW  
 12:00 Muruks vs Birdwing RM  
 1:30 Muruks vs Birdwing AW  
 3:00 Muruks vs Birdwing AM  
 Kot Tu  
 8:30 Souths vs Titan U19B  
 9:30 Souths vs Titan U19G  
 10:30 Souths vs Titan RW  
 12:00 Souths vs Titan RM  
 1:30 Souths vs Titan AW  
 3:00 Souths vs Titan AM  
 Sande 07/08/05  
 Kot Wan  
 8:30 Chariots vs Jazz U19B  
 9:30 Chariots vs Jazz U19G  
 10:30 Chariots vs Jazz RW  
 12:00 Chariots vs Jazz RM  
 1:30 Chariots vs Jazz AW  
 3:00 Chariots vs jazz AM  
 Kot Tu  
 8:30 Saints vs Tamaraws U19B  
 9:30 Saints vs Tamaraws U19G  
 10:30 Saints vs Tamaraws RW  
 12:00 Saints vs Tamaraws RM  
 1:30 Saints vs Tamaraws AW  
 3:00 Saints vs Tamaraws AM  
 Bai: Exouus



• Bampa: A BB Kings pilaia i blokim Paramana gol difenda wantaim as bilong em Pot Mosbi netbol divison wan pilai.



• Nogat wei: Muruksa pilaia i blokim olgeta rot bilong Jazz pilaia long skoa long A risev pilai long Hohola Kot long wiken. Ol poto: ANDREW MOLEN.



**EASIPAY BAI KAMAP LONG BUKA LONG 22 OGAS, 2005**

**BAIM OL AUTSTENDING BIL BILONG YU NAU!**

Toksave i go long ol lain i save yusim ilektrisiti o pawa long Buka olsem PNG Powr bai stat long konektim ol Easipay Mita insait long ol wan wan haus long namba 22 de bilong mun Ogas, 2005.

Easipay bai senisim ol dispela Kredit Mita we yupela i gat nau long haus bilong yupela.

Sapos yupela i gat ol bil bilong Kredit Mita i stap yet, i moabeta sapos yu baim bil bilong yu nau long wanem PNG Power bai katim pawa saplai bilong yu inap yu baim bil bilong yu.

Easipay em i gutpela long wanem:

- Yu ken baim hamas pawa long laik bilong yu
- Yu ken bosim hamas pawa yu yusim
- Yu no inap wari long ol bil long olgeta mun moa
- PNG Power i no inap katim pawa bilong yu moa

Yu mas lukluk long Post Courier na National Niuspepalong painim aut wanem taim bai ol PNG Power Kontrakta bai i kam long hap bilong yu long konektim ol Easipay Mita.

Nau tu yum as larim wanpela lain bilong yu i stap long haus long helpim ol wokman i go insait long haus na wok.

Wok bilong konektim ol Easipay Mita long ol haus bilong yupela i fri.

Toksave i kam long PNG Power Pablik Rilesens Seksen





# Lukluk long ol pilai i kamap

OLGETA pilai long Palau mini Gem i pinis aste we laspela pilai em PNG tim i go insait em long pilai bilong ol basketbol meri. Long dispela pilai ol meri go insait long gren fainol wantaim ol meri Fiji we i go daun long Fiji 103-72. Long ol man ol i go daun long Fiji 85-41 we ol i abrus long brons medol. Ol i pilaim Nu Kaledonia long mesa semi fainol we dispela i givim tok orait long bungim Fiji long aste long ol i laik bekim dinau. Long aste ol man i bin pilaim Fiji long kisim brons medol. Long ol narapela pilai turangu ol sofbol tim husat i sempion bilong Saut Pasifik long olgeta dispela taim i go daun 2-5 long Guam long gren fainol long Tunde. Tasol dispela i givim het pen long ol tim bilong mipela long wanem ol i no ken lus. Dispela long wanem ol i bin pilaim tripela pilai olgeta long dispela de. Long namba wan taim ol i pilai wantaim Guam we ol i go daun 2-1. Dispela pilai i mas gren fainol tasol bikos i bin gat kros i kam long Noten Marianas na

Federated Stet ov Maikronesia ol i lukim dispela pilai olsem em i priliminari fainol. Long dispela as PNG i go pilai wantaim FSM we ol i win 2-0. Long avinun nau PNG i pilai wantaim Guam gen we ol i go daun 2-5. Dispela i bikpela wari bilong PNG long de. Long tenis Nicole na Mark i pilai wantaim Nu Kaledonia long miks dabol long semi fainol tasol gen ol i lus 5-4, 5-3. Long kanu resis tupela tim bilong PNG, man na meri i no winim wanpela ples long kisim medol. Meri i kamap long namba foa ples bihain long ol wina Cook Ailan, Samoa na Fiji. Ol man i kamap long namba faiv ples bihain long Nu Kaledonia, Cook Ailan, Palau na Fiji. Tasol planti ol medol bilong PNG i kam long wetlifting na etletik. Wetlifting i winim sikspela gol medol na etletik i winim 10pela gol medol we totel i stap olsem 16 gol medol. Na dispela namba bilong gol medol i stap olsem yet. Ol narapela pilai olsem swimming, tenis, kanu resis na sofbol

i winim tasol silva medol o i no winim wanpela medol liklik. Tasol maski ol i no winim wanpela medol o winim tasol liklik medol tim menesa Numa Alu i tok Tim PNG i mekim gut. Maski ol i kisim liklik lain etlit ol kamapim ol gutpela pilai. I bin gat hop long sofbol tim long winim gol medol tasol dispela i pinis bihain long ol i go daun long Guam. Long stat PNG tim i luk fevoret inap long las minit we dispela i lukim PNG tim i go daun long Guam. Aste lukluk i bin stap long ol meri basketbol sapos ol i ken hap liklik tasol namba bilong ol gol medol bilong PNG i go antap long 17. Sapos ol bin win dispela bai givim nupela lukluk long basketbol tim bilong mipela. Long longpela taim nau basketbol i no pairap liklik long ol Saut Pasifik Gems. Oltaim ol i save go daun long ol narapela liklik Saut Pasifik kantri. PNG i no moa salim olgeta tim long wanem em i laik bai ol tim we em i save bai kisim medol tasol i mas go. Em i no laik long lusim nating mari long salim tim.

# PNG etletik tim

PAPUA Niugini Etlitk Yunion i bin salim 18 -pela etlit long dispela Palau mini Saut Pasifik Gems. Long dispela 18 rana 16-pela i winim medol. Na long dispela 10-pela i winim gol medol. Dispela em i gutpela mak tru long ai bilong PNGAU presiden Tony Green. Green i tok dispela mak i abrusim namba bilong ol medol em PNG i no bin kisim wanpela Saut Pasifik Gem long pilai bilong em. Na pilaia husat i mekim biknem long dispela pilai em Mae Koime na Sapolai Yao. Koime i winim gol medol long 100m, 200m, 400m na 100 X4 relei resis. Na Yao i winim gol medol long 1000m resis. Em i tok dispela gutpela mak i kaikai bilong progrem em Yunion i givim long ol etlit long stap aninit long trening long Goroka na long Australia. Long eitpela lain husat i stap long dispela trening sikspela i kisim medol. Tasol em i tok Nessie Ogisi na Salome Dell tasol i no stap oigea taim long dispela trening. Tasol hatwok bilong tupel na olsem ol i kisim ol medol. Salome long 800m resis na Ogisi long relei tim. Narapela etlit husat i kisim gol medol em tripel hia jam Sandy Katusela na Merolyn Auga i winim gol medol long 400m hedol. Tasol em i Auga yet em i meri bilong ron long longpela hap. Green i tok hevi bilong ol i nogat gutpela samting i sotim ol long kamapim gutpela pilai.

# Medol tali

De 8 Tunde 02/08/05

Kantri	Gol	Silva	Brons	Totel
1. NC	52	29	21	102
2. Fiji	22	20	15	57
3. Nauru	18	0	0	18
4. PNG	16	12	8	35
5. Samoa	16	8	2	26
6. Palau	9	3	6	18
7. Guam	6	7	13	26
8. CI	5	9	7	21
9. FSM	5	1	5	11
10. Tonga	5	1	3	9
11. NMari	4	12	7	23
12. SI	2	6	3	11
13. W&F	2	1	1	4
Vanuatu	2	1	0	3
MI	1	3	0	4
Niue	0	5	0	5
NF	0	1	1	2
Tuvalu	0	0	0	2
AS	0	0	1	1


**Ol pilai i pinis aste wantaim gren fainol bilong PNG basketbol meri tim i lukim ol i go daun long Fiji 103-72. Seremoni bilong ol pilai i pinis i kamap tede.**



• Givim siksti: Rana Fabian Niulai i ron long 100 X 4 reli tim. Ol i go daun long Fiji tim. Niulai wantaim tim nau bai lukluk long 2007 Samoa Saut Pasifik Gem.



• Skelim gut: PNG kanu resis wantaim wan pedela i skelim tingting na lukluk long ol wanem bilong wara em ol i mas pul long en.



• PNG basketbol pilaia i lehap long putim basket long wanpela pilai bilong ol.




• Sorim tumas. PNG sofbol pilaia Dick Bart Jnr i laik slekim wanpela bal na ron. Ol i go daun long Guam tim 5-2 long gren fainol.



• PNG meri relei tim Toea Wisil i kisim stik na ron long 100 X 4 relei resis. Ol i winim gol medol.



• Pul strong: PNG kanu resis tim i brukim solwara tasol turangu ol i kamap namba 5 ples. Ol foto: JASON PINI



• Not Kwinslen kosa Graham Murray i makim pilai bilong ol wantaim St George Illawara Dragons long dispela Fraide nait olsem em bai wanpela bikpela na hotpela pilai bilong ol. Dispela em bihain long em i makim gen ol strongpela fowet bilong em olsem kepten Pual Rauhihi na Carl Web (antap) husat i kam bek bihain long ol i kisim malolo long kisim bagarap. Ol Cowboys i wok long kamap fevoret bilong kisim 2005 primiasip taitol bihain long gutpela pilai bilong ol.



• Sapos i gat wanpela samting i stap we West Tigers kepten Scott Prince (antap) i lainim gut long taim em i stap wantaim NRL em long noken ting olsem "win i save kam isi." Dispela em samting em bai skulim ol "liklik pikinini" bilong em taim ol i pilaim Brisbane Broncos long dispela Sande.



• St George Illawara kosa Nathan Brown i tok dispela hap bek em i lusim i go, Brett Firman (antap), em man ol bai makim taim ol i kisim Not Kwinslen Cowboys long dispela Fraide nait. Dragons i bin lusim Firman bihain long em i brukim lek bilong em na olsem em i no inap pilai wantaim ol long 2004 sisen. Firman gen sain wantaim Sidni Roosters tasol gen em i wok long kisim planti bagarap we em i lusim ol na sain wantaim Cowboys long 2005 yet.



• Canberra fowet Ben Ross (antap) bai abrusim pilai bilong ol wantaim West Tigers long dispela Sande bihain long em i kisim saspenson long mekim takol nogut long wanpela pilai bilong Broncos las wik.



• Tes selekta Bob McCarthy tok Brett Kimmorley i bai namba wan man em ol Australia selekta bai kisim sapos hap bek bilong Australia Andrew Johns i laik pilai long wanpela klab bilong Ingran long Ingran supa lig. Dispela i min olsem Kimmorley bai stap hap bek bilong Australia taim ol i pilai long Trai-Nesen pilai.

Menesa bilong Johns John Fordham i raitim wanpela pas na salim i go long ARL long ol i mas mekim wanpela tok long larim Johns i no ken stap long Australia taim ol i pilai namba wan Trai-Nesen pilai egensim Niu Silan long Oktoba 15. Johns i sainim wanpela kontrak long pilai wantaim Warrington husat i luk olsem bai go insait long Ingran supa lig gren fainol. Dispela ol fainol bilong supa lig bai kamap long wankain taim taim NRL i holim gren fainol bilong em tu.

Nem bilong Kimmorley long ragbi lig i bin go daun bihain long dispela pas em i mekim we ol Kwinslen Maroons i intaseptim na skoa long givim win long ol Maroons long namba wan Stet ov Orijin pilai.

"I gat planti wei long hap bek sapos Andrew Johns i no stap," McCarthy i tok. "Em i no bin wok long kamapim gutpela pilai bihain long kain pasin ol i mekim long em. Tok i kamap pinis olsem Johns i no laik pilai long dispela Tes olsem na Kimmorley bai pilai.

• Ol Rabbitohs i surukim kontrek bilong Luke MacDougall i go long narapela moa yia.

MacDougall i wanpela bilong ol pilai husat i wok long putim planti trai bilong Rabbitohs we em i skoa 30-pela bilong ol 43 trai bilong Rabbitohs. Dispela ol trai em i putim long 26 pilai long 36 pilai bilong Rabbitohs.

Ol opisel bilong Rabbitohs i tok MacDougall i luk olsem i wanpela bilong ol pilai husat i ken kisim bai na ron gut. Na dispela kain pilai i mekim em i joinim brata bilong em Adam MacDougall long kisim gutpela nem long kem bilong Rabbitohs. "Mipela i amamas long sain gen wantaim Luke MacDougall long narapela yia.



### Raun 22

Fraide, Ogas 4- Dragons vs Cowboys. Yu ken lukim long EMTV long 8.30 long nait.

Sarere, Ogas 5 -  
Sharks vs Storms  
Warriors vs Eels  
Bulldog vs Knights

Sande, Ogas 6 - Sea Eagles vs Broncos. Yu ken lukim dispela long EM TV long 4:00-6:00 avinun.

Roosters vs Panthers  
West Tigers vs Raiders  
Bai: Rabbitohs

#### NRL Poin Lata (after rnd 15)

Klab	P	W	D	L	B	P/D	Pts
1 Broncos	19	15	0	4	2	157	34
2 Eels	19	12	0	7	2	129	28
3 Dragons	20	12	0	8	1	94	26
4 Cowboys	19	11	0	8	2	85	26
5 Wests Tigers	19	11	0	8	2	57	26
6 Storm	20	11	0	9	1	184	24
7 Sea Eagles	19	10	0	9	2	-25	24
8 Sharks	19	10	0	9	2	-60	24
9 Bulldogs	19	9	1	9	2	-37	23
10 Raiders	19	9	0	10	2	-61	22
11 Warriors	20	9	0	11	1	27	20
12 Roosters	19	8	0	11	2	-29	20
13 Panthers	20	7	0	13	1	-42	16
14 Rabbitohs	20	6	1	13	1	-222	15
15 Knights	19	4	0	15	2	-257	12

\* P: Pilai, W: Win, D: Dro, L: Lus, B: Bye, P/D: Poin Diferens, PTS: Poin


#### Top 10 poin skora

Pilai	Tim	Poin
1. Brett Hodgson	Sharks	190
2. Hazem El Masri	Bulldogs	180
3. Preston Campbell	Panthers	152
4. Michael Witt	Sea Eagles	134
5. Darren Lockyer	Broncos	133
6. Matt Orford	Storms	132
7. Luke Covell	Sharks	128
8. Stacey Johns	Warriors	127
9. Clinton Schifcoske	Raiders	120
10. Luke Burt	Eels	116



• West Tigers Shane Elford nau i sain wantaim Souths Rabbitohs long pilai wantaim ol long 2006 sisen. Bipo Elford i pilai wantaim 2002 premias- Penrith Panthers.





# Bulldogs bai pait long maina primia

Paul Zuvani i raitim

WIN bilong Brian Bell Bulldogs long dispela Sande bai lukim ol i painim wei long kamap main primia bilong 2005 SP Kap.

Dispela em long lukluk long ples we em i stap nau long ol pilai bilong SP Kap.

Nau yet em i go pas wantaim 20 poin, wampela poin antap long Rabaul Agmark Guria. Guria i stap long namba tu ples wantaim 19 poin.

Bulldogs kosa Chris Enara husat namel long kompetisen i tok em i no lukluk long kamap tida tasol i pilai isi isi long wanwan ol SP Kap pilai i kam.

"Mi i go insait olsem Anda dog. Long stat bilong pilai i gat ol tim olsem Guria, Broncos, Bombers o Lahanis husat planti lain i save em ol i favoret bilong go insait long fainol," Enara i tok. "Tasol mipela i traim tasol sapos mipela inap. Mipela i kisim tasol wanem ol pilai i kam.

Tasol maski em i bin go insait olsem anda dog em i luk olsem bai kamap main primia bihain kain pilai na ron bilong em long kompetisen.

Long dispela Sande em bai kisim tasol wankain sait we i winim Lahanis las Sande long Goroka long pilai egensim lae LBC Bombers.

Long go pas long tim bai faiv eit na kepten Stanley Hondina. Hondina bai kisim helpim long hap bek Geno Kima husat bai skelim bal gut na helpim Hondina long dairektim pilai. Wantaim Geno em huka Andrew Andiki.

Long beklain Enara bai gat Pugi Duri long fuibek, Joshua Lapa na Abraham Yobale long ol win, ol senta em Charlie Wabo na Leonard Otimar.

Long fowet em tupela prop Thomas Ninkama na Joe Sil, seken ro Joseph Omai na Emmanuel Palme na lok em Johnson Kuike.



• Brian Bell Bulldogs Joe Sipa i brukim difens bilong ol Toyota Mioks long pilai raun 10 pilai bilong ol long Pot Mosbi. Long dispela Sande Bulldogs bai gudim LBC Bombers long Pot Mosbi na Mioks bai bungim Muruks long Madang. FAIL POTO

Ol risev em David Keai, Charlie Pombo, Samuel Nap na David Waima.

Long Bombers ol i lus long Broncos las wik 28-14 na bai laik bekim dispela dinau long ol kasen bilong ol Bulldogs.

Sapos ol i win dispela bai lukim senis long poin lata bilong SP Kap we Guria bai go pas gen. Sapos ol i win dispela i min olsem ol kamap maina primia stret bilong 2005 SP Kap pilai.

Ol Bombers i bin pilai gut las wik tasol asua long fowet bilong ol i no bin pinisim gut ol pilai i lukim ol i go daun long Broncos. Long wampela taim ol i tu poin tasol bihain long Broncos 10-12.

Long stretim hevi bilong ol kosa Joe Katsir i mas tok strong long ol pilaia bilong em long ol i mas tingting tasol long holim gut bai na mekim ol strongpela ron.

Ol i gat save bilong pilai long difen tasol atek em ol i mas strong moa.

Moa yet ol i no ken larim fillings i go pas long ol we dispela i lukim ol i lus. Ol i mas pilai bal stret.

Sapos ol i lus dispela bai min olsem ol bai stap long mak nogut long sapos ol bai go insait long top foa tim long fainol o nogat.

Sapos nogat dispela bai min olsem Lahani bai go insait.

## Mioks rausim kosa

TOYOTA Mioks i rausim kosa Toksy Nema.

Dispela em bihain long ol Mioks i no pilai gut long SP Kap kompetisen. Wantaim Nema em trena Paias Pakio.

Long dispela taim Mioks wantaim narapela tripela tim long hailans- Coca Colan Lahanis, Chemica Cowboys na Mabev & Johnson Muruks bai pinis pilai long 2005 SP Kap sisen long dispela Sande.

Long taim bilong rausim tupela siaman bilong Toyota Mioks bod Robert Ganim i tok

em i tok stret olsem dispela tupela man i pinis long stap wantaim tim. "Mi tokaut olsem mipela i amamas long kamapim wantaim disisen long pinisim Toksy Nema olsem kosa na Paias Pakio olsem trena," Ganim i tok.

Em i tok tru tim i pilai gut long wok bilong difens na atek tasol long wok bilong tren na kisim strong dispela i no kamap.

Planti ol sapota i no amamas long kain wei tim i pilai maski bod i save tok long ol long stretim hevi bilong tim tupela i no bibainim.

## MP givim helpim



• Bai na olgeta samting wantaim: Sogeri Praimeri Skul faiv eit, Morea Enara i holim pas wantaim Holy Rosery pilaia long Anda 12 Pot Mosbi ragbi pilai bilong ol long Murray Bareks las wiken. Poto: AMOLEN

LAS wik nesanel memba bilong Kerema, Hon. Eki Ropenau MP, i soim gutpela sapot long givim K15000 long ol tim bilong Malalua.

Dsiepla mani i go long baim jesi, ol prais mani na ol tropi bilong kompetisen.

Long taim bilong givim dispela mani faiv pela klab - Isoupisa Seagulls, Lahehumu Sharks, Paga lovera Eels, Pusu Tigers, Terapo Roosters i stap long lukim.

Memba i givim jesi long ol tims na i tok long ol i mas givim lukautim gut dispela ol jesi na trauses taim ol i pilai.

"Laip i no isi long dispela taim na olsem wanem kain helpim olsem mi givim long yupela nau yupela i mas lukautim gut dispela ol samting. Yupela bai pilai gen long narapela yia na olsem ol yunifom em yupela i kisim em bilong stap bilong narapela yia na ol yia i kam bihain na olsem yupela i mas lukautim gut," em i tok.

"Pilai tu i gutpela samting long wanem

em i helpim yupela long tingting gut na stap gut long komyniti," em i tok. Moa yet spot i helpim ol man long strong long laip.

Ol tim bai kamapim foapela divison em long Anda 17, Anda 19, A risev na primia divison.

Long taim bilong givim dispela ol yunifom na mani Gavana bilong Galf Hon. Chris Haiveta husat kamap tu i givim K30.000 long tig long ronim pilai bilong em.

Opisal bilong Isouposa Seagulls, Morris Oakiva, husat makim maus bilong ol klab i givim bikpela tok amamas na tok tenk yu long tupela memba.

Em i tok kain sapot i no save kamap isi tasol em i amamas olsem tupela memba i harim kraibilong ol long givim dispela gutpela sapot.

"Mi tok tenk yu na mi amamas long dispela helpim em yutupela i givim long mipela. Dispela helpim em yutupela i givim bai helpim mipela long go longwe moa," Oakiva i tok.

# Foapela tim hangamapim su

Paul Zuvani i raitim

DISPELA Sande bai lukim foapela tim bai hangamapim su bilong ol long 2005 SP Kap sisen.

Foapela tim husat i save ol bai hangamapim su em Mendi Mabev & Johnson Muruks, Wabag Toyota Mioks, Mt Hagen Chemica Cowboys na Goroka Coca Cola Lahanis.

I bin gat sans long Lahanis i mas win bai ol i ken abrusim Broncos husat i stap tupela poin tasol bipo long ol. Long dispela taim Lahanis i gat 12 poin na Broncos i gat 14 poin. Tasol bihain long Broncos i winim Bombers husat i bin gat 15 poin na nau bihain long lus i stap yet long 15 i lukim Broncos i go antap pinis.

Sapos Lahanis i win dispela Sande dispela gen bai i no inap helpim ol long go moa long wanem ol i gat wampela poin daunbilo long Bombers.

Na olsem Bombers i save



• Coca Cola Lahanis pilaia i bungim taim nogut long han bilong Broncos kepten Lerory Muriki (rait han). Helpim Muriki em senta nogut bilong Broncos Eki Ene. Dispela Sande Broncos i kisim Chemica Cowboys long Pot Mosbi na Lahanis i kism Guria long Rabaul. FAIL POTO

olsem sapos ol i lus o ol i win ol bai go insait yet long ol fainol.

Nau yet Brian Bell Bulldogs i go pas wantaim 20 poin bihainim ol em Rabaul Agmark

Guria long 19 poin, Broncos long 16, Bombers 15, Lahanis 12, Cowboys 9, Mioks 7 na ron bihain tru em Muruks long 6 poin.

Dispela sisen i bin wampela gutpela sisen bihain long ol daunbilo tim husat bai pilaim iaspela pilai bilong ol long dispela Sande i no lus tru tru na i no lus olgeta.

Planti bilong ol dispela tim i lusim poin tasol long liklik mak tasol.

Dispela min olsem kompetisen i strong na sapos dispela ol daunbilo tim i bin lainim sampela gutpela samting long dispela yia dispela i ken lukim ol i abrusim mak bilong ol long narapela sisen.

Bikpela samting em ol i mas i gat hangre bilong pilai na olsem ol i mas i gat bilip long ol yet. Wantaim dispela ol samting na wantaim gutpela difen na atek pilai i nogat wampela samting i ken pasim rot bilong ol long win.



# Mosina go pait

Stori/poto: Andrew Moien

WANPELA moa kiboksa bilong Papua Niugini bai go long Australia long train bun wantaim ol paitman long hap.

Eugene Mosina bilong 'Nandex Muay Thai Kickboxing skul' long Murray Bareks long Pot Mosbi bai lusim kantri wantaim sief instrakta bilong em, Stanley Nandex long Sande long go long Australia long pait bilong em.

Em bai stat pait long Fraide neks wik. "Eugene bai stap insait long tupela pait, wanpela long Sidni na narapela long Melbon long 80kg divison," Nandex i tok.

Em i tok Mosina bai i gat sans nau long soim em yet long dispela ol pait olsem em i wanem kain paitman tru.

"Sapos em i pait gut na i win bai em i ken winim laik bilong ol promoti we planti bilong ol bai i stap long lukim dispela ol pait," Nandex i tok.

Mosina yet i tok em tu i wok long tren hat na em i redi long go daun long Australia.

"Mi wok long wok hat long las foapela wik i kam na mi pilim ol mi redi long go bungim birua bilong mi," Mosina i tok.

"Naint pesen bilong mi i redi. "Dispela em bai namba wan pait bilong mi long Australia na pait long narapela kantri," em i tok.

Mosina em i no man bilong toktok planti tasol insait long ring em i save mekim planti nois



• Sampela ol kiboksa bilong Nandex Mua Thai Kickboxing skul.

wantaim han na lek bilong em. Mosina husat i bilong otonomes rijen ov Bougainville (bipo NSP) i no nupela man long kiboksing. Em i tren wantaim klab bilong Nandex long 1998 taim skul i op long Pot Mosbi na PNG i kam inap nau. Moa yet em i bin pait insait long planti nesenol na ol rijinol sempionsip long kantri.

Nandex yet i amamas long dispela paitman bilong em na em i wok long helpim em wantaim trening bilong em long redim em long dispela ol pait.

"Em i wok long tren hat na mi save em bai pait orait," Nandex i tok. "Mipela i kisim askim i kam long Australia long salim wanpela paitman i go long 80 kilo grem divison na mipela i kisim Eugene," Nandex i tok.

Em i strongim ol narapela long tren hat bilong wanem taim bilong ol bai i kam.

"Mi laikim ol meri na ol liklik manki tu i mas join na tren hat," Nandex i tok.

Long wankain taim em i tokaut tu long namba faiv kiboksing nesenol sempionsip we bai kamap long Lae long Septemba 2 i go inap long 3 long Sir Ignasius Kilage stadium.

Nandex i tok PNGKBA bai i makim 16-pela paitmanmeri long olgeta divison stat long ol junia wantaim 12-pela krismas i go long ol sinia long makim PNG long wol sempionsip long Toronto, Kanada long Novemba.

"Bai i gat 8-men iliminesen pait we mipela bai i makim ol top paitman long pait insait long profesinol wol 8-men tonamen long ovasis narapela yia," Nandex i tok.

Tasol em i tok olsem dispela bai i stap long tupela wet divisen tasol, em long 60kg na 70kg.

Em i tokaut tu olsem biknem ekta na tupaitman husat i save ekt wantaim Jean Claude Van Damme, Paulo Tocha husat bai i kamap ges spika long Lae bai i no inap kam long nesenol sempionsip olsem em i tok bipo bilong wanem em i gat sampela wok long dispela taim tasol bai em i kam long Disemba.

## Hap hap spot

### Mosbi hoki holim sariti hoki

DISPELA Sarere bai lukim Pot Mosbi hoki i stat long holim ol sariti hoki pilai long IEA kolis long Ela Bis. Pot Mosbi Hok Asosiesen presiden Kaluwin Potuan i tok 28 koperet kampani i tok long kamap long dispela pilai. Tasol nau yet 15 i tokaut stret olsem ol bai kamap na pilai. Em i tok dispela tingting bilong holim sariti pilai em laik bilong ol yet. Ol i lukim olsem i moa gutpela sapos ol i ken mekim sampela gutpela samting long helpim ol narapela lain husat i gat bikpela nid nau. Na olsem ol i makim wot bilong ol manki long Haus Sik olsem em i gutpela hap we ol i mas helpim. "Mipela i traime dispela yia. Sapos mipela i kisim gutpela sapos long ol kampani long dispela yia em bai lukim mipela i kamapim gen long narapela yia. Em i stap long sapos bilong ol kampani," Potuan i tok.

### Evadahana soka

BIHAIN long 10-pela pilai poin lata bilong wanwan 10-pela top tim bilong ol man long divison wan i sanap olsem: Finka i go pas wantaim 22 poin, Names i bihainim wantaim 21 poin, Sulu 20, Liwale 19, BS Natives 18, Nalas 16, Siale 14, Gee Neps 14, Kilengs 13 na Graveside 12. Ol narapela 8-pela tim em Gara United 12, D-Rats 10, Natara 9, Junction 9, Texas 9, Gaide United 9, Gala Konok 6 na ron bihain tru na stap long 6 poin tu em Namagawi. I gat moa long 50 tim bilong ol man na meri i pilai long dispela soka asosiesen. Dispela ol pilai i gutpela tu long wanem ol i save mekim planti ol yangpela i pas long tingting bilong pilai na i no stap nating long mekim ol narapela samting we planti ol samting i no gutpela long komyuniti.

### PNG Bodibilding

PAPUA Niugini Bodibilding Asosiesen i wok long mekim ol wok redi bilong em long salim tim i go long Osenia Bodibilding sempionsip long Cook Ailan long Tahiti long Oktoba. Nau yet PNGBA vais presiden Ronald Haihau i tok sikspela bilda bai go long dispela sempionsip. Dispela sikspela em foapela bai kam long Pot Mosbi na wanpela wanpela long Lae na Porgera. Ol bodibilda bai salens long faipela divison em long bantam (65kg), laitwet (70kg), midolwet (80kg), lait heviwet (85kg) na heviwet (90+kg). Ol bilda bilong Pot Mosbi em Yegiora, Raphael Yokefa, Lukas Werwin na Yago Pikson. Tasol long go ol bilda i mas baim yet K2500 levi fi long go. Dispela i mekim i hat liklik sampela ol bilda long baim. Ol i amamas long mesa sponsa Trukai na ol sapos sponsa olsem PJV na Ok Tedi tasol askim sapos sampela kampani i ken helpim long bai levi fi. Dispela levi fi em bilong helpim ol tim long baim balus tiket bilong ol.

### PNG Nesenel Gems

Aste avinun Minista bilong Komyuniti Dvelopmen na Minista bilong pilai Dame Carol Kidu i bin lonsim Oktoba 2005 PNG Nesenel Gems long Sir John Guise Indo Kompleks. Dispela ol pilai i olsem liklik Olimpik Gems bilong PNG. Em i taim we wanwan ol gras rut PNG pilai long wanwan ol provins i kamap na soim save na strong ol. Wanpela bilong dispela ol pilai em rana Toea Wisil.

# DWU pasim rot b'long Tarangau

Kelly Seneka i raitim (DWU sumatin)

TINTING bilong Tarangau long go insait long Madang volibol gren fainol pilai i pinis bihain long Divain Wot Yunivesiti tim i winim ol long tripela stret set.

Dispela i pilai bilong Madang Volibol Asosiesen we i kamap long Laiwaden Kot long las wiken.

Long namba wan set Menson Vitaiba na Claudy Toimo wantaim kepten Eddie Tanago i go pas long tim bilong Yunivesiti long mekim ol strongpela atek long blok bilong Tarangau.

Long wankain taim Douglas bilong Tarangau i bekim na mekim

wankain atek long fran lain bilong Diwai tasol wantaim gutpela banis i kam long Diwai bloka Joel Keimelo na Gabriel Bego dispela i mekim laip bilong ol Tarangau i go hat.

Namba tu set i lukim tupela tim wantaim i hamarim ol yet gut wantaim sampela gutpela hit inap Diwai i winim set gen. Namba tri set i wankain tasol Diwai i holim yet strong inap ol i pinisim gut dispela set.

Long poin bilong wanwan set em DWU win 25-14, 31-29 na 25-16.

Long ol narapela pilai Tusbab i winim TSSDrifters tripela set i go long tupela set (3-2 set). Na

T'SAS i go daun long Tsunami long wanpela strongpela pilai we T'SAS i lus tripela set.

Namba tu pilai bilong ol fainol bilong ol man i lukim Tusbab i wilwilim Tsunami tripela set na Tsunami i winim tupela set. Dispela i lukim Tusbab nau i stap namba tri ples long ol semi fainol pilai. Na narapela pilai i lukim TSS Drifters i winim T'SAS tripela set na i winim tasol wanpela set.

Long dispela pilai i strongpela pilai we i lukim Keith Gedabing na Jayjay Noho i go pas long Drifters i long hamarim T'SAS. Na long las raun gutpela pait bek bilong T'SAS i kamap gut tasol i no inap long helpim ol.

Long pilai bilong ol meri dispela i lukim ol Wantok i wokabout i go antap long Summit long winim tripela stret set na Nomads i sotim Tusbab long win tripela set na Tusbab i winim tasol wanpela set.

Long ol tim i stap daunbilo em Diwai meri i kalapim T'SAS tripela set na T'SAS i winim wanpela set. Drifters i winim Instia tripela set na Instia tupela set tasol.

Long semi fainol bilong ol meri dispela i lukim ol Wantok i nek wantaim Nomads we Wantok i winim tripela set na Nomads i winim wanpela set.

Sampela ol semi fainol bai kamap bipo long ol gren fainol pilai long dispela Sarere.

## Foapela winim IBS skolasip

Paul Zuvani i raitim

FOAPELA manmeri i laki wina bilong Institut ov Bisnis Stadi Skul skolasip long kisim kompyuta na akaunting skul.

Dispela foapela lain em Henretta Sorom, Jessie Gerard, Thalavu Solomon husat i bilong Pot Mosbi na Betty Mama bilong Lae.

Foapela hia bai makim wanem kos ol i laik. Ol lain husat i makim long kisim setifiket long kompyuta bai skul sikspela mun stat long dispela yia na ol lain husat i makim setifiket long akaunting bai skul sikspela mun stat long 2006.

Kos bilong dispela skolasip i sanap olsem long K12,000. Dispela em K3000 long wanwan sumatin. Dispela skolasip i go wantaim dro em Institut i mekim long Trukai Fan Ran dro.

Long taim bilong mekim dro IBS dairekta Mick Nades i tok dispela em i namba seven yia em Institut i go insait long givim skolasip long ol sumatin long stadi. "Dispela em i seven yia we

mipela i saposim Trukai Fan Ran long droim ol manmeri olsem ol i wina bilong kisim skolasip na kam skul long Institut.

Na olsem menesmen na ol wokmanmeri bilong mi i amamas long saposim PNG Spot Federesen na kantri wantaim," Nades i tok.

Na long bekim mausman bilong Federesen Edward Kassman i tok IBS i wanpela bikpela bida bilong Trukai oksen long olgeta yia.

"IBS i bikpela bida long 2003 Trukai Fan Ran T'set Oksen wantaim 1900 t-set, namba tu bikpela bida long 2004 wantaim 1400 t-set na bikpela tru long 2005 wantaim 2275 t-set long ol skul long Pot Mosbi," Kassman i tok.

Em i tok tenk yu long gutpela sapos em IBS i givim long ol wok bilong federesen. IBS i wanpela bikpela sponsa bilong federesen.

Olgeta yia PNG Spot Federesen i save kamapim Fan Ran long kamapim mani bilong salim ol tim bilong em i go pilai long narapela kantri na dispela bai wankain long 2006.

## Mosbi rot rana

LONG dispela Sarere ol resis bai stat long Waigani Pos Opis.

-Bai i gat taimtebol long ol narapela resis long dispela yia.

Long dispela taimtebol bai i gat de bilong narapela hap maraton na Down Town 10,000km na ol sampela narapela resis long POM Rot Rana.

Husat man o meri i laik ron i ken kam tasol. Yu ken ron isi isi.

Las wik Sarere i gat tripela resis i bin stat long Konedobu, klsotu long Legoland we bikpela diwai i sanap long en.

Husat tripela rana i winim tripela resis (1.6km, 5 km na 8.5km) i bin mekim gutpela spid olsem

spid bilong ol i go aninit long foa minit long wanpela kilomita (4min/km). Ol resis i gat planti maunten long em olsem i nogat fletpela rot bilong em.

Long 1.6km resi em Francis Xavier i bin winim na spid bilong em 3.44min/km. Taim bilong em 5.18 na em i mekim bikpela spes i go kamap long seken rana Hudson John (6.18). Klostu long em rison Bae i kisim ples namba tri (6.21). I luk olsem Hudson na Rison i mekim strongpela resis.

I nogat wanpela man bia winim Milton lakosi long 5km resis. Em i mekim spit tru long Port Rot na em winim resis (17.20), 2.39minit bihain long lakosi, Akis Ivia (19.59) i winim Noko

Negosa (20.09) tasol Milton i go pas long longwe long ol arapela rana.


Longpela resis i go kamap namel long taun na bihain i go antap long Paga Hill, long hap we bip Polis Kla i stap long em. Nogat wanpela man i ken winim Silon Pinapio long dispela resis. Em i spid tru long rot i kam daun long Paga Hill na James Gurumi i kisim namba tri ples (35.23) na em i stap long namba wan ples yet long Must Run Challenge.

Deahne Turnbull em i namba wan meri i pinisim longpela resis (41.51) na em long we i go pas long seken meri Elise McAuley (4.48) na ol planti man.

**LAE BISCUIITS CO.**

# SPORTS

**LAE BISCUIITS CO.**



**Kikboksa go long ovasis long pait-Pes 31**

# Koime pilaia bilong Gem

...PNG pait hat long kisim ples

**Paul Zuvani i raitim**

PAPUA Niugini i ken wari olsem ol i abrusim gol medol long basketbol long nait we ol i go daun long Fiji 103-72 tasol long wankain taim ol i ken amamas tu.

Dispela long wanem namba wan samting em rana Mae Koime i lukautim olgeta spit bilong 100m, 200m na 400m long Saut Pasifik rijon. Na nem bilong em i stap antap long dispela taim.

Koime i winim tripela gol medol long, wanpela long rilei na silva long narapela resis.

Namba tu samting em wetlifting we Dika Toua i kwin bilong 53 kilo grem divison na wantok Hanuabada meri bilong em Rita Kari i nupela lida long 56 kilo grem divison. Tupela wantaim i winim sikspela gol medol, Toua (3) na Kari (3) long klin na jek na snets resis.

Namba tu samting em olsem basketbol tim i mekim kam bek we ol meri tim bilong mipela i pait long Fiji long gren fainol tasol i go daun long wanem Fiji i gat planti strong na spit moa long mipela. Ol meri i kisim silva medol.

Long basketbol tim bilong ol man i pilai wantaim Fiji long brons medol we ol i go daun 85-41 we Fiji i kisim medol.

Tasol mipela i sori tru long sofbol we ol i go daun long Guam long gren fainol 5-2. Sofbol i wanpela bilong ol pilai olsem wetlifting na etletik olsem i nogat askim long mipela i mas kisim gol medol. Tasol long Tunde dispela medol i wel long han.

Dispela long wanem tim bilong mipela i bin kamap long tripela pilai olgeta long dispela de. Na olsem strong bilong ol pinis bipo long ol i kamap long gren fainol.



**KALAP GUT:** PNG Basketbol pilaia i kalap long putim basket long taim ol i pilaim Fiji long resis long kisim brons medol. PNG lus 85-41. Na long pillai bilong ol PNG meri ol i pilai long gren fainol wantaim Fiji tasol i go daun 103-72 na kisim silva medol. *Poto: JASON PINI*

PNG Gems niusman Jason Pini i rait olsem PNG i bin pilai wantim Guam pas we dispela i mas gren fainol. Dispela pilai i bin lukim PNG i go daun long Guam 2-1. Tasol Federeted Stet ov Maikronesia i no amamas long wanem ol i tok dispela pilai i priliminari fainol na olsem PNG pilai gen wantaim ol we PNG i win 2-0. Dispela i lukim PNG i go gen long pilai wantaim Guam we ol i go daun 5-2 olsem gren fainol. PNG i kisim silva medol.

Long medol tali PNG i kamap namba foa ples wantaim 16 gol medol bihain long Nu Kaledonia (52), Fiji (22) na Nauru 18. Tripela arapela tim bihain long PNG long gol medol tali em Samoa (16), Palau (9) na Guam (6).

Long ol pilai i kamap ol atoriti i tok basketbol pilai i mekim nem bilong Palau long wanem planti manmeri i ron i go i kam long lukim dispela pilai moa long ol arapela pilai. Na ol i ting basketbol bai mekim biknem gen long Saut Pasifik rijon long ol taim bihain.

Long etletik ol atoriti i lukim PNG etlit Mae Koime olsem em i top etlit long dispela Palau mini Gems long etletik. Narapela etlit husat i husat i mekim planti nois em long distens rana em liklik Simbu man Sapolai Yao long 1000m resis.

Ol narapela pilai we bai mas pulim soks bilong ol em swimming, kanu resis na tenis.

Tasol long lukluk stret PNG i mekim gut long dispela ol pilai.

Long dispela taim PNG Spot Federeesen i laik salim ol tim we em i bilip bai ol i gat bikpela sans long winim gol medol.

Sapos nogat wanwan ol spot i mas traim hat yet long winim ples na kamap long ol Saut Pasifik na Komenwel Gem.

**TOYOTA**

**RAV4**  
5 DOOR WAGON 4WD

FOR ENQUIRIES CONTACT:  
**3229400**  
(Email: [mbim@elamotors.com.pg](mailto:mbim@elamotors.com.pg))

**Limited Stock**  
...with UNLIMITED FEATURES

- 2.0 litre 16 Valve engine
- 5-Speed Manual & Automatic transmission
- AM/FM Radio Cassette
- Central locking
- Power steering
- Power Windows
- Airconditioning
- Seating for 5 people

**Ela Motors**

TOYOTA TSUSHO (PNG) LTD.

✓ TOYOTA QUALITY ✓ PARTS & SERVICE BACKUP ✓ 15 BRANCHES NATIONWIDE